

CLARSACH AN DOIRE



Blair. 82

CLARSACH AN DOIRE:

GAELIC POEMS AND SONGS.


BY
NEIL MACLEOD.

EDINBURGH: MACLACHLAN & STEWART.

INVERNESS: A. & W. MACKENZIE.



ABERDEEN UNIVERSITY PRESS.



James Rob

Broadford

June 13th 1883

CLARSACH AN DOIRE:

Evelyn Stewart Murray

Dain agus Grain.

May 2nd 1880

LE

N I A L L M A C L E O I D.

Tha nìs' a' teachd le beagan rann
'Chur fàilt' air iarnad 'Tir nam beanm,
'S ged 'tha mo chlàrsach lag 'us fann,
Tha 'dùrachd blàth'
Gu 'bhi air aoidheachd feadh nan gleann
'An tìr nan dàn.

D U N E I D E A N N :

M A C L A C H L A I N N A G U S A N S T I U B H A R T A C H.

I N B H I R N I S : A . A G U S U . M A C C O I N N I C H.

1883.

ROIMHRAIDH.



THA e 'n a chleachdadh aig iomadh ùghdar, ann a bhi 'toirt 'oibre fhéin 'an làthair an t-saoghail a' chiad uair, a bhi 'cur a leabhair fodh dhion no fodh theàrmunn neach-eiginn aig am bheil seasamh àrd sònruidhte anns an tìr. Ach le mòr spéis agus urram do na h-àrd-inbheich agus na sàr-fhiùghantaich, 's e mo rùn suidhichte CLÀRSACH AN DOIRE a chur fodh chùram agus fodh dhìdeann Chlann nan Gàidheal anns gach ceàrn anns an cluinn iad a guth—agus tha dòchas agam gu 'n tig iomadh latha agus linn mu 'n nochd mo luchd-dùthcha meatachd sam bith ann a bhi 'n an càirdean 's 'n an cùl-taie do shaothair nam bàrd a sheinn, agus nam bàrd a sheinneas, ann an sean chainnt bhlàth, bhinn, urramaich, ar màthar.

Chaidh àireamh de dhuanagan an leabhair so a chur 'an clòdh a cheana, ann am paipeirean-naigheachd na Gàidhealtachd ; agus fhuair cuid dhiubh aoidheachd cho caoimhneil agus cho blàth ann an tìr nam beann 's gu 'm bheil iad a nis 'g am meas fhéin aig an tigh mu iomadh geallbhan meadhrach, suilbhir, air feadh ghleann agus shrathan an taoibh-tuath. Thug sin, ma ta, agus comhairle chàirdean anns am bu chòir dhomh làn earbsa a bhi agam, misneach dhomh an cruinneachadh ri 'chéile anns an leabhar so.

Ann am measg mo chàirdean lionmhòr anns a' bhaile-mhòr so tha mi fodh chomain àraid do 'n fhear a rinn

gu toileach a h-uile còmhnaidh leam ann an deasachadh CLÀRSACH AN DOIRE air son a' chlàrdh-bhualaidh : 's e sin an léigh Macghillemhui, mac a' bhàird urramaich nach maireann, Gobha na Hearadh.

Faodaidh e 'bhi nach 'eil CLÀRSACH AN DOIRE gu h-uile saor bho choire, agus gu 'm bi iomadh neach ag ràdh nach 'eil a fuaim ach fann ann an coimeas ris na clàrsaichean móra binn Gàidhealach a sheinn air thoiseach oirre : ach ma bhitheas i 'n a meadhon air uair de 'n ùine 'chur seachad le taitneas do neach sam bith ; no ma 's e 's gu 'n dùisg i aon fhaireachadh beò agus blàth ann an cridhe neach-eiginn aig am bheil tùrsa no tróm-inntinn ; no gu 'n cuir i aon sradag de bheatha ann an cainnt no ann am bàrdachd nan Gàidheal, cha mheas mi gur h-ann 'an tur dhiomhanas a chaidh teudan CLÀRSACH AN DOIRE a chur air ghleus.

N. M.

DUNÉIDEANN, *An Cèitein*, 1883.



AN CLAR-INNSE.


	SLIOS
A' bhean agam fhìn, - - - - -	86
Aig naigh Uilleim Rois, am bàrd, - - - - -	129
Am faigh a' Ghàidhlig bàs, - - - - -	18
Am fear a chaill a leannan, - - - - -	76
An gille càrn, crùbach, - - - - -	92
An gleann 's an robh mi òg, - - - - -	1
An seann fhleasgach, - - - - -	139
An seilean agus a' chuilcag, - - - - -	5
An téid thu leam, a rìbhinn òg, - - - - -	52
An tìr 'bu mhiann leinn, - - - - -	72
An t-uan, - - - - -	146
An naigh, - - - - -	163
Bàs leanabh na bantraich, - - - - -	83
Beannachadh leannain, - - - - -	43
Bidh Seumas leam an nochd, - - - - -	102
Brosnachadh na Gàidhlig, - - - - -	40
Clann nan Gàidheal, - - - - -	153
Coille 'chaoil, - - - - -	66
Coinneach odhar, - - - - -	47
Cuairt do Chuithraing, - - - - -	33
Cumha an t-sean Ghàidheil, - - - - -	69
Cumha Eilean a' cheò, - - - - -	116
Cumha leannain, - - - - -	94
Deoch-slàinte nan cuiridhean, - - - - -	134
Dòchas, - - - - -	54
Dol fodha na gréine, - - - - -	81
Dòmhnall cruaidh agus an ceàrd, - - - - -	148
Duanag an t-seòladair, - - - - -	31
Duanag do Bhellaig, - - - - -	24
Dùghall na sròine, - - - - -	105

	SLIOS
Dùrachd bliadhn' ùire, - - - - -	107
Fàilte a' Phaipeir Ghàidhlig, - - - - -	49
Fàilte do 'n bhliadhn' ùir, - - - - -	29
Fàilte do 'n Eilean Sgiathanach, - - - - -	26
Far an robh mi 'n raoir, - - - - -	79
Freagradh do litir caraide, - - - - -	119
Gàidheil an taoibh-tuath, - - - - -	96
Gu Iain Caimbeal, am bàrd, - - - - -	123
Gu ma slàn do 'n òig-fhear, - - - - -	143
Leabhar na cuimhne, - - - - -	136
Maduinn shamhraidh, - - - - -	98
Màiri Bhail' a' chrò, - - - - -	21
M' annsachd, - - - - -	161
Mo chruinneag Ileach, - - - - -	113
Mo Dhòmhnullan fhéin, - - - - -	36
Mo ghaol an rìbhinn, - - - - -	74
Mo ghràdh do m' dhùthaich fhìn, - - - - -	90
Na croitearan Sgiathanach, - - - - -	125
Na Gàidheil, - - - - -	61
Oran, - - - - -	45
Oran na sean mhaighdinn, - - - - -	63
Rainn do neòinean, - - - - -	109
Ri taobh na tràigh, - - - - -	132
Sealladh air Oisean, - - - - -	157
Sine Challum Bhàin, - - - - -	10
Thoir mo shoiridh thar an t-sàile, - - - - -	100
Tigh a' mhisgeir, - - - - -	57
Turas Dhòmhnuill do Ghlaschu, - - - - -	12

TRANSLATIONS—

The deserted Gael, - - - - -	176
The drunkard's home, - - - - -	172
The Maid of Ballychro, - - - - -	169
Where I was yestreen, - - - - -	179

CLARSACH AN DOIRE.



AN GLEANN 'S AN ROBH MI OG.

AIR Fonn—" *When the kye come hame.*"

'N UAIR ²'philleas ruin an samhradh,
Bidh gach doire 's crann fodh chròic;
Na h-eòin air bhàrr nam meanglan
'Deanamh caithreim bhinn le 'n ceòl;
A' chlann bheag a' ruith le fonn
Mu gach tòim a' buain nan ròs—
B' e mo mhiann a bhi 's an àm sin
Anns a' ghleann 's an robh mi òg.

Anns a' ghleann 's an robh mi òg,
Anns a' ghleann 's an robh mi òg,
B' e mo mhiann a bhi 's an àm sin
Anns a' ghleann 's an robh mi òg.

'S a' mhaduinn 'n àm dhuinn dùsgadh,
Bhiodh an driùchd air bhàrr an fheadir;
A' chuthag 'us gug-gùg aic'
Ann an doire dlùth nan cnò;

Na laoigh òg' a' leum le sunnt,
 'S ag cur smùid air feadh nan lòn ;
 Ach cha 'n fhaicear sin 's an àm so
 Anns a' ghleann 's an robh mi òg.

Anns a' ghleann, &c.

'N àm an cruinneachaidh do 'n bhuailidh
 B' e mo luaidh a bhi 'n an còir ;
 Bhiodh a duanag aig gach guanaig,
 Agus cuach aice 'n a dòrn ;
 Bhiodh mactalla 'freagairt shuas—
 E ri aithris fuaim a beòil—
 Ach cha chluinnear sin 's an àm so
 Anns a' ghleann 's an robh mi òg.

Anns a' ghleann, &c.

Ann an dùbhlachd gharbh a' gheamhraidh
 Cha b' e àm 'bu ghainn' ar spòrs ;
 Greis air sùgradh, greis air dannsa,
 Greis air cainntireachd 'us ceòl ;
 Bhiodh gach seanair aosmhor, liath,
 'G innse sgialachdan gun ghò
 Air gach gaisgeach fearail, greannmhor
 Bha 's a' ghleann 'n uair 'bha iad òg.

Anns a' ghleann, &c.

Bha de shòlas dheth gach seòrs' ann
 'Chumadh òigridh ann am fonn ;
 Cha robh uisge, muir, no mòinteach
 Air an còmhdach bho ar bonn ;

Ach an diugh tha maor 'us lann
 Air gach alltan agus òb ;
 Cha 'n 'eil saorsa sruth nam beanntan
 Anns a' ghleann 's an robh mi òg.

Anns a' ghleann, &c.

Tha na fàrdaichean 'n am fàsaich,
 Far an d' àraicheadh na seòid,
 Far 'm bu chridheil fuaim an gàire,
 Far 'm bu chàirdeil iad mu 'n bhòrd,
 Far am faigheadh coigreach bàigh,
 Agus ànrach bochd a lòn ;
 Ach cha 'n fhaigh iad 'sin 's an àm so
 Anns a' ghleann 's an robh mi òg.

Anns a' ghleann, &c.

Chaochail maduinn ait ar n-òige
 Mar an ceò air bhàrr nam beann ;
 Tha ar càirdean 's ar luchd-eòlais
 Air am fògradh 'bhos 'us thall ;
 Tha cuid eile dhiubh nach gluais,
 Tha 'n an cadal buan fodh 'n fhòd,
 'Bha gun uaill, gun fhuath, gun antlachd
 Anns a' ghleann 's an robh iad òg.

Anns a' ghleann, &c.

Mo shoiridh leis gach cuairtaig,
 Leis gach bruachaig agus còs
 Mu 'n tric an robh mi 'cluaineis
 'N àm 'bhi 'buachailleachd nam bó—

'N uair a thig mo réis gu 'ceann,
Agus feasgar fann mo lò,
B' e mo mhuann a bhi 's an àm sin
Anns a' ghleann 's an robh mi òg.

Anns a' ghleann, &c.



AN SEILLEAN AGUS A' CHUILEAG.

AIR maduinn chiùin 's a' chéitein thlàth,
 Gach doire 's crann 'us gleann fodh bhlàth,
 Bha 'n smeòrach agus eòin nan spéur
 Le 'n luinneig bhinn ac' air gach géig;
 Na laoigh 's na h-uain a' leum le fonn,
 A' ruagail mu gach preas 'us tòin;
 'Us braon de 'n driùchd air bhàrr gach feòirn'
 A' dealradh air an cinn mar òr.

Bha cuileag sgiathach fhaoin gun chéill
 'G a cluiche fhéin ri blàths na gréin';
 I 'null 's a nall, i sìos 'us suas,
 Gun dragh, gun chùram, 'us gun ghruaim.
 Bha seillean stiallach, ciallach, còir
 A' falbh a chothachadh a lòn,
 Ghlaodh a' chuileag "ciod e 'n sgeula"?
 'S labhair iad mar so ri 'chéile—

A' CHUILEAG.

"Nach ann ort 'tha 'n drip an còmhnuidh?
 Fuirich tiota leam ag còmhradh:
 Ciod an tairbh' 'tha dhut 's an t-saoghal,
 Ga do mharbhadh fhéin le saothair?
 Bho mhoch gu dubh, bho bheinn gu tràigh,
 Cha 'n fhàg thu lus no sóbhrach bhàn,

Cha 'n fhàg thu cluaran, dris, no ròs
Nach toir thu greiseag air an deoth'l.

Seall thu mis' an so cho éibhinn,
'Danns' an gathan caoin na gréine ;
'S cha 'n 'eil mi uair no tràth gun lòn,
Ged nach 'eil mil agam an stòr ;
Ma thig am fuachd, 's an geamhradh gann,
Cha dean mi ullachadh roimh 'n àm—
Thigeadh uair 'us àm na h-éiginn,
Cha ghabh mi dragh dheth gus an fheudar.”

AN SEILLEAN.

“ A chreutair aimideich gun ghò,
Gur beag 'tha 'ghliocas na do ghlòir ;
Ged 'tha thu 'n diugh 's do chupan làn,
Cha mhair an saibhreas sin ach gearr ;
Thig doinionn shearbh 'us geamhradh garbh
A bheir do shòlasan air falbh ;
Cha 'n fhaigh thu blàths air feadh nan gleann,
Cha tog a' ghrian ach fann a ceann.

Gach ròs 'tha 'sgeadachadh nam bruach
Bheir reòdhtachd fhuar air falbh an gruag ;
Cha chluinn thu smeòrach air gach géig,
Cha 'n fhaic thu uain a' ruith 's a' leum ;
Bidh mis' an sin gu seasgair blàth,
'S a' bhothan bheag a dhealbh mo làmh ;
Cha bhi mi 'n taing aon neach fo'n ghréin,
A' sealbhachadh mo shaoithreach fhéin.

Bidh tus' an sin na d' dheòiridh truagh,
 A' dol mu'n cuairt gun dreach gun tuar,
 'S tu leis a' ghort a' faotainn bhàis,
 An tuill 's an uinneagan an sàs ;
 Thu air an déiric ams gach àit',
 Gun mhath dhut fhéin, gun tlachd do chàch ;
 Sin an dòigh a chleachd do shìnnair,
 'S dòigh nach dean an sliochd a dhiobradh."

A' CHUILEAG.

" Bu tric do shaothair fhéin gun bhuaidh,
 Ged 'tha thu 'n diugh a' deanamh uaill,
 Am bothan beag a dhealbh do làmh,
 'S e air a leagadh sìos gu làr ;
 A' mhill, a choisinn thu gu cruaidh,
 A' falbh a' dranndan mu gach bruaich,
 Aig càch a' stigh gu h-ait 'g a h-òl,
 'Us tusa 'muigh gun tigh, gun lòn.

Ach 's lionmhor iad 'tha dheth do sheòrs',
 'Tha 'deanamh uaill á meud an stòir ;
 Bho 'n saothair ghoirt cha ghabh iad tàmh,
 Ag càrnadh suas gun fhios có dha ;
 Bu tric do shìnnair fhéin ri fuaim,
 An cuid 's an ionmhas 'g a thoirt uath' ;
 Rì rùsgadh ghath 's a' tarrainn lann,
 'S an tigh 'g a leagadh sìos mu'n ceann.

Ach mheas mi fhéin—'s e sin mo ghnàths—
 Na 'm faighinn idir cosg an tràth,

Gu 'm b' fheàrr dhomh subhachas 'us ceòl
 An ùine bheag a bhios mi beò,
 No ged a gheibhinn saibhlean làn,
 Gun fhois gun sìochaint air an sgàth,
 Oir 's e mo dhòchas 'us mo chréud
 Gu'm faigh gach latha làn da fhéin."

AN SEILLEAN.

" Ah ! 's duilich leam nach tus' a h-aon
 'Tha 'beathachadh air plaosgan faoin,
 'Tha 'gabhail fasgaidh fodh gach sgleò,
 Le beatha dhiomhanaich mar cheò ;
 An ùin' a' ruith gun mhath gun fheum,
 Cha 'n fhàg iad cliù no ainm 'n an déigh,
 'S cha d' thug iad géill do'n duine ghlic
 A dhearbhadh nach deanar gnìomh fodh 'n lic.

Tha mise mar a bha thu 'g ràdh,
 Bho mhoch gu dubh, bho bheinn gu tràigh ;
 Ach 's iomadh ròs a nì mi 'dheoth'l
 Bho 'm bheil a' mhill an déigh a h-òl ;
 Gidheadh cha 'n fhàs mo mhisneach fann
 A' saothrachadh bho àm gu àm,
 Oir chreid mi riamh—'s i sin an fhìrinn—
 ' Gu 'n tig toradh math á dìchioll'.

Cha robh mi riamh na m' thróm air càch,
 Cha mhò a bhraid no ghoid mo làmh,
 'S cha bhi mo lòn ri m' bheò an éis,
 Ma dh' fhàgar agam mo chuid fhéin ;

Ach ma thig nàmhaid orm gu teann,
 Ma spùinneas e mi fhéin 's mo chlann,
 Cha d' chuir e còmhach riamh mu 'cheann,
 Am fear nach tàrninn ris mo lann.

'Us beag no mór g'am bi ar neart,
 Ma ni sinn leis an ni 'tha ceart ;
 Ar buadhan biodh iad lag no treun,
 Ma chuireas sinn iad sin gu feum—
 Cha tuig thu mar a dh' fhàsas càrn,
 Le clach a thilgeadh ann a ghnàth ;
 'S e braonaibh faoin' a lion an cuan ;
 Is duslach mìn gach beinn mu 'n cuairt.

Dùisg suas, ma ta, 'us tog ort greann,
 Bi saothreach fhad 's a gheibh thu 'n t-àm ;
 Tha samhradh caomh a' falbh 'n a dheann,
 Tha 'n geamhradh gnù a' tarrainn teann,
 Ma mheallar thu an so le bréig,
 Bi cinnteach 'n uair a thig an t-éug,
 Gu 'm bi do chliù 's do dhuais d' a réir
 Bho 'n Ti 'thug beatha do gach cré."

Thug iad greis mar sin air còmhraidh,
 Ged nach robh iad tric ag còrdadh,
 'Us mar a thachair dhuinn gu léir,
 Bha iad car dian 'n am barail fhéin ;
 Ach le dùrachd gheanail spéiseil
 Ghabh iad latha math de chéile,
 Dh' fhalbh an seillean còir 'us srann aig',
 'S theann a' chuileag fhaoi ri dannsa.

SINE CHALUM BHAIN.

AIR FOKN—"Oor Kail-yard."

THA 'n rìbhinn òg is àille cruth
 'S a' bhail' ud thall a' tàmh;
 Tha 'làmh 's a deud cho geal 's an gruth,
 'S a gruaidh mar ròs fodh blàth;
 Bho shàil a buinn gu bàrr a cinn,
 Gu fallain, dìreach, tlàth,
 Mar lilidh fhìnealt', mhaiseach, mhìn,
 Tha Sìne Chalum Bhàin.

Biodh càch an geall 's an gaol air cuid
 Aig am bi crodh 'us bàrr,
 Cha 'n iarr iad buaidh is fheàrr na sud,
 Ma gheibh iad saibhlean làn;
 Ach cha 'n e cuid 'chuir mise 'm bruid,
 'S a thug air falbh mo chàil,
 Ach mar 'tha m' inntinn tróm fodh chis
 Aig Sìne Chalum Bhàin.

Bu ghrinn leam luinneag bhinn a guth
 Air maduinn chiùin 's a' Mhàigh:
 Tha 'cóm cho geal ri eal' an t-sruth,
 'S i cuireadach 'n a gnàths;
 Tha 'sùilean caomh, 's a gàire caoin,
 'Ga m' fhàgail faoin gun stàth—

Cha 'n òr no nì a leòn mo chrìdh',
Ach Sìne Chalum Bhàin.

Ach shuidh mi 'n raoir car fad' a muigh—
Ma shuidh, cha b' ann na m' thàmh;
Bha agam clàr 'us peann 'us dubh,
'S mi 'cur ri deanamh dain;
Na h-eòin le 'm puirt 'g an cluich' gun chruit
Mu uchdanan nan àrd;
'S sheinn mise duanag mhillis bhinn
Do Shìne Chalum Bhàin.

'S e' thuirt mo mhàthair rium an diugh
Gu 'n d' fhalbh mo chruth 's mo bhláth,
Gu 'm feumainn tòiseachadh air fion,
'Us mìos 'thoirt aig an t-sàl;
Ach 's eòl dhomh rud cho math ri sud,
'S a thigeadh rium nì'b' fheàrr,
Na 'm faighinn bothan beag dhomh fhìn
'Us Sìne Chalum Bhàin.

Ach 's eagal leam gu 'm bheil mi cli
'S gu 'n deachaidh m'inntinn ceàrr,
Cha 'n fhaigh mi fois air muir no tìr,
Cha 'n 'eil mi tinn no slàn;
'S cha 'n 'eil ach dithis anns an sgìr
A bheir dhomh sìth gu bràth:
'S e 'n dàra h-aon dhiubh sin a' chill,
No Sìne Chalum Bhàin.

TURUS DHOMHNUILL DO GHLASCHU.

Bho n' bha móran dhe m' chàirdean
 'Gabhail tàmh anns a' bhaile,
 'N uair 'bha crìoch air an àiteach,
 'S a bha 'm bàrr anns an talamh,
 Thug mi *guinea* no dhà leam
 'Bh' aig mo mhàthair am falach ;
 Ghabh mi bàta na smùide
 'Mach gu dùthaich nan Gallach—
 'S cha b' ann gu m' rath.

'N uair a ràinig sinn Glaschu—
 B' e sin baile na h- ùprait,
 Tha de dhaoine 's de dh' eich ann,
 Tha de bhreislich 's de smùid ann—
 Thug mi sùil air mo tharsuinn,
 'S fhuair mi sgailc anns an tionndadh,
 A chuir teas na mo phòraibh,
 'S bàrr mo shròin' air a lùbadh
 Aig garrach glas !

Ach air oidhche Di-haoine—
 Mar bha 'n fhaoineis an dàn dhomh—
 Thachair clann Iain-'Ic-Eachuinn
 Agus mac Aonghais bhàin rium ;

'Us mu 'n deachaidh ar sgaradh
 Rinn sinn searrag a thràghadh,
 'G innse sheanchasan spòrsail,
 Agus òran math Gàidhlig
 Aig fear ma seach.

Sios an t-sràid a' dol dachaidh,
 Bha mi 'faireachadh neònach,
 'S mi mar bhó air a h-aineol,
 Ann am baile nach b' eòl dhomh—
 Ach a null chum na h- uinneig,
 Thàinig cruinneag na m' chòmhdhail,
 'S thuirt i 'm Beurla chiùin shuairce,
 “ 'S fhad 'o 'n uair sin, a Dhòmhnuaill,
 Nach dean thu stad ” ?

Thug mi sùil oirr' gu duineil
 Sios bho 'mullach gu 'brògan ;
 'S bheirinn m' fhacal dhuibh uile
 Nach robh uireasbhuidh neòil oirr' ;
 Bha 'sùil gorm mar an dearcag,
 Fodh 'mìn mhala chaoin, chòmhnaird,
 'Us bha 'bilean 's a gruaidhean
 Cho glan snuadh ris na ròsan
 Air bhàrr nan slat.

Thuirt i rium gu'm b'e 'chòir dhuinn
 Dol do sheòmar nan uinneag,
 Gu'n robh cluich' agus ceòl ann,
 Gu'n robh òl ann 'us iomairt,

Gu'n robh maighdeannan òg' a
 Dheth gach seòrs' agus cinneadh,
 Agus taghadh nan òigfhear—
 “'S bidh tu 'Dhòmhnuill air mhire
 Mu'n tig thu as.”

'N uair a ràinig mi 'n cala,
 Cha b'e talla nan uaislean :
 Bha aon chóig no sea ' bhalaich
 Agus caile thiugh ruadh ann ;
 Iad ri mionnan 's ri bòileich,
 Agus còmhradh gun tuaiream—
 Bheirinn fàsgadh air sgòrnan
 Na té neònaich 'thug suas mi,
 Na 'm biodh i 'mach.

Dh' iarr mi stòp no dhà drama,
 'Dh' fheuch am fanadh iad sàmhach,
 Bho n' bha toil agam m' anam
 Fhaotainn glan às an làmhan ;
 Thug mi làmh air mo sporan,
 Gus an dolaidh a phàidheadh—
 'S am fear ud, sporan no airgiod
 Nach do dh' fhalbh leis na meàirleich
 A rinn mo shlad !

Thug mi leum na mo sheasamh,
 Agus breab air an ùrlar :
 'S thuirt mi riutha gun cheasad
 Gur e peasan dhiubh 'spùinn mi ;

Iad a chàradh na m' dhòrn-se
 Na bha 'm phòca de chùineadh,
 No gu'm prannainn fodh m' mheòirean
 Eadar fheòil agus rùsg iad
 Le fear ma seach.

Dh' éirich leóbaire lachdunn,
 Agus ghlac e mo sgòrnan ;
 Thuirt e rium mi 'dhol dachaidh,
 No gu'n tachdadh e beò mi—
 Cha do dh' éisd mi 'n t-ath fhacal,
 Thug mi racaid mu'n t-sròin da,
 Thuit e 'null mu na poitean
 A bha 'n oisinn an t-seòmair,
 'Us rinn e glag.

Chaidh an talla gu tuasaid,
 'Us gu gruagan a tharruing ;
 Cha robh claigionn gun spuaic air,
 'S cha robh gruaidh gun a prannadh :
 Mis' a' slachdadh mu 'n cuairt domh
 Le mo chuaile math daraich,
 'G an cruaidh iomain 's na cùltean,
 'Us an driùchd air am malaidh,
 'S cha robh i glan.

Ann am meadhon na h-ùprait,
 Thàinig diùlnach no dhà oirn,
 Iad 'n an ruith gu ar n-ionnsuidh
 Le 'n cuid chrùisgean a' deàrsadh ;

Thug iad stràchd dhomh de bhata
 Urad slachdain buntàta ;
 'S 'n uair a thàinig mo thùr dhomh,
 Bha mo dhùirn aig na gàrlaich
 Gu teann fodh ghlais.

Chuir mi 'n oidhche sin tharam
 Ann an talla nam meàirleach ;
 'S thug iad suas mi 's a' mhaduinn,
 Chum 's gu 'm faicinn am Bàilidh ;
 'N uair a chual' e mo cheannaire
 Cha b' ann geanail a bha e—
 “ Bheir sinn mìos dhut de 'n phrìson,
 No thig trì puinnnd de chàin uat,
 Mo ghille math.”

'N uair a theann iad ri falbh leam—
 Aig an t-Sealbh tha fios c' àite—
 Thàinig Murchadh mac Fhearghuis,
 Agus Tarmod mo bhràthair ;
 'N uair 'phàidh iadsan an t-airgiod,
 Chaidh mo theanachdsa bho 'n ghràisg ud—
 Chuir mi tein' as an ùrlar,
 Agus smùid bho mo shàilean
 A' tàrsainn as.

Chuirinn impidh gun sòradh,
 Air gach Dòmhnall 's a' bhaile,
 Gun e 'lùbadh le gòraig
 A bhiodh bòidheach 'n a shealladh ;

Ged is milis an còmhradh,
 Tha ciad fòtus fodh 'n earradh,
 'S math 'tha fios aig mo phòca
 'S far 'n do sgròb iad mo mhala,
 Gu 'm bheil sin ceart.



AM FAIGH A' GHÀIDHLIG BAS?

Tha móran sluaigh a'm beachd an diugh
 Nach 'eil ar cànan slàn,
 Nach fhad' a chluinnear fuaim a guth,
 Nach téid i 'chaoidh ni's fheàrr;
 Gu'm bheil an aont' a bh' aic' air ruith,
 Nach tog i ceann gu bràth;
 'S a dh'aindeoin buaidh Mhic-'Ille-Dhuibh,
 Gu'm faigh a' Ghàidhlig bàs.

Tha siol nan sonn 'g an cur air chùl,
 'S am fearann 'g a chur fàs;
 Tha féidh us caoirich air gach stùc
 Mu 'n robh na laoich a' tàmh;
 Tha cinneach eil' air teachd do'n ùir,
 'S ag éiridh suas 'n an àit',
 'Tha 'toirt am bòidean air gach dùil
 Gu 'm faigh a' Ghàidhlig bàs.

An leig sinn eachdraidh chaomh ar tìr'
 A sgrìobadh de gach clàr,
 'S a' Ghàidhlig chòir a chur a dhìth
 Le linn nach tuig a gnàths?
 An cànan aosda, glòrmhor, binn,
 A dhùisgeadh fuinn nam Bàrd,
 Am fan sinn diomhanach gun suim
 Us daoì 'g a cur gu bàs?

Dùisg suas, a Ghàidhlig, 's tog do ghuth,
 Na biodh ort geilt no sgàig;
 Tha ciadan mìle dìleas duit
 Nach dìobair thu 's a' bhlàr;
 Cho fad' 's a shiùbhlas uillt le sruth,
 'S a bhuaileas tuinn air tràigh,
 Cha 'n aontaich iad a'n cainnt no 'n cruth
 Gu 'n téid do chur gu bàs.

A' chainnt a dh'fhoillsich cliù nam Fiann,
 'S an gaisgeadh dian 's gach càs;
 Tha'n euchdan iomraiteach bho chian
 Ag àrach miann 'n an àl;
 Na leómhainn threun' nach d'thug le fianh
 An cùlthaobh riamh do nàmh,
 Tha iomadh gleann, us cnoc, us sliabh,
 A' luaidh air gnìomh an làmh.

Cha'n eòl dhuinn ceàrn an ear, no 'n iar,
 No fonn mu 'n iath an sàl,
 Nach fhaighear cuid an sin dhe 'n siol
 A' liadachadh 's a' fàs,
 'Tha 'g altrum suas, le dùrachd dhian,
 Gach sgialachd agus dàn
 A bhiodh an sinnsirean a' sniomh
 'An tìr nan sliabh 's nam bàgh.

Ach 's geàrr a bhios an ùin' a' triall
 Gu 'm faic sinn, mar is àill,
 A' Ghàidhlig mùirneach, mar ar miann,
 'An cathair inbheich, àird,

A' sgaoileadh eòlais, tuigse, 's ciall
 Bho 'h-ionmhasan nach tràigh ;
 'S a' taisbeanadh le neart a rian
 Nach téid i 'n cian so bàs.

'N sin togaidh i le buaidh a ceann,
 Le aoibhneas ni i gàir',
 A teudan gleusaidh i gu teann
 Le cridhe taingeil, làn ;
 Gu'n cluinn mac-talla feadh nan gleann
 Gach doire 's allt 'cur fàilt',
 'S an osag chiùin air bhàrr nam beann
 Ag giùlan fonn a dàin.

Ach buaidh 'us piseach air na laoich
 'Tha seasmhach air a sgàth,
 'Chaidh àrach ann an tìr an fhraoich,
 Ge sgaoilt' an diugh an àl ;
 Ged 'chaidh an sgapadh air gach taobh,
 Cha chaochail iad an gnàths,
 Cha'n fhàs an eachdraidh lag le aois,
 'S cha'n fhaigh a' Ghàidhlig bàs.

MAIRI BHAIL' A' CHRO.

AIR FOKN—"O' a' the airts."

AIR latha dhomh 's mi 'falbh nan àrd,
 Ait' àraich fir na cròic',
 Gu 'n d' chaill mi m' iùl air feadh nam màin
 Le bàrcadh tróm de cheò ;
 Bha 'n oidhche dhorecha 'tarruinn teann,
 'S mo chridhe fann gun treòir,
 'N uair 'thachair rium a' ghruagach bhàn
 Air àiridh Bhail' a' chrò.

'Us thug i cuireadh dhomh gun dàil
 Gu 'fàrdaich bhig gun sgòd,
 'Us thuirt i rium mi 'dheanamh tàmh
 Gu 'n sgaoil an là na neòil ;
 Gu 'm faighinn leabaidh thioram bhlàth
 De bharrach àluinn òg,
 Gu 'm faighinn biadh 'us deoch 'us baigh
 Air àiridh Bhail' a' chrò.

Is lionmhor ròs 'tha 'fàs fodh 'n driùchd
 Nach fhaca sùil an glòir,
 Is lionmhor maighdeann mhaiseach chiùin
 Nach deach' a cliù 'an ceòl ;

Ach riamh cha d' fhosgail ròs fodh dhriúchd
 No òigh 'an cùirt 's an Eòrp',
 Cho finealt' ann an cruth 's am blàth
 Ri Màiri Bhail' a' chrò.

Ge d' bheireadh baintighearna dhomh 'làmh,
 Le saibhlean làn a dh' òr,
 Gur lionmhor buaireas agus cràdh
 'Tha 'n càradh ris an t-seòrs';
 Gu 'm b' anns' a bhi air chosg an tràth
 Le sith 'us gràdh 'n a chòir,
 'An gleann nan cuach, 's a' ruith nam bà,
 Le Màiri Bhail' a' chrò.

'N nair 'théid i 'mach 's a' mhaduinn chaoin,
 Gu fallain, aotrom, beò,
 S a ghléusas i a duanag ghaoil
 'An doire maoth nan cnò.
 Bidh eòin nan géug a' seinn do 'n àl
 Gu h-ait air bhàrr nam meòir,
 Ach éisdidh iad 's an cinn fodh sgàil
 Ri Màiri Bhail' a' chrò.

Tha 'sùilean iochdmhor, baintidh, ciùin,
 Ag innse 'rùin gun ghò,
 Tha 'ceum neo-thróm 's a cruth gun smùr,
 Gun mheang, gun lùb, gun leòn,
 Tha mais' 'us naire 'snàmh 'n a gruaidh,
 Gun fhoill, gun uaill 'n a dòigh,
 Mar lilidh mhìn a' fàs le buaidh
 Aig fuaran Bhail' a' chrò.

Mo shoiridh slàn gu 'n robh gu bràth
 'N a fàrdaich 'us 'n a stòr !
 Tha 'h-lomhaigh ghràidh na m' chuimhne 'ghnàth,
 'Us briathran blàth' a beòil,
 Bidh m' aigne làn de ghaol nach cnàmh
 Gu 'n càirear mi fodh 'n fhòd,
 Do 'n ghruagaich bhàin a dhùisg mo dhàn
 Air àiridh Bhail' a' chrò.



DUANAG DO BHELLAIG.

AIR FOKN—" *Och mar 'tha mi 's mi na m' aonar.*"

'Fhir a shiùbhlas a null gu m' dhùthaich,
Thoir leat mo dhùrachd 'us fàg 's an t-Stròm e ;
Ma chì thu 'ghruagach a ghoid mo shuaimhneas,
'S a rinn mo bhuaireadh le snuadh a bòichead.

Ma chì thu caileag ri 'n can iad Bellag,
Aig bial Lochcarron 'tha 'gabhail còmhnuidh,
Ma gheibh thu sealladh dhe 'sùilean meallaidh,
Tha mis' am mearachd mur 'toir iad leòn dhut.

Tha iochd 'us càirdeas 'n a gnùis 'tha bàigheil,
'S a gruidh cho àillidh ri blàth nan ròsan,
Tha fiamh a gàire mar ghrian a' deàrsadh,
'Cur saighdean gràidh ann an càil gach oigfheir.

Tha fiamh a cuailean 's e sios mu 'guaillean,
Air sniomh 'n a dhualan 'us tuar an òir air,
Tha 'cóm cho uallach 's a ceum cho guanach,
'S gu 'n d' thug i uamsa mo shnuadh 's mo shòlas.

Ge binn an smeòrach 's a' mhaduinn chéitein,
A' seinn gu h-éibhinn air bhàrr nan ògan,
Gur 'binne leamsa mo chruinneag ghaolach,
Le 'luinneig chaoin ri mo thaobh 's an t-seòmar.

'S ann leam a b' éibhinn a bhi 'g a h-éisdeachd,
 'Us fuaim nan teudan a' leum fodh 'medìrean,
 Ged 'bhithinn deurach 's air bheagan spéirid,
 Chuireadh a beusan gach beud air fògradh.

'Us ge b' e céile a ni do bhuannachd,
 Gheibh e duais leat nach ceannaich òr dha,
 Gheibh e ciùine le mùirn 'us stuamachd,
 'Us maighdeann shuairce gun uaill gun ghòraich'.

Ach 's e mo dhùrachd nach fhaigh thu ùmbaidh,
 No fear nach cunntar am measg nan còmhlan,
 Ach òigfhear uasal 'bhios fearail buadhach,
 'Bheir sonas buan dhut 'n uair 'ni thu pòsadh.



FAILTE DO 'N EILEAN SGIATHANACH.

O, fàilt' air do stùcan,
 Do choireachan ùdlaidh,
 Do bheanntannean sùghmhor,
 Far an siùbhlach am meann !
 Tha 'n geamhradh le 'dhùbhlachd
 Mu na meallaibh a' dùnadh,
 'S gach doire le 'bhùirean
 Air a rùsgadh gu bonn.

Chi mi Cuchuilinn
 Mar leóghann gun tioma,
 Le 'fhiasaig de 'n t-sneachd
 Air a pasgadh m' a cheann ;
 'S a ghruaidhean a' srùladh
 Le easanan smùideach
 'Tha 'tuiteam 'n an lùban
 Gu ùrlar nan gleann.

Do chreagan gu h-uaibhreach,
 Mar challaid mu 'n cuairt dhut,
 'S na neòil air an iomairt,
 A' filleadh mu 'm bàrr ;
 'S am bonn air a sguabadh
 Le srùlaichean gruamach
 Bho bhàrcadh a' chuain
 A' toirt nuallain air tràigh.

O ! c' àit' 'eil na gaisgeich
 A dh' àraich do ghlacan,
 'Bu shuilbhire macnus
 Mu stacan a' cheò?
 Le fùdar 'g a sgailceadh
 Bho 'n cuilbheirean glana,
 'S am mial-choin 'n an deannaibh,
 Nach fannaich 's an tòir.

Na laoich nach robh meata
 Ri aodann a' bhatail,
 Nach aomadh gu taise
 Ri caismeachd an nàmh ;
 Cha 'n 'eil raon agus machair
 Air 'n do sgaoil iad am bratach
 Nach d' fhàg iad an eachdraidh
 Gun mhasladh do 'n àl.

Ach tha 'm fàrdaichean sguuibte,
 'S an seòmraichean uaine,
 Iad fhéin 'us an gaisge
 'N an cadal fodh 'n fhòd ;
 'S tha osag nam fuar-bheann,
 Le 'h-osnaidhean gruamach,
 'G an caoidh mu na cruachan,
 'S a' luaidh air an glòir.

O ! c' àit' 'eil gach sòlas
 'Bha agam na m' òige
 'Toirt meal' as na ròsan
 Mu d' chòsagan tlàth?

Tha companaich m' eòlais
 Air am fuadach bho 'n còmhnuidh,
 Tha 'mhil air a deoth'l
 'S tha 'n ròsan gun bhlàth.

Ach 's caomh leam do ghleanntan,
 Do shrathan 's do bheanntan,
 'S an ceò tha 'n a chadal
 Air baideal nan àrd,
 Na ciabhagan torach,
 Na srònagan corrach,
 'S na sruthain ri coireal
 Do 'n eilid 's d' a h-àl.

Gu ma buan a bhios d' eachdraidh,
 Agus cliù aig do mhacaibh,
 Gus an crìonar an talamh,
 'S am paisgear na neoil!
 Fhad 's 'bhios sioban na mara
 A' bualadh air carraig,
 Bidh mo dhùrachd gun deireas
 Do dh-Eilean a' cheò!

FAILTE DO'N BHLIADHN'-UIR.

Fàilte 's furan do'n bhliadhn'-ùir,
 Le 'trusgan geal is sunntach greann,
 'Dhùisgeas aiteas anns gach gnùis,
 A sgaoileas fleadh mu bhùird le fonn.
 Ged nach fhaigh sinn a bhi dlùth
 Do 'r luchd-comuinn rùn 's an àm,
 'S e 'chiad làn a théid 's a' chuaich :—
 Slàinte bhuan do Tìr nam beann.

'Tàmh 'am baile-mór nan tùr,
 Cha bu dùthchas dhuinn 'bhi ann,
 Far nach fhaic sinn fiadh air stùc,
 No bradan ùr 'g a thoirt á allt ;
 Far nach cluinn sinn pìob air chuain,
 No gillean-callainn shuas an gleann—
 Ach cuiridh sinn mu 'n cuairt a' chuach,
 'Dianamh luaidh air Tìr nam beann.

Tìr a' mhànrain, tìr a' chiùil,
 Tìr nam fùran nach robh fann ;
 Ged 'tha 'n slìochd 'g an cur air chùl
 'Dhianamh ruim do chlann nan Gall—
 'S iomadh fàrdach 'tha gun smùid,
 Far 'm bu shiùbhlach fonn nan rann ;
 Ach bidh an aigne blàth gach uair
 'Ni iad luaidh air Tìr nam beann.

Saoghal fada, maoin, 'us cliù,
 Do'r luchd-dùthcha 'bhos 'us thall ;
 Dòirteadh beannachdan mar dhriùchd,
 Gach bliadhn'-ùr 'thig air an ceann.
 Ged a sgaradh sinn ri luaths,
 Bidh ar càirdeas buan 's gach àm ;
 'S òlaidh sinn le caithream chruaidh,
 Làn na cuaich' air Tìr nam beann.



DUANAG AN T-SEOLADAIR.

AIR FOSN—" *Eirich agus tiugainn O.*"

Gu ma slàn do 'n rìbhinn òig,
 'Tha 'tàmh 'an eilean gorm an fheòir,
 'S e' dh' fhàg mo chridhe tróm fodh leòn
 Nach fhaod mi 'n còmhnuidh fuireach leat.

An àm dhuinn dealachadh Di-màirt,
 Gun fhios an tachair sinn gu bràth,
 Gu 'n d' iarr mi gealladh air mo ghràdh,
 'S a làmh gu 'm biodh i 'fuireach rium.

Sheall i orm gu h-ìochdmhor, caoin,
 'S na deòir a' ruith bho 'sùilean maoth,
 Gu 'n d' chuir e saighead gheur na m' thaobh,
 An gaol a thug mo chruinneag dhomh.

Tha 'n fhairge 'g éiridh suas 'n a smùid,
 'Us mise 'n ceangal aig an stiùir ;
 Ach chuir e spionnadh ùr na m' dhùirn,
 An rùn a thug mo chruinneag dhomh.

Shiùbhlainn deas 'us shiùbhlainn tuath,
 Dh' fhuilinginn acras agus fuachd,
 'S cha ghearanainn air smùid a' chuain
 Na 'm buanaichinn a' chruinneag ud.

Thug i 'dealbh dhomh air an tràigh,
 'Us dualan mìn dhe 'cuailean bàn,
 Tha sin ag cur na m' chuimhne 'ghnàth
 An gràdh a thug mo chruinneag dhomh.

'N uair 'bhios ise tróm 'n a suain,
 Bidh mis' air bhàrr nan crannag shuas,
 A' pasgadh sheòl, 's a' seinn mo dhuain,
 Mu 'n luaidh a thug mo chruinneag dhomh.

'S tric mi 'cuimhneachadh le spéis,
 'N uair 'bha sinn ann an gleann nan geug,
 Na h-uile gòraiche gun chéill
 A rinn mi-fhéin 's mo chruinneag ann.

'S ged 'tha mi 'n so air bhàrr nan sion,
 A' sabaid ris a' Chuan-an-iar,
 Cha bhi mi 'cuimhneachadh mo dhiol,
 'N uair 'ni Catriona furan rium.

Ach thus', a ghaoth, 'tha 'dol gu tuath,
 Thoir leat an t-soiridh so gu m' luaidh,
 'Us innis dhi, ma bhios sinn buan,
 Nach caill i 'duais ri fuireach rium.

CUAIRT DO CHUITHRAING.

AIR togail oirnn dhuinn 'am Portrigh,
 (Oir bha sinn ann a dhà no trì,)
 'N uair a dh' fhalbh sinn cha b' ann cearbach—
 Fhuair sinn glaine mhath bho Fhearchar.
 A' dìreadh suas ri uchd Dhruimaoidh,
 Bha teas 'us pathadh tróm 'g ar claidh ;
 Ach chum sinn oirnn ri cainnt 's ri broighleach
 Gu 'n d' ràinig sinn Ceann-sail-oighre.
 'Us fhuair sinn Coinneach air a dhòigh,
 'S a shearrag làn aig' air a' bhòrd ;
 Thug e dhuinn—'s e fhéin nach sòradh—
 Làn na cuaich' de “ Mhac-an-tòisich ”.
 'N uair a ràinig sinn Tigh Ùige
 Bha ar casan sgèth 'us brùite ;
 Ach cha do thàmh sinn fada 'n éis
 'N uair 'chaidh Seumas ruadh air ghleus,
 Ged 'ruitheadh tu air gach tigh-òsd',
 'Tha eadar so 'us Tigh-Iain-Ghròt,
 Bheir mise m' fhacal dhut 's mo bhòid,
 Nach fhaigh thu diùlnach ris cho còir.
 Ghabh sinn cuach de 'n Ileach blàth,
 A' dhùisg ar neart 's a rùisg ar càil,
 'Us lion sinn màlaid mhath de lòn
 A' chumadh spionnadh ruinn 's an ròd.

Gu sunntach ghabh sinn suas an gleann,
 Ag aithris sgeul 's ag gabhail rann,
 'S 'n uair 'bhiodh ar cridh' a' fàs car fann
 Bheireamaid fideag air an dràm.
 Ach ràinig sinn mu dheireadh thall,
 Ged 'bha cuid againn car mall ;
 'Us dhearbh gach bruaich, 'us cuairt, 'us staing,
 Gu 'n robh sinn dlùth air bial Chuithraing.
 Bha aon fhear dhinn a bha 'n a Ghall,
 'S an uair a sheall e 'null 's a nall,
 'N uair 'chunnaic e gach coire 's gleann,
 'N uair 'chunnaic e gach màin 'us meall,
 'N uair 'chunnaic e gach creag 'us sgriob
 'Bha 'toirt nan speur dheth os a chinn,
 'N sin ghlaodh e mach le briathran fann,
 Gu 'n d' thàinig ceòl 'us neul 'n a cheann ;
 Ach " mac-na-braich'," an gille còir,
 Cho luath 's a rinn e cuach dheth òl,
 Thug sin a chruth 's a chridhe beò,
 'Us lean e sinn 's cha b' ann dhe 'dheòin,
 Ach e' àit' 'eil bàrd no e' àit' 'eil cainnt,
 A dh' innseas cliù no dealbh Chuithraing
 Le 'chreagan gruamach, uaibhreach, àrd',
 'S na neòil ag iomairt shuas mu 'm bàrr,
 'Thug dùbhlàn do gach geamhradh garg
 An neart a chrith no 'n cóim a shearg,
 A chum am bathais chruaidh gun fhiamh
 Ri aghaidh sion nam mìltean bliadhn' ?
 Gach glac, 'us stac, 'us bac, 'us tòm,
 Tha 'cumail fasgaidh shios mu 'bhonn,

Gach baile 'us faire 'tha 'n taic a chléibh,
 Cha 'n urrainn dhòmhs' an cur an céill ;
 Ach có le cridhe beò 'n a chóm,
 'S a shùilean fosgailte 'n a cheann,
 Nach irislicheadh sios e fhéin,
 Ri aghaidh glòir an Ughdair thréin
 A ghairm an sealladh so mu 'n cuairt,
 Le guth a bheòil bho neo-ni suas ;
 A chruthaich nèamh, 'us fonn, 'us cuan,
 'S a shuidhich iad le 'reachd bith-bhuan ?
 Mu dheireadh ràinig sinn am bòrd,
 'Us shuidh sinn sios aige gu stòld',
 B' e sin am bòrd nach iarr an saor,
 'S nach searg air falbh gu bràth le aois,
 Le 'chuibhreach finealt' maiseach feòir,
 'S an driùchd a' dealradh air mar òr.
 Tha linn a' teachd, 's tha linn a' triall,
 'S tha 'm bòrd so 'n diugh mar 'bha e riamh.
 Ach thus', a leughadair mo dhuain,
 Ma 's e 's gu 'm bi do shaoghal buan,
 Ma thig thu 'nall an so air chuairt,
 Théid mis' an urras air do dhuais ;
 Cha ghabh thu aithreachas gu bràth
 Gu 'n d' thàinig thu cho fad' air sàl,
 Oir b' fhiach dhut coiseachd as an Fhraing
 A dh' fhaicinn ioghnaidhean Chuithraing.
 Mu 'n sgithich mi sibh le mo rann,
 'S fheàrr dhomh 'chrìochnachadh 'n a àm,
 Ach sin agad le cainnt gun sgleò,
 Mar 'chaidh a' chuairt le Niall Macleòid.

MO DHOMHNULLAN FHEIN.

AIR FOKN—" *The Flower of Dunblane* ".

'N UAIR 'chruinn'cheas an òigridh
 Gu mire 's gu sòlas,
 Bidh mise na m' ònar
 'S an t-seòmar gun ghleus ;
 Ag cuimhneachadh còmhraidh
 An fhleasgaich a leòn mi,
 'S an gaol 'thug mi òg do
 Mo Dhòmhnullan fhéin.

Tha m' athair 's mo mhàthair
 Ri gearan 's ri cànrán,
 'S ag cantainn nach fheàrr mi
 Na pàisde gun chéill,
 Mo ghaol 'thoirt a dh' òigfhear
 'Tha daonnan a' seòladh,
 'S a sgaoileas a stòras
 Gun ghò ris gach té.

Ged 'gheibhinn fear chruachan
 Le pailteas mu 'n cuairt da,
 Gun toirt aig an t-sluagh dheth,
 Gun suairceas 'n a ghnè ;

Ciod e 'ni e dhòmhsa
 Na chunntadh e ' dh' òr dhomh,
 'S mo chridhe le deòin aig
 Mo Dhòmhnnullan fhéin ?

Tha bliadhn' agus còrr bho
 Na thriall e bho 'eòlas,
 'S tha 'ìomhaigh cho beò dhomh
 'S ged 'sheòladh e 'n dé ;
 Cha ghéill mi do dh' òigfhear,
 'S cha tréig mi na bòidean
 A sheulaich mi òg do
 Mo Dhòmhnnullan fhéin.

Tha dualagan bòidheach
 Dhe 'chuailean na m' phòca,
 'S a dhealbh air a chòmhdach
 Le òr ann an céis ;
 Tha 'shùilean cho beò ann,
 'S a ghruaidh mar na ròsan,
 Ag ùrachadh dhòmhsa
 Mo Dhòmhnnullain fhéin.

'N uair 'thachradh an còmhlan
 'S a' chlachan Di-dòmhnach,
 'N am measg cha robh òigfhear
 Cho còmhnard 'n a cheum ;
 Cho beusach 'n a chòmhradh,
 Cho fearail 'n a dhòighean,
 Bhiodh sùil aig gach òigh air
 Mo Dhòmhnnullan fhéin.

Gu 'm b' òg 'bha sinn còmhladh
 'An doire na smeòirich,
 'S an dubhar 'g ar còmhach
 Fodh spògan nan géug ;
 A' tional nan neòinean,
 Gu h-inntinneach ceòlmhor,
 Ri briodal gun ghò le
 Mo Dhòmhnallan fhéin.

'N uair 'dh' éireas na cuantan,
 A' beucail le buaireas,
 Na neòil air an ruagadh,
 'Us gruaim air an speur,
 Bidh mise na m' ghòraig
 Ag éisdachd an còmhraig,
 'S mo chridhe 'g a leòn mu
 Mo Dhòmhnallan fhéin,

Am Freasdal 'bhi 'stiùireadh
 Nan gaathan le ciùine,
 'S ag còmhnaidh mo rùin anns
 Gach dùthaich 'us ceum ;
 'G a dhion 'us 'g a sheòladh
 Gu 'm pill e gu 'eòlas—
 Gur mi 'dheanadh sòlas
 Ri m' Dhòmhnallan fhéin.

Ach mar 'till e gu m' ionnsuidh,
 Gur mise 'bhios tùrsach ;
 Gu 'n càirear fodh 'n ùir mi
 Cha mhùch mi mo spéis ;

Cha taobh mi ri òigfhear
'S cha chaochail na bòidean,
'S an gaol 'thug mi òg do
Mo Dhòmhnallan fhéin.



'Bheil neach le cridhe beò 'n a chóm
 An diugh ag còmhnuidh ann ar fonn,
 'Tha 'deanamh tàir' air cainnt nan sonn
 A 's cliùiteach eachdraidh,
 Siol nan àrmunn blàthmhor tróm
 A cheannsaich feachdan?

'Bheil neach a dh' àraich tìr an fhraoich
 Air call a bhàigh 's air fàs cho faoin,
 Rì tàir' air cainnt a mhàthar chaoimh
 'S nach taobh a reachdan?
 Ach gheibh iad sin an duais gu daor,
 Mur ' caochail *Blackie*.

Ach sibhs' air fad, a shiol nan rann,
 Nach 'eil fodh smachd aig clann nan Gall,
 Glachdaibh an sruth, 's e so an t-àm,
 Cuir suas a' bhratach,
 Tha brod a' ghaisgeich air bhur ceann,
 Professor Blackie.

Na fàgaibh tigh de 'm faic sibh smùid,
 No duine beò a chì bhur sùil,
 Bho Thigh-Iain-Ghròt gu Cluaidh nan lùb
 Nach tog sibh creach dheth,
 Gu 'm faigh sibh na deich mìle punnd
 'Tha'dhìth air *Blackie*.

'N sin théid bhur n-eachdraidh 'us bhur n-euchd
 Air feadh gach linn a thig 'n 'ur déigh;

Bidh glòir nam bàrd air ceòl nan teud
 Gu réidh 'n 'ur glacaibh ;
 'S a' Ghàidhlig aosd' le 'maoin gun éis
 Ag gleus bhur macaibh.

'S 'n uair 'théid a' Ghàidhlig a chur suas
 Air cathair inbheich mar bu dual,
 'N sin òlaidh sinn dà làn na cuaich'—
 'S cha bhi iad lapach—
 Air slàint' an laoich a thug a' bhuaidh,
 Professor Blackie.



BEANNACHADH LEANNAIN.

Rinneadh an rann so mar fhreagairt do rann a rinn ministir àraidh a' beannachadh a leannain. Tha ise anns an rann so 'g a bheannachadh-san air ais.

BEANNAICH thus', a Rìgh na cruinne,
 An t-Urramach Maigh'stir Dùghall,
 Dòirt a nuas bho dhriùchd nan speur air
 Na chumas a gheugan sùghmhor—
 Dh' fhairich mise brìgh 'n a bheannachd,
 'Sgaoileadh tharam mar ol-ungaidh—
 Na feartan, nach fhaod mi 'àicheadh,
 'Thainig orm le blàths bho 'dhùrachd :
 Cha 'n 'eil ball na m' cholainn uile,
 Bho mo mhullach gu mo lùdaig,
 Nach 'eil cho ùrail ri duilleig
 Riamh bho ghuidh e leam 'n a ùrnuigh—
 Beannaich e gach moch Di-dòmhaich,
 Bi 'dol còmhla ris do 'n chùbaid ;
 Beannaich e fodh 'aid 's fodh 'chleòca,
 'S an treud gòrach 'tha fodh 'chùram.
 Thoir dha gliocas glan gun fhòtus
 Gu bhi 'g an seòladh do d'ionnsuidh,
 'S ag àrach gach meanglan breòite
 'Tha fodh iomadh leòn air lùbadh.
 Ach O ! dion e bho gach buaireadh
 A tha buailteach do gach dùilidh,

Gu h-àraid bho shùil nan gruagach,
 'Tha 'n an saighdean luaineach sùgraidh ;
 'S 'n uair a bhios am muineil gheala
 'S am bilean meala 'g a dhùsgadh,
 Mu 'm bi 'inntinn air a truailleadh,
 Sgaoil do bhrat gu luath mu 'shùilean.
 Cum bho 'shealladh an sùil lurach,
 'S an calpannan cruinne dùmhail,
 'S an cìochan gucagach soluis
 A dh' fhaodadh a chogais a mhùchadh.
 Na leig gu bràth e as do shealladh,
 Cum gu caithriseach 'n a dhùisg e,
 Air eagal gu 'n caill e 'chòta
 'G iarraidh phògan anns na cùilean.



O R A N.

AIR FOKK—“*Duanag a' Chìobair.*”

GED 'tha mis' an Dunéideann
 Ann an comunn luchd Beurla,
 Cha 'n 'eil m' inntinn ag éirigh ri 'n dòigh,
 Cha 'n 'eil m' inntinn, &c.

'S ann 'tha m' aigne 's mo dhùrachd
 Ann an eilean nan stùc-bheann,
 Far an éisdinn ri crùnluath an èòin.
 Far an éisdinn, &c.

Bhiodh an smeòrach gu sùrdail
 Air na meanganan sùghmhor,
 Anns a' mhaduinn 'g ar dùsgadh le 'ceòl.
 Anns a' mhaduinn, &c.

Leam a b' ait a bhi 'sùgradh
 Mu na glacagan cùbhraidh,
 'N uair a sgaoileadh an driùchd air na lòn.
 'N uair a sgaoileadh, &c.

'Measg nan cruinneagan guanach
 'Tha gun mhealladh gun truailleadh,
 'S 'tha gu faireachail suairce 'n an dòigh.
 'S 'tha gu faireachail, &c.

Leam bu mhiann 'bhi 'g an éisdeachd
 Aig an eadradh 's a' chéitein,
 'N àm 'bhi 'tional na spréidhe do 'n chrò.
 'N àm 'bhi 'tional, &c.

Iad le 'n cuaileanan dualach
 Air an sgaoileadh mu 'n guaillean ;
 Bhiodh an cuman 's a' bhuarach 'n an dòrn.
 Bhiodh an cuman, &c.



COINNEACH ODHAR.

Rinneadh an rann so mar fhreagairt do cheist a chuir-eadh 's an "*Ard-Albannach*" le "Coinneach Dubh," a' feòrach an robh neach ann a b' urrainn inuse dha am bu bhàs nàdurra a fhuair Coinneach Odhar, no e' uin, no e' àit' an do bhàsaich e?

CHUIR Coinneach dubh fios gu 'chàirdean
 Eadar gleann, 'us bàgh, 'us bogha,
 'N toir a h-aon diubh fios gun dàil dha
 C' uin a bhàsaich Coinneach Odhar?
 An deachaidh a losgadh? no 'bhàthadh?
 No 'fhàgail a mach air todhar?
 An deachaidh a chrochadh? no 'chéusadh?
 No an d' eug e 'g eubhach cobhair?
 B' aithne dhòmhsa bodach ròmach
 A bha eòlach air sean ghobha
 'Chunnaic e 'm feasgar a dh' fhalbh e,
 'S gun e balbh, no dall, no bodhar;
 Gréim aig' air cloich ghil na fàisneachd,
 'G a fàsgadh cho teann ri glomhar,
 'S 'n uair 'thug e aiste na bh' innte
 Thilg e i thar tuinn Loch-lomhair.
 Bhòidich e 'n sin, 'n a éisdeachd,
 Air na speuran, 's air an domhain,
 Nach faicte sealladh gu bràth dhi,
 Gus an tràghadh iad Loch-lomhair.

'S ann anmoch feasgar Di-ciadain,
 'N uair a bha 'ghrian a' dol fodha,
 Mu 'n bhliadhna sin seachd-ceud-deug, a
 Rug an t-eug air Coinneach Odhar.
 'S tha 'luath 'n a cadal bho 'n tràth sin
 Faisg air bràighe Allt-an-t-sobhail,
 Ann an clachan beàrnach frògach
 Nach modha na crò nan gobhar.
 Ma théid "Coinneach Dubh" gu bràth a
 Null gu àiridhean Shrath-Freothair,
 Seallaidh iad gu saor dha 'n t-àite
 'S an do smàladh Coinneach Odhar.



FAILT' A' PHAIPÉIR GHÀIDHLIG.

Rinneadh an rann so air son a' chiad àireamh de Phaipeir Gàidhlig a thàinig a mach an déigh dha 'bhi car ùine air deireadh.

MILE fàilt' air clann mo dhùthcha—
 Tir nam beann, nan gleann, 's nam fiùran
 Do 'm bu dual 'bhi buadhach cliùiteach
 'N àm nan arm a bhi 'g an rùsgadh ;
 An cinneadh rìoghail duineil treun
 A dh' fhàg an eachdraidh glan 'n an déigh,
 Nach d' thug an cùlthaobh riamh do n' bhlàr,
 Gu 'm biodh iad saor bho chuing an nàmh.

Ged 'bha mi greiseag oirbh air chall,
 Cha b' i mo choire fhéin a bh' ann,
 Ach sibhs', a chàirdean caomh mo rùin,
 A chuir gun aobhar rium bhur cùl ;
 Ach 'nis bho phill mi ruibh air ais,
 Cha bhi mi 'n dara h-uair cho tais ;
 'S ma chumas sibhse rium a' chòir
 Cha chuir mi cùl ruibh dheth mo dheòin.

Bha cuid 'am beachd nach robh mi beò,
 'S gur 'h-ann a thug mi suas an deò ;
 Ma thug, cha leubhar na mo ghruaidh
 Gu 'n robh mi mìosan marbh 's an uaigh ;

Tha 'n diugh mo chruth, mo ghuth, 's mo bhlàth,
 Cho slàn ri bradan glan an t-sàil,
 Mo mhàileid de gach saibhreas làn,
 De lòn a fhreagras air gach càil.

Ma gheibh mi misneach mhath bho'n t-sluagh,
 Aig ceann gach mìos bheir mi mo chuairt,
 Le còmhradh, òrain, agus duain,
 A chuireas fuadach air gach gruaim.
 'Us bidh mo thaic ri cainnt nan treun,
 Gu 'm faigh i 'còir 's a h-àite fhéin ;
 Oir 's iomadh bàrd a sheinn a cliù
 Ged 'tha i 'n diugh 'g a cur air chùl.

Ach labhraidh mi le bagradh cruaidh
 Ri Gàidheil fhionnar an taoibh-tuath,
 'Tha ri tàir air cainnt am màthar,
 'S air an tìr a rinn an àrach ;
 Ach tha na laoiach a chumadh suas
 Ar cliù 's ar cainnt ag cnàmh 's an uaigh,
 'S an t-àlach òg 'tha teachd 'n an déigh
 'G am meas mar chinneach borb gun chéill.

Ach dùisgibh suas, a chlann mo ghaoil,
 Cuiribh gach bruadar faoin gu taobh,
 Faicibh ar tìr bho bheinn gu tràigh
 Gu 'bhi 'n a raontan fala mh fàs ;
 Na glinn a dh' àraich suas na laoiach,
 Gun taigh, gun bhlàths, a' fàs fodh fhraoch ;
 'S bhur sliochd 'g an cur a null thar chuan,
 Mar thràille an diblidh air an ruaig.

Ar cànan blàth a b' àirde cliù,
 'G a cur air chùl mar ni nach fiù,
 'S a' dearbhadh oirnn le cainnt gun loinn
 Nach còir a teagasg do ar cloinn ;
 Ag cumail uainn ar còir 's ar ceart,
 Mar sin a' toirt air falbh ar neart,
 Gu 'n téid ar fàgail rùisgte fuar,
 Gun chainnt, gun dùthaich, 'us gun sluagh.

Eiribh suas, ma ta, gu dìleas,
 'Dhion bhur dùthcha 's cliù bhur sinnsir,
 'Us bithibh seasmhach, fearail, cruaidh,
 'An taic a chéile mar bu dual.
 'Us cuimhnichibh air tìr nam beann,
 'S air gnìomharran nan laoch a bh' ann,
 'S ged 'bhiodh bhur saothair searbh 'us buan,
 Cha robh na Gàidheil riamh gun bhuaidh.



AN TEID THU LEAM, A RIBHINN OG?

AIR FOKN—" *The Birks of Aberfeldy* ".

An téid thu leam, a rìbhinn òg,
 A rìbhinn òg, a rìbhinn òg,
 An téid thu leam, a rìbhinn òg,
 A null gu Tìr nam beanntan?

Chì thu 'n ròs a' fàs fodh 'n driùchd,
 'S a' mhill ag éirigh suas 'n a smùid,
 Bidh eòin nan geug a' seinn dhuinn ciùil
 Le sunnt an Tìr nam beanntan.

Chì thu 'n gleann 's an robh mi òg,
 'N uair 'bha mo chridhe maoth gun ghò,
 Mu 'n d' fhuair mi eòlas rianh air bròn,
 No leòn an Tìr nam beanntan.

Chì thu creagan gruamach àrd,
 Na neòil a' sguabadh air am bàrr,
 Bidh fuaim nan allt a' ruith le gàir,
 Gu tràigh an Tìr nam beanntan.

Chì thu òighean bòidheach ciùin
 'Chaidh àrach ann an glinn mo rùin,
 Gu maiseach, finealt', glan gun smùr,
 Cho ùr an Tìr nam beanntan.

Gheibh thu càirdeas, blàths, 'us mùirn,
 'Us chì thu caoimhneas anns gach sùil,
 Tha iochd 'us bàigh a' snàmh 'an gnùis
 Gach dùil 'tha 'n Tìr nam beanntan.

Tìr nam fiùran fearail fial,
 Nach d' thug an cùl ri nàmhaid riamh,
 Bidh cliù, cho fad 's a dh' éireas grian,
 Air iarmad Tìr nam beanntan.

Ged 'chaidh an sgaoileadh anns gach ceàrn,
 Air feadh gach tìr mu 'n iath an sàl,
 Bidh cuimhn' aca le aigne blàth
 Gu bràth air Tìr nam beanntan.

Siùbhlaidh sinn, ma ta, le deòin,
 Tha 'n samhradh caoin air teannadh oirnn,
 Tha 'choill 's am fraoch 'us blàth an fheòir
 'N an glòir an Tìr nam beanntan.



DOCHAS.

Mo bheannachd ort, a dhòchais chaoin,
 Bu tric a sheas thu m' inntinn mhaoth,
 'N uair 'bhiodh mo chridhe tróm fodh leòn,
 Fodh uallach, iomaguin, agus bròn ;
 Lasadh tu lochran blàth na m' uchd,
 A thogadh dhìom gach leòn 'us luchd,
 'S chuireadh tu cagar sèimh 'na m' chluais—
 “ Bi saothreach dileas fad do chuairt,
 'Us gheibh thu duais 'us fois.”

Is lionmhor deòiridh breòite, fann,
 A chum do mhisneach suas an ceann ;
 'N uair 'bhiodh an càirdean coimheach fuar,
 'S an saoghal uile riuth' an gruaim ;
 Thigeadh tus' an sin mar léigh,
 A dhòrtadh ola 'n an cuid chreuchd',
 'G an treòrachadh a mach gu tlàth,
 A ghabhail beachd air tìr is fheàrr,
 Far nach tig plàigh g' an sgrios.

Is iomadh bantràch bhochd fodh dheòir,
 'Us dilleachdanan lag gun treòir,
 'G am faicinn fhéin gun neart gun dìon,
 Mar chraoibh 'tha rùisgte ris gach sion,
 A bheir am beannachd ort gu bràth,

A chum an dòchas beò 's gach càs,
 'G an cur gu stòr an Athar shuas,
 Ri 'n iarratais nach druid a chluas,
 'S 'bheir fuasgladh dhaibh 'n a iochd.

'S an saighdear treun le cridhe làn,
 'Tha 'cath ri aghaidh cruais 'us bàis,
 Cha tréig thu e 'n uair 'tha e 'n sàs,
 A' strì ri buaidh 'thoirt air a nàmh;
 'S tu 'gealltainn dha gu 'm faigh e cliù,
 'Us làmh na h-òigh' do 'n d' thug e 'rùn,
 Tha sin 'g a chumail ann am fonn,
 'S ag àrach spionnaidh ùir 'n a chóm
 Mar shonn nach géill 's an drip.

'N uair 'thig an fhairge garg 'us tróm,
 'Us gaoth nan speur a' reubadh thonn,
 'S an seòladair air bhàrr nan stuadh,
 Ag cath ri doinionn gharbh a' chuain,
 Le buireich bhorb gun iochd gun truas,
 'Tha 'bagairt air a shlugadh suas,
 Thig thus' an sin mar sholus iùil,
 'G a neartachadh le dòchas ùir
 A dhùisgeas sunnt fodh 'chrios.

'S na mìltean a tha ìosal, sgìth,
 Le tinneas marbhteach air an claidh,
 A fhuair a mach le cràdh 'us deòir,
 Gu 'n deach an duine 'bhreith gu bròn;
 Ach thus', a réulta chaoimh nam buadh,

Cha tréig thu iad an taobh so 'n uaigh,
 'S ged 'tha na neòil cho dorcha dlùth,
 Tha 'ghrian a' dealradh air an cùl
 'S bidh sùil nan truaghan ris.

'S am measg gach trioblaid agus leòn,
 A tha air clann nan daoine an tòir,
 Gach mealladh, saothair, agus plàigh,
 'Tha buailteach dhaibh bho 'n breith gu'm bàs;
 Mur a biodh tus' a ghnàth 'n an taic,
 'G an seasamh ann an àm na h-aire,
 Cha bhiodh 'n am beath' ach geamhradh fuar,
 Gun neart, gun dòchas, làn de ghruaim,
 Fodh uallach buan gun fhois.

Bi leam, ma ta, gu ceann mo réis,
 Na fàg 's an fhàsach mi leam fhéin,
 'Us ged 'tha 'n t-slighe garbh 's an àm,
 Bidh dùil ri sòlas aig a ceann.
 Na tig le mealltaireachd gun diù;
 Bi dileas, dìreach anns gach cùis,
 Na d' dhòchas fìor nach téid air chùl
 'N uair 'thig mi 'n làthair Rìgh nan dùl,
 A dheanamh cunntas ris.

TIGH A' MHSIGEIR.*

AIR oidhche ghruamach gheambraidh, fhuar,
 'S mi 'gabhail suas an t-sràid—
 Clach-mheallain chruaidh, le gaoith a tuath,
 A' ruagail air an làr—
 Bha deòiridh truagh, 's na deòir bho 'ghruaidh,
 'S a shnuadh cho tana, bàn,
 E 'ruith gu luath, 's ag gul gu cruaidh;
 A' suathadh bas a làmh.

Bha 'thrusgan donn gu tana, gann,
 'N a stiallan lóm air cnàmh;
 'S a' ghaoth a' séideadh troimh gach toll,
 Mu 'chóm, gun iochd, gun bhàigh.
 Mo bhalachan maoth, thuirt mi gu caoin,
 Ciod 'chuir an taobh s' thu 'n tràths,
 'N nair 'tha gach dùile feadh nan crìoch
 Fodh dhion 'n an àite-tàimh?

Och! thuirt e rium am briathran ciùin,
 'S a shùilean fliuch fodh dheòir,
 Tha m' athair shuas le luchd na cluich,
 Air mhisg 'an tigh an òil;
 Mo mhàthair bhoichd 's i ris a' bhàs,
 'S an pàisde beag 'g a deoth'l,
 'S tha eagal orm, mu 'n tig an là,
 Nach bi mo mhàthair beò!

* A Translation will be found further on.

'N sin smaoinich mi dol leis air ais,
 'S gu 'm faicinn fàth a dheòir ;
 Oir chomhairlich an duine glic,
 'Bhi tric 'an tigh a' bhròin ;
 Cho beag 's g' an dean sinn air son sìth,
 Ma nì sinn e le deòin,
 Cha bhi ar duais gu bràth gun diol
 'Am fianuis Rìgh na glòir'.

'N uair 'ràinig sinn an dachaidh lóm,
 Far nach robh fonn no ceòl,
 Ach gearan agus osnaich thróm,
 'Tigh'nn bho gach còm gun treòir,
 Bha 'bhean 'n a sìneadh air an làr,
 Air clàran fuar de bhòrd,
 'S a h-ochd no naoidh de phàisdean maoth
 Rì 'taobh ag iarraidh lòn.

'S có 'mhàthair nach biodh ann an teinn
 Ag cluinntinn fuaime an gàir,
 'S a' faicinn leanaban caomh a cuim
 'An dìth gun bhiadh gun bhlàths !
 'S am fear 'bu chòir 'bhi dhaibh 'n a dhion,
 'Cur rian orra le bàigh,
 Tha 'ghuth 'cur crith orra le fiamh,
 'S a ghniomh 'g an cur gu bàs.

Ged 'nì gach ainmhidh borb air sliabh
 Do 'n gineal dìon 'n a thràth ;
 'Us eòin nan speur mu'n éirich grian,
 A' dioghlam bìdh do 'n àl,

Tha 'm misgear truagh, gun tuar gun chiall,
 'A riarachadh a chàil,
 Gun suim de 'ghineal no de 'shiol,
 Bho rinn a mhiann dheth tràill.

Ach 's lionmhor iad air feadh ar tìr,
 A chuir gu dìth an sliochd,
 'S an àit' an togail suas le mùirn,
 A spùinn iad le an-ìochd ;
 'Toirt dhiùbh an aodaich 'us an lòin,
 'Bu chòir 'bhi dhaibh 'n a mheas ;
 Mar sin 'g am fàgail lag gun stàth,
 Air sgàth an sàth de 'n mhisg.

S is lionmhor maighdeann bhainndidh, chiùin,
 'Bha cliùiteach, glan, 'n a beus,
 Chaidh 'àrach suas le gràdh 'us maoin,
 Gu caoin le 'càirdean fhéin,
 A ghabh le struidhear bochd gun diù,
 'S le ùmbaidh borb gun chéill,
 A rinn a beatha searbh 's gach cùis,
 'S a dhùin a sùil 's an eug.

Air dhomh 'bhi 'meorach' greis fodh sprochd,
 Air lochdan bochd an òil,
 Thàinig an t-athair truagh le fuaim,
 'S bu duaichnidh garg a ghlòir ;
 E 'falbh 's a' tuiteam air gach taobh,
 'N a shlaoid gun dreach gun treòir,
 'S a' mionnachadh d'a phàisdean maoth,
 Nach fhaodadh teachd 'n a chòir.

E 'mallachadh gu garg d' a mhnaoi,
 'S a' maoidheadh air a ceann,
 Ag iarraidh soluis agus bìdh—
 An iocshlaint nach robh ann—
 Ach ged 'bha crìoch a turais dlùth,
 'S a lùths air fàs cho fann,
 Bha 'sùil a' dearcadh air le truas,
 'S a beul ag gluasad mall.

'S i 'g earbsa gu 'm biodh Freasdal caomh
 'Toirt caochlaidh air 'n a thràth,
 Mu 'n tig am Breitheamh air le diùmb,
 'S mu 'n dùin a shùil 's a' bhàs;
 Dh' fhàg i e fhéin 's a pàisdean ciùin
 Air cùram Rìgh nan gràs,
 'Us dhùin i 'sùil 's a' chadal bhuan,
 Nach gluais gu latha ' bhràth.



N A G A I D H E I L.

Có 'n sluagh 'tha 'n diugh 's an ceann fodh chis,
 'N an dùthaich fhéin nach fhaigh iad sìth,
 Air son an d' rinn iad iomadh strìth?

Na Gàidheil.

Có 'sheas ar rìoghachd 'us ar feachd,
 'S nach d' thug an nàmh iad riamh fodh smachd,
 'S ri àm an fheum 'bu treun an gleachd?

Na Gàidheil.

Có 'dhòirt am fuil air iomadh raon,
 'S a thug a' bhuaidh a mach cho daor,
 Air son gu 'm biodh an gineal saor?

Na Gàidheil.

Có 'thug ar srathan 'us ar glinn
 Bho gharbhlach doirbh gu fearann mìn,
 'S a dh' fhàg cho torach soirbh an tìr?

Na Gàidheil.

Có 'n sluagh le cridhe truasail, blàth,
 Do 'n deòiridh bho chd a nochdadh bàigh,
 'S ri coigrich fialaidh aig gach tràth?

Na Gàidheil.

Có 'chaidh 'fhuadach thar a' chuain,
 Le uachdarain gun iochd, gun truas,

Mar thràilleam dìblidh air an ruaig?

Na Gàidheil.

Có 'sgiùrsadh bho gach srath 'us gleann

A dh' àraich suas iad fhéin 's an clann,

'S an seilbh an diugh aig féidh nam beann?

Na Gàidheil.

Có 'n sluagh 'tha nis air feadh gach ceàrn',

A' faicinn mar a sgaoil an àl,

'S 'n an dùthaich fhéin nach fhaigh iad tàmh?

Na Gàidheil.

Có 'n sluagh 'tha 'n diugh cho treun 'n an gnìomh,

Cho lionmhor pailt 's a bha iad riamh,

Cho cruadalach air muir 's air sliabh?

Na Gàidheil.

Có 'n sluagh 'tha nis a' dùsgadh suas,

A thoirt an còir a mach le buaidh,

'Bheir do 'n luchd-fòirneirt aca 'n duais?

Na Gàidheil.

Có 'n sluagh 'bhios fhathast anns na glinn,

A' seinn nan òran ceòlmhor, binn,

'An cànan Oisein agus Fhinn?

Na Gàidheil.

ORAN NA SEAN-MHAIGHDINN.

AIR FÖNN—" *Duncan Gray cam' here tae woo*".

MA gheibh mise fear gu bràth,
 Plàigh air nach tigeadh e!
 Ged nach can mi sin ri càch,
 B' fheàrr leam gu 'n tigeadh e,
 Na mo laidhe 'n so leam fhìn—
 'S tha e coltach ris gu 'm bi;
 Ma tha leannan dhomh 's an tìr,
 Sgrìob air nach tigeadh e!

Ged a bhiodh a sporan gann,
 Dhannsainn na 'n tigeadh e,
 Ged a bhiodh a leth-shùil dall,
 M' annsachd na 'n tigeadh e;
 Biodh e dubh, no biodh e donn,
 Biodh e dìreach, biodh e càrn,
 Ma tha casan air 'us ceann,
 Dhannsainn na 'n tigeadh e.

'N uair a bha mi aotrom òg
 Phòsadh a fìehead mi,
 Chuir mi dhiom iad dhe mo dheòin,
 'S spòrs dhaibh a nise mi,
 Théid iad seachad air mo shròin,
 Le 'n cuid chruinneagan air dhòrn,

Chaill mi tur orra mo chòir,
 'S leònaidh e nise mi.

Tha mo ghruag air fàs cho liath,
 'S cianail a nise mi,
 Mi 'g a dath an ceann gach mìos,
 Pianaidh i nise mi,
 Cha 'n 'eil fiacail na mo cheann
 Ach a trì 'tha 'null 's a nall,
 Dh' fhalbh mo chruthachd 'us mo ghreann,
 Tha 'n t-àm gu 'n robh mise dheth.

'N uair a chi mi mnathan truagh,
 'S suarach a' mhisneach e,
 Pòsd' aig ùnaidhean gun stuain,
 Buairas 'us misg aca,
 B' fheàrr leam cadal na mo bhrat,
 'S a bhi 'mireag ris a' chat
 Na aig burraidh 'bhi fodh smachd,
 Seachnadh a' chuid sin mi.

Có ach iadsan ann an gaol?
 'S aotrom a chluicheas iad,
 'N uair a gheibh iad pàisdean maoth,
 Faoineas gun tuigs' aca,
 'Us an cridhe 'tha 'n an cóm,
 Cho beag faireachaidh ri 'm bonn,
 Tha e 'n diugh ga m' fhàgail tróm
 'N tonn a thug sud orm.

Ach ma chuir iad rium an cùl,
 Smùr cha chuir sud orm,

Ach ma 's e 's gu 'n tig fear ùr,
 Sunnt cuiridh sud orm,
 Biodh e luath, no biodh e mall,
 B' fheaird' an tigh so e bhi ann,
 Feithidh mi gu 'n tig an t-àm,
 'S dhannsainn na 'n tigeadh e !



COILLE 'CHAOIL.

AIR FONN—"Kelvin Grove".

BHA mi 'n raoir an Coille 'Chaoil
 Le mo rìbhinn òig,
 'Tional lusan bòidheach maoth,
 Le mo rìbhinn òig,
 Bha na h-eòin air bhàrr nan craobh
 'S iad ri 'n ceilear air gach taobh,
 'N uair a dh' innis mi mo ghaol
 Do mo rìbhinn òig.

Fhuair mi gealladh daingeann teann
 Bho mo rìbhinn òig,
 Thug mo chridhe leum gu danns'
 Ri mo rìbhinn òig;
 Thog na h-eòin air bhàrr nan crann
 Caithream éibhneis le 'n cuid rann,
 'S ghuidh iad sonas buan 's gach àm
 Do mo rìbhinn òig.

Tha dà shùil cho banail, ciùin,
 Aig mo rìbhinn òig,
 Tha dà ghruaidh mar ròs fodh 'n driùchd
 Aig mo rìbhinn òig,
 Ged bu rìgh mi air a' chrùn
 Leis gach saibhreas agus mùirn,

Cha 'n 'eil té do 'n tugainn rùn
Ach mo rìbhinn òg.

Ged a gheibhinn na mo dhiùc
Gun mo rìbhinn òg,
Cha bu shonas lean a' chùirt
Gun mo rìbhinn òg
Leis gach maise 'tha 'n a gnùis
Agus buaidh 'tha air a cliù,
Cha chuir mis' a chaoidh mo chùl
Ri mo rìbhinn òig.

Cha 'n 'eil fearann, 's cha 'n 'eil fonn
Aig mo rìbhinn òig,
Ach tha crìdhe glan 'n a còm
Aig mo rìbhinn òig;
Ged a bhiodh ar bothan lóm,
'Us ar sporan gun 'bhi tróm,
Bhithiun sona ris an tóm
Le mo rìbhinn òig.

Cha 'n 'eil cron bho 'bonn gu 'ceann
Air mo rìbhinn òig,
Agus cuimir anns gach ball
Tha mo rìbhinn òg,
Tha i finealta 'n a greann
Mar an lilidh anns a' ghleann,
No mar shneachd air bhàrr nam beann
Tha mo rìbhinn òg.

Gur e mise 'thug an gaol
Do mo rìbhinn òig,

Bidh mi 'g aisling 'n uair nach saoil
Air mo rìbhinn òig,
Chì mi 'h-lomhaigh air gach taobh,
Bho 'n lath' 'thachair sinn 's a' chaol,
Far an d' innis mi mo ghaol
Do mo rìbhinn òig.



CUMHA AN T-SEAN GHAIÐHEIL.*

THA sgiathan na h-oidhche
 'G an sgaoileadh a nall,
 'S an ceò air a lùbadh
 Mu stùchdan nam beann ;
 Tha deòir air mo shùil-se
 'S gun m'aighe ach fann,
 Air m' fhàgail am aonar
 Ag caoineadh 's a' ghleann.

Tha eunlaith nan geugan
 Ag gleusadh an rann,
 'S a' leumnaich le sòlas
 'S ri ceòl feadh nan crann ;
 Tha 'n àlach mu 'n cuairt daibh
 Gu h-uallach a' danns',
 Ach àlach mo ghaoil-se,
 Gach aon diubh air chall !

Tha mo chiabhagan tana,
 'S tha claisean na m' ghruaidh,
 Oir tha céile mo ghràidh-se
 'N a sìneadh 's an uaigh,
 Agus triùir dhe mo phàislean
 Bu bhlàthmhoire greann,

* A Translation will be found further on.

'N an sineadh fodh leacan
A' chlachain ud thall.

Ged 'tha eòin bheag' a' Chéitein
A' tréigsinn nan tóm,
'N uair a chòmhdaicheas reòdhtachd
'Us dóruinn am fonn,
Bheir samhradh mu 'n cuairt iad
Gu bruachaibh nan allt ;
Ach càirdean mo ghaoil-se
Cha taobh iad an gleann.

Tha na fàrdaichean blàtha
'Bha 'g àrach nan sonn,
'Bu shuilbhire gàire
'S 'bu bhàigheile cóm ;
Far am b' fhàbharrach càirdeas
Do 'n ànrachan lóm,
'N an làraichean fàsail
Air cnàmh gus am bonn.

Cha 'n fhaicear am buachail'
A' ruagail mu 'n chrò,
No banarach ghuanach
Le buaraich 'n a dòrn ;
Bu bhinn leam a duanagan
Uallach, gun ghò,
Le 'cuailen m' a guaillean,
Mar dhualan de 'n òr.

Cha 'n 'eil clàrsach no siùnn-sair
 'G ar dùsgadh le ceòl,
 'S tha mactalla 'n a shuain
 Ann an uaimhean nam fròg ;
 'S na laoich a bha lùthmhor
 Mu stùchdan a' cheò,
 Rinn fòirneart an sgiùrsadh
 Bho dhùthaich an òig'.

Ach sìth do na dh' fhalbh,
 Agus buaidh leis na seòid !
 Tha m' fheasgar-s' air cìaradh
 'S mo ghrian fodh na nèil ;
 Cha 'n fhad' gus an crìonar
 Mo chiabhan fodh 'n fhòd,
 Far an caisgear gach pian,
 'S an téid crìoch air gach bròn.



AN TIR 'BU MHIANN LEINN.

AIR FONN—" *Auld Lang Syne*".

CUIR oirnn a' chuach mu 'n cuairt le bàigh,
 Air sgàth na tìr 'bu mhiann leinn ;
 Air tìr nam beanntan corrach àrd,
 'S air tìr nan àrmunn fiallaidh.

Gur lionmhor laoch a dh' fhàg a tràigh
 Nach till gu bràth gu 'crìochan,
 A dh' òl a chuach le cridhe làn,
 Air sgàth na tìr 'bu mhiann leinn.

'S gur lionmhor fàrdach chàirdeil bhlàth
 'Tha 'n diugh ri làr air crìonadh,
 Aig eòin nan speur, 's aig féidh nan àrd
 Le 'n àl 's an tìr 'bu mhiann leinn.

Ged 'chaidh ar sgaoileadh feadh gach ceàrn',
 Cha leig sinn bàs no dì-chuimhn',
 Air glinn ar gràidh, 's na càirdean blàth'
 'Tha 'tàn' 's an tìr 'bu mhiann leinn.

Cho fad' 's a bhuaileas tonn air tràigh,
 'S a dheàrsas grian 's an iarmailt,
 Bidh cliù gu bràth air siol nan sàr
 A dh' fhàg an tìr 'bu mhiann leinn.

'N uair 'thigeadh àm a' chruais 's a' chàis,
 Ri uchd nam blàr cha strìochd iad ;
 An cùl cha d' thug iad riamh ri nàmh,
 No tàir do 'n tìr 'bu mhiann leinn.

Lion a' chuach dhuinn suas gu 'bàrr,
 'S gu 'n tràigh sinn i gu h-ìochdar,
 Air tìr nam beanntan corrach àrd,
 'S air tìr nan àrmunn fialaidh.



MO GHAOL AN RIBHINN.

AIR FONN—" *Mo rùn geal, dileas*".

Mo ghaol an rìbhinn 'tha tric air m' inntinn,
 A chaidh cha till i 'thoirt dhomh a sgeòil,
 Cha till thu 'Mhàiri, 's cha chluinn thu 'ghràidh
 mi,
 Mo chreach gu bràth thu 'bhi 'cnàmh fodh 'n
 fhòd!

An raoir a bhruadair mi air a' ghruagaich
 A rinn mo bhuaireadh 'n uair 'bha mi òg,
 Sinn a bhi 'cluaineis, gun dragh gun uallach,
 Air feadh nam bruachag a' buain nan ròs.

'N uair 'dh' fhalbh an dùsal, 's a rinn mi dùsgadh,
 Gu'n d' shil mo shùilean gu bras na deòir:
 An té 'bha dùil a'm 'bhi laidhe dlùth rium,
 'S e fàth mo thùrsa nach 'eil i beò!

'S e 'gaol a chnàmh mi, 's a mhill mo shlàinte,
 Tha 'cruth a b' àille dhomh 'n diugh 'n a leòn,
 Tha 'briathran blàth', agus fiamh a gàire,
 Mar shaighdean cràiteach an sàs na m' fheòil.

Gur tric a bha sinn ri mire 's mànnan,
 An gleannan blàthmhor na coille chnò;
 Bhiodh eòin an fhàsaich le 'n ceòl 'g ar tàladh,
 'S an crodh a' bàraich mu 'n cuairt do'n chrò.

Ach dh' fhalbh an là sin, 'us shearg na blàthan,
 'S tha mis' air m' fhàgail an so ri bròn,
 'S bho chaochail Màiri tha eòin an fhàsaich,
 Air sgur dhe 'n àbhachd 's a' choille chnò.

Ach 's iomadh gòraich' 'bhios aig an òige,
 'Us iomadh dòchas air nach tig blàth,
 'Us iomadh sòlas a dhùisgeas bròn dhaibh,
 Mar 'thachair dhomhsa air dòigh no dhà.



AM FEAR A CHAILL A LEANNAN.

AIR Fonn—" *An té channach ruadh* ".

GU ma slàn do'n chaileig
 'Bh' anns a' bhail' ud shuas,
 Thug i dhomhsa gealladh
 Ged nach robh e buan ;
 'N uair a dh' fhàg mi 'sealladh
 Chuir i car 'n a cluais,
 'S ghabh i 'mach am bealach
 Leis a' ghille ruadh.

Fhuair mi taigh 'us fearann
 Agus beagan guail,
 'S rud a dheanadh banais,
 'S thug mi fios do 'n t-sluagh ;
 Chruinnich iad gu geanail,
 'S dhealaich iad le gruaim,
 'S mhallaich iad le caithream
 Ainm a' ghille ruaidh.

Their a nis gach bean rium,
 Agus sin le uaill,
 " C' àite 'bheil do leannan,
 'Amadain gun bhuaidh ?
 Na 'm biodh tusa smiorail,
 Fearail mar bu dual,
 Chumadh tu do chaileag
 'Dh' aindeoin gille ruaidh ".

Ma bhios mise maireann
 Gus an tig Di-luain,
 Siùbhlaidh mi gach baile
 'S leanaidh mi an ruaig;
 Gus am faigh mi deannal
 Dhe mo chaman cruaidh,
 'Fhiachainn air an drannaig
 Aig a' ghille ruadh.

Bha mi 'n raoir na m' chaithris,
 'S aithreach leam mo dhuais,
 'G amhare air gach bealach
 'S mu gach bad 'us bruaich;
 'S bhòidich mi fodh m' anail
 Ged 'rachadh mo luadh,
 Gu 'n tugainn ruith-phrannaidh
 Air a' ghille ruadh.

Shaoil leam, mar bu mhath leam,
 'N uair a ghabh mi cuairt,
 Gu 'm faca mi 'm balach
 'Falach aig a' chruaich;
 Thug mi leum le cabhaig
 Gus a bhi 'n a ghruaig,
 Ach 's e bhuail mi bannas
 Gearran Choinneich ruaidh.

Ma gheibh mis' an garrach
 Air an taobh so 'n uaigh,
 Ni mi 'cheann a chabadh,
 Ged a b' ann le tuaigh—

Mis' ag cur nan car dhiom
Ann an leabaidh fhuair,
'S ise 'rinn mo mhealladh
Aig a' ghille ruadh.



FAR AN ROBH MI 'N RAOIR.*

AIR FOSN—" *Comin' thro' the rye* ".

CHA 'n 'eil fios aig duin' air thalamh
 Far an robh mi 'n raoir,
 Cha robh leam ach Màiri Ailein
 Far an robh mi 'n raoir ;
 Fhuair mi gealladh bho mo chaileig—
 Beul nach canadh foill—
 Ann an gleannan caoin a' bharraich
 Far an robh mi 'n raoir.

Bha na h-eòin a' seinn le caithream
 Far an robh mi 'n raoir,
 Iad a' danns' air bhàrr nam meangan
 Far an robh mi 'n raoir,
 Fàile cùbhraidh driùchd 'us meala
 Dheth gach bad 's a' choill,
 Cha robh smùid no stùr a' bhaile
 Far an robh mi 'n raoir.

Cha robh feum air gréin no gealaich
 Far an robh mi 'n raoir,
 Bàrr nan craobh a' sgaoileadh tharainn
 Far an robh mi 'n raoir ;
 Le mo ghaol a 's caoile mala
 Dh' fhan mi seal de 'n oidhch'

* A Translation will be found further on.

'Measg nan neòinean bòidheach, geala
Far an robh mi 'n raoir.

Cha robh smaoin air maoin no fearann
Far an robh mi 'n raoir,
Cha robh stòr no òr air m' aire
Far an robh mi 'n raoir ;
'S cha robh lùchairt riamh air thalamh
Ann an dreach 's an loinn,
Air am fàgainn sgàil a' bharraich
Far an robh mi 'n raoir.

Bidh mi 'cuimhneachadh ri m' mhaireann
Far an robh mi 'n raoir,
'S air an òigh bho 'n d' fhuair mi gealladh
Far an robh mi 'n raoir,
Gus an càirear mi 's an anart
Cha tig smal no foill
Air mo ghràdh do Màiri Ailein
'S far an robh mi 'n raoir.



DOL FODHA NA GREINE.

THA thus', a ghrian 'is àillidh snuadh,
 Ag cromadh sìos air chùl nan stuadh ;
 Do ghathan blàth' air bhàrr nam beann,
 Mar òr a' deàrsadh air an ceann ;
 'S an déigh do chuairt bho 'n ear gu 'n iar,
 Am measg gach doinionn, gaoth, 'us sion,
 Tha thu gun smalan air do ghnùis,
 'Dol gu do thàmh gu sàmhach ciùin.

B' e m' iarrtas 'us mo ghuidhe fhéin,
 An uair 'thig crìoch 'us ceann mo réis—
 'Dol troimh gach buaireadh, cath, 'us leòn
 'Tha buailteach dhuinn an so 's an fheòil—
 Gu 'm faodaim amharc na mo dhéigh,
 'Us buaidh 'thoirt orra sin gu léir,
 Mar thus' an nochd an déigh do chuairt,
 Le glòir a' lasadh na do ghruaidh.

Faodaidh na gaothan 's neòil nan speur
 'Bhi 'cur nan cath, 's 'g an iomairt fhéin,
 'Dol uair gu deas, 'us uair gu tuath—
 Cha ghabh iad fois, ach air an ruaig—
 Ach thusa, seasmhach, buan gu bràth,
 Na d' mhórachd thréin cha téid as d' àit',
 Mar lòchran dealrach os ar cinn,
 Gun chaochladh ort bho linn gu linn !

'S tu 'chuireas beatha, neart, 'us treòir,
 'Bheir fàs 'us cinneas air gach pòr,
 Do 'n daraig àird, 's do 'n bhileig fhaoin,
 Cha dean thu dearmad air a h-aon,
 Do chàirdeas saibhir, farsuinn, fial,
 Cho ùr an diugh 's a bha e riamh,
 Thu 'dòrtadh d' fheartan oirnn gu saor,
 'S cha toir sin traoghadh air do mhaoin.

'Us mar an Tì 'thug dhut do ghlòir,
 Cha seas an dorchadas na d' chòir,
 Cho luath 's a thogas tu do cheann,
 Théid fuadach air mar cheò nam beann.
 'Us riamh bho fhuair thu 'n reachd bho 'n Rìgh,
 Cha deach thu leud na ròineig clì,
 A' ruith do réis gu stòlda réidh,
 'S a' riaghladh cùrs' a' chruinne-ché.

Gu 'n robh gach sòlas dhut, a ghrian;
 Tha feum ort far am bheil thu 'triall,
 Bidh sinne dorcha 'n so gun ghean
 Gu 'n dùisg thu 'm màireach anns an ear.
 Ach laidh thu sios air cùl a' chuain,
 'S dh' fhàg thu na speuran tróm fodh ghruaim,
 Tha neòil na h-oidhche' a' tarruing teann,
 'S bidh mis' a' teàrnadh sios do 'n ghleann.

BAS LEANABH NA BANTRAICH.

Tha 'nochd do ghruaidh gu tana bàn,
 Cha chluinn do chluas 's cha ghluais do làmh,
 Do chluinn mhaoth a nis aig tàmh,
 Mo leanaban gaoil !

Do shùil gun ghruaim fodh shuain a' bhàis,
 'S a' chadal bhuan nach gluais gu bràth,
 'S e sin a nì mo shnuadh-sa 'chnàmh,
 Mo leanaban gaoil !

Tha d' eachdraidh ghoirid aig a ceann,
 'Us b' fheàrr dhomh fhéin nach robh i ann,
 Cha bhiodh mo leòn 's mo bhròn cho teann,
 Mo leanaban gaoil !

Do chathair bheag an sud 's a' chùil,
 'S an tric a shuidh thu ri mo ghlùin,
 A' seinn do laoidhean milis, ciùin,
 Mo leanaban gaoil !

Ach tha thu 'nochd a' seinn do dhàin,
 'Am fianais cathair Rìgh nan gràs,
 A rinn do sgaradh uam cho tràth,
 Mo leanaban gaoil !

Cha d' fhuair mi dhiot ach iasad geàrr—
 Ni sin mo chupan searbh an tràths',
 Ag cuimhneachadh do chruth 's do bhlàth,
 Mo leanaban gaoil !

O 'bhàis ! bu tu am maor gun truas,
 Cha taisich deòir no bròn do chruas,
 'N uair 'thug thu m' ullaidh-shaoghail uam—
 Mo leanaban gaoil !

Cha robh na m' ghàradh ach aon ròs,
 A bha mi 'dion 's a' cumail beò—
 Spion thusa leat e gun mo dheòin—
 Mo leanaban gaoil !

Ach ged a spion, cha toir thu buaidh,
 Cha 'n fhàgar fad' e 'cnàmh 's an uaigh,
 Tha feum aig Rìgh nan dùl air shuas—
 Mo leanaban gaoil !

Gu 'shuidheachadh 'n a fhìon-lios fhéin,
 Far nach tig thus' a dheanamh beud,
 'N a uan gun ghaoid am measg an treud—
 Mo leanaban gaoil !

'Us dh' fhàg thu mise 'n gleann nan deòir,
 Ach tha mo mhiann 's mo dhòchas beò,
 Gu 'm faic mi d' aghaidh chiùin 'an glòir,
 Mo leanaban gaoil !

Far nach bi bochdainn, deòir, no plàigh,
Far nach tig dealachadh gu bràth,
Ach sonas buan a' chuain nach tràigh,
Mo leanaban gaoil !



A' BHEAN AGAM FHIN.

AIR FÖNN—" *Cogadh no sìth* ".

A FHLEASGAICH 'tha 'tathaich

Air srathan 'us glinn,

A' mealladh nan caileag,

'S a' farraid am prìs,

Ma dh' fhanas tu tamull,

Ged 'tha mi car sgìth,

Gu'n toir mi dhut ealain

Mu 'n bhean agam fhìn.

An oidhche 'bha 'bhanais

'An taigh Choinneich dhuinn,

A chunnaic mi 'chaileag

'Bha ceanalta grinn,

A dhannsadh cho loinneil

'S a sheinneadh cho binn,

'S bha mise mu 'coinneamh

A' togail an fhuinn.

Bha 'gruaidh mar na ròsan

Cho bòidheach 's cho min,

'S a cuailean cho clannach

'N a charan mu 'n chìr,

'S bha mise fodh m' anail
 A' cantainn rium fhìn,
 'S e aingeal air thalamh
 'Tha 'n Anna N'ic Cuinn.

'N uair 'fhuair mi a mach i
 Ri fasgadh an tuim,
 Bha solus na gealaich
 Cho glan os ar cinn,
 Gu'n tug mi dhi gealladh
 Mur 'rachainn do'n chìll,
 Gu 'm biodh i fodh Challuinn
 Na bean agam fhìn.

'Us chum mi mo ghealladh
 Ri Anna N'ic Cuinn.
 Mu 'n d' thàinig a' Challuinn
 Bha ise na mnaoi—
 'S cha 'n 'eil i cho maiseach
 No idir cho binn,
 'S a bha i mu m' choinneamh
 An taigh Choinneich dhuinn !

'N àm éirigh 's a' mhaduinn
 Tha Anna cho tinn,
 Cha ghluais i á leabaidh
 Gu 'm faigh i 'cuid tì,
 'N sin suidhidh i tacan
 A' tachas a cinn,
 'S ma chanas mi facal
 Tha 'm bat' air mo dhruim'.

Bho mhaduinn gu feasgar

Cha deasaich i nì,

Bho dhorus gu dorus

Ri conas 'us strì—

Ma tha i 'n a h-aingeal

'S ann air an taobh chli,

'S tha fios aig a' bhaile

Nach math leatha sìth.

Ma labhras mi duineil

'G a cumail fodh chis,

Cha 'n 'eil annam ach “burraidh,

'Us duine gun bhrìgh”—

Mu choinneamh gach facail

Tha aice-se trì;

Cha 'n 'eil fàilinn 's an teang'

Aig a' bhean agam fhìn.

An dé bha i 'carraid

Ri bean Iain 'ic Aoidh,

'S thug Anna dheth 'mullach

An currachd le sgriob—

Tha plàigh na mo thalla—

Ach cha 'n abair mi bìd,

'S cha chòir dhomh 'bhi 'gearan

Mu 'n bhean agam fhìn.

Ach bheirinn mar earail

Air balaich na tìr',

Ma bhios iad aig banais

'Us drama 'n an cinn :

Na tugadh iad gealladh
Do chailaig a chaoidh,
Gun fhios no gun aithne
Có as, no có i.



MO GHRADH DO M' DHUTHAICH FHIN.

AIR FONN—"Jock o' Hazeldean".

GUR tric mi 'cuimhneachadh na m' thàmh
 Air linn an àidh nach till,
 'N uair 'bha mo chupan sòlais làn,
 'S mo bhothan blàth gun dìth ;
 Ach chaidh mo chur a nall thar sàl
 Mar thràill a bhiodh fodh bhinn,
 Ach cha toir sin air falbh gu bràth
 Mo ghràdh do m' dhùthaich fhìn.

An caill mi cuimhn' air comunn blàth
 Na h-òigridh chàirdeil ghrinn,
 'Bhiodh leam ag cluich' air feadh nam blàr,
 'S a' màmran mu na tuim ?
 Ach chaidh ar sgaoileadh feadh gach ceàrn,
 'S cha dean e stàth 'bhi 'caoidh,
 Ged 'dhùisgeas e le barrachd bàigh
 Mo ghràdh do m' dhùthaich fhìn.

An dùthaich bheanntach, chorrach, àrd,
 Nan coilltean blàthmhor binn ;
 Bidh eòin nan geug a' seinn do 'n àl,
 Fodh sgàil a duilich mhìn,

Bidh fuaim nan allt a' ruith gu tràigh,
 'S ag gàireich troimh na glinn,
 'S am bradan meanmneach 'thig bho 'n t-sàl
 A' deàrsadh fodh na tuinn.

Ged 'gheibhinn saibhreas mar a b' àill,
 'Us àilgheas de gach nì,
 Cha dean e sochair dhomh no stàth
 Mur 'faigh mi tàmh no sìth,
 Ann an measg sluaigh 'tha borb gun bhàigh,
 Cha 'n fhàiltich iad-san mi—
 Cha b' ionann 's càirdean blàth mo ghràidh
 'Tha 'tàmh na m' dhùthaich fhìn.

Bhiodh guth nan òighean bòidheach tlàth
 Ga m' thàladh le 'n cuid fhuinn,
 A' dol a mach 's a' mhaduinn Mhàigh
 Gu àiridh a' chruidh-laoidh,
 Bhiodh fead a' bhuachaille ri 'n sàil
 Ag cur an àil dhaibh cruinn,
 'S na caoirich air na firich àrd
 A' bàireich os an cinn.

Ach dh' fhalbh na h-òighean bòidheach tlàth,
 'Us dh' fhalbh na dàin 's na fuinn,
 Tha 'n àitean-còmhnuidh falamh fàs,
 Air cnàmh 'n a làraich luim,
 'Us dh' fhalbh na laoich 'bha treun 's na blàir,
 'S a dhearbh an lànfh 's an t-strìth;
 Ach cha toir sin air falbh gu bràth
 Mo ghràdh do m' dhùthaich fhìn.

AN GILLE CAM CRUBACH.

AIR Fonn—" *Dean fead agus théid mi*".

Tha mise gun sunnt 's mi 'n diugh air mo chràdh,
Chaill mi mo shùil a muigh anns a' bhlàr,
Le mi 'bhi crùbach bha mi car ceàrr,
'Us cuiridh mo shùil mi tuilleadh bho stàth.

Thug mi mo rùn do chruinneig no dhà,
'S bhithinn ri sùgradh mar a bhiodh càch,
Ach chuir iad an cùl rium buileach an tràths',
A' camadh an sùl 'n uair 'thig mi 'n an dàil.

Thuirte Màiri nigh'n Uisdein as a' bhail' àrd,
"Cò 'chuireadh ùigh ann—duine gun àdh?
Bidh e 'n a chrùban 's car ann gu làr,
Ag gearradh nan sùrdag mar gu 'm biodh gearr".

"Esan! am burraidh!" ars' Anna N'ie Phàil,
"S ann 'b' airidh a thumadh gu math anns an
t-sàl,

Tha e gun chumadh bho 'mhullach gu 'shàil,
Mar gu 'm biodh tunnag a' tarring a spàg".

Thàinig an cuiridh sin, bean Aonghais bhàin,
Sheas i gu duineil mi, 's ghabh i mo phàirt;
Las i le fraochan, 's throid i gun sgàth,
'Us chuir i na baothan uile 'n an tàmh.

“ Thusa, 'N'ic Uisdein,” thuirt i gu blàth,
 “ Agus an iùrach, Anna N'ic Phàil,
 Ged a tha glùin 'us cas air a dh' àrc',
 Bu shuarach an cunnradh té agaibh dha.

Ged 'tha e air leth-shùil, cha 'n 'eil e cho ceàrr,
 Chi e le h-aon cho math ris na dhà ;
 Cha chuir a chas chrùbach dragh air gu bràth,
 'S gu 'n toireadh e smùid air fear a tha slàn.

Cha téid e le 'chù a shiubhal nan àrd,
 Ach dheanadh e 'chùis 'n a bhodach buntàt' ;
 'S iomadh té 'chunntainn anns am bheil stràic,
 A bheireadh a gùn gu 'n sireadh e 'làmh.”

Nach mis' 'th' air mo chiùrradh eadar gach plàigh
 Na mo chuis-bhùrt aig mnathan an àit' !
 Ach aig a' bhliadhn' ùir, mur 'tachair am bàs,
 Gu 'm faigh mi mo rùn a dh' aindeoin an càil.



CUMHA LEANNAIN.

AIR Fonn—" *Tha mise fodh mhulad*".

CHA sùgradh no sòlas
 'Tha 'g ùrachadh m' òrain,
 Cha 'n ionndrainn air stòras
 Cho mór 'bhi dheth m' dhìth;
 Ach m' inntinn 'bhi brònach
 Mu 'n rìbhinn a leòn mi
 'Bhi sìnte gun deò fodh
 Na fòidean 's a' chìll!

Tha 'ghnùis a bha blàthmhor,
 'S an t-sùil a bha bàigheil,
 'S am bial 's an robh 'm mànrán
 A thàlaidh mo chrìdh',
 Gu fuar fodh na clàran,
 'S a cluasan gun chlàistinn,
 Cha chluinn iad mo dhàn-se
 Ge cràiteach mo chaoidh!

Mar éirigh na gréine
 'S an òg mhaduinn Chéitein,
 'Tha 'dùsgadh le éibhneas,
 'Chur gleus air gach nì,

Bha buadhan mo ghràidh-se,
 Gun uabhar gun àrdan,
 Mar ròs anns an fhàsach
 A' deàrsadh gun lith.

Bha boillsgeadh a h-àilleachd
 Mar choinnleir gun smàl air,
 Ach mhùchadh ro thràth e
 Mar sgàile nach till !
 Mar fhionan gun fhàilling
 A spionadh bho 'n ghàradh,
 'Thug crionadh 'us bàs air
 Mu 'n d' thàinig a bhrìgh.

Thig blàth air na pòran
 A bhàsaich le reòdhtachd,
 'S gach sóbhrach 'us neòinein
 'Bha 'còmhdach na tìr ;
 Thig samhradh g' an òradh
 Le fiamhachd na h-òige,
 Ach cha 'n fhaic mis' an ròs
 'Bheireadh sòlas dhomh fhìn !

Tha nise mo shamhradh
 Air tionntadh gu geamhradh ;
 Tha gruaim air a' ghleann 's an
 Robh m' annsachd cho binn !
 Gu 'n crionar fodh 'n fhòd mi,
 Bidh briathran a còmhradh
 'S a h-ìomhaigh 'bu bhòidheche
 Cho beò na mo chuimhn'.

GAIDHEIL AN TAOIBH-TUATH.

AIR FOKN—" *Gur tu mo rùn na 'm faighinn thu*".

Rinneadh an t-òran so do na Gàidheil a thàinig do Dhun-éideann gu cruinneachadh mòr nan Saighdearan Saor-dheòin Albannach air a' chiad mhìos de 'n Fhoghar, 1881.

LION a mach gu 'bàrr a' chuach,
'S cuir an t-slàinte so mu 'n cuairt :
Slàinte Gàidheil an Taoibh-tuath,
'Chaidh seachad suas an latha so.

'N uair a chruinn'cheadh air an raon
Sliochd na h-Albainn bho gach taobh,
Dhearbha na suinn bho Thìr an fhraoich
An gnìomh mar laoiach an latha so.

Bho ar Bànn-rìgh air a' chrùn,
Bha gach Iarla, 's bha gach Diùc,
Bha gach beul, 'us bha gach sùil,
Ag cur ri 'n cliù an latha so.

Air an còmhdach mar bu dual :
Osan gearr 'us féileadh cuaich,
Pìoban-mór 'bu ghàireach fuaime,
'G am mosgladh suas an latha so.

Shil an t-uisge mar an t-allt,
'S chuir e crith air Clann nan Gall,

Dh' fhàg e cuid aca car fann,
'S bu bhoichd an greann an latha so.

Ach 'n uair 'thainig Clann mo rùin,
Riamh nach d' thug ri 'nàmh an cùl,
Chithte fearalas 'n an gnùis,
A dhùisg mo shùnnt an latha so.

Cha b' e fras a dh' uisge fuar
'Bheireadh gaiseadh air an gruaidh—
'S iomadh cath 'us cogadh cruaidh
'S an d' thug iad buaidh roimh 'n latha so.

Slìochd nan leómhann fearail fial—
'S iomadh linn a dhearbh an ghnìomh,
'S tric a rinn an lann 's an sgiath
Ar tìr a dhion roimh 'n latha so.

Gu ma buan iad fhéin 's an clann
'Gabhail seilbh air Tìr nam beann—
'S boichd an àireamh 'bhi cho gann,
Ged 's math na th' ann an latha so.



MADUINN SHAMHRAIDH.

AIR FÒNN—"Màiri bhàn òg".

Tha doinionn nan speur air séideadh thairis,
 Tha neamh 'us talamh 'n an glòir,
 Tha gathan na gréin' ag éirigh thall-ud,
 'Cur sgèimh air beannaibh a' cheò;
 Tha eunlaith na coill a' seinn le caithream
 Air roinn nam meanganan òg,
 'Toirt molaidh do 'n Tì 'thug dhuinn gach beann-
 achd,
 'S a dhion troimh 'n ghaillinn iad beò.

Gach doir' agus bruaich le 'n tuar cho fallain,
 'S an gruag air lasadh mar òr,
 Fodh shileadh an driùchd tha smùid na meala
 Cho cùrr' bho anail nan ròs;
 Tha 'chuthag a' leum feadh gheug a' bharraich,
 'S an spréidh cho mear aig a' chrò,
 'S na cruinneagan suairce, guanach, banail,
 Le 'n cuachan bainne 'n an dòrn.

Gach sruthan 'us allt 'n an deann a' tarruing
 Gu ceann na mara le gàir,
 Ged 'bha iad 's a' gheamhradh fann gun anam,
 Ri àm na gaillinn 'an sàs,
 Tha nise na neòinein bhòidheach gheala
 Mu 'n còsan tairis a' fàs,

'S an seillean a' stòradh lòn gu 'thalla,
 'S e 'g òl na meala dheth 'm bàrr.

Nach maiseach na glinn 's gach ni gun ainnis
 Ag cinntinn thairis mu 'n bhlàr?
 Fodh dhuthar nan crann tha 'chlann ag aithris
 Air rann nan eal' air an t-snàmh;
 Gach coir' agus sliabh cho sgiamhach sealladh,
 'S a' ghrian 'g am faire le bàigh,
 'S gach lus a bha 'erionadh shios fodh 'n talamh
 Le 'n^f ciabhan glan ris a' bhlàths.

Tha fois agus sìth aig tuinn na mara,
 Cho mìn a' teannadh gu tràigh,
 Cha 'n fhaicear an cìrean millteach greannach,
 'N an still mu 'n charraig le càir;
 Na creagan cho uaibhreach shuas mar challaid
 'S cha ghluais am balla gu bràth;
 Bidh meallan de cheò 'cur sgleò mu 'm bearradh,
 'S na h-còin am falach fodh 'n sgàil.

Tha aoidh agus sunnt air gnùis na cruinne,
 Cho ùr fodh dhuilleach 's fodh bhlàth,
 Gun airc no gun éis air spréidh no duine,
 'S gach réidhlean uile cho làn;
 Tha uiseag nan lòn gun bhròn gun mhulad,
 Le 'h-òran suillein gu h-àrd;
 'S theid mise do'n choill le loimn nan cruinneag
 A sheinn ar luinneig le càch.

THOIR MO SHOIRIDH THAR AN T-SAILE.

AIR Fonn—" *Ged 'tha mi gun chrodh gun aighean* ".

THOIR mo shoiridh thar an t-sàile,
 'Null gu tìr nam beanntan àrda,
 Far an d' fhuair mi greis de m' àrach
 Air an àiridh anns na glinn.

Far am biodh an ceòl 's am mánran
 Aig an òigridh chridheil chàirdeil,
 Far am biodh na h-òrain Ghàidhlig
 'N uair 'rachadh na h-àrmuinn cruinn.

Far am biodh na h-òighean guanach
 'S fhad a chluinnte fuaim an duanaig,
 'Dol le 'n cuman 'us le 'm buaraich
 'Mach gu buailidh a' chruidh laoidh.

Far am biodh na mnathan bàigheil,
 'Bheireadh biadh 'us deoch do 'n ànrach,
 Agus bodaich chòire laidir
 Nach robh fàillineach no tinn.

Far am bheil na stùcan ceòthach,
 Far am bheil am fraoch 's a' mhòinteach,
 Far an cluinnte guth na smeòraich,
 Agus crònan aig na h-uillt.

Far am faighte crodh 'us daoine,
 Tha e nise fàs fodh chaoirich,
 'S tha na Gàidheil air an sgaoileadh
 Air gach taobh air bheagan suim.

Ach tha 'chuibhle nis air tionntadh,
 'S gheibh sinn fhathast còir ar dùthcha,
 'S théid na h-uachdarain a sgiùrsadh
 Mar a cum iad cothrum ruinn.

Bidh ar glinn 's ar srathan còmhnaidh
 Air an àiteach 's air an còmhdach,
 'S bidh na Gàidheil mar bu chòir dhaibh
 'Gabhail còmhnuidh anns an tìr.



BIDH SEUMAS LEAM AN NOCHD.

Rinneadh an rann so air sgeula brònach mu mhaighdeinn òig Ghàidhealaich aig an robh ainm a bhi air leth maiseach. Bha i fhéin agus gille òg tlachdmhor, air an robh gaol mór aice, a' dol a phòsadh. Ach, dlùth air latha 'phòsaidh, thàinig fios air-san dol thairis a dh' Ameirica, a dh' fhaotainn beairteis mhóir a dh' fhàg caraid' aige. Dh' fhalbh e gu sunntach, ann an rùn gu 'm pòsadh iad cho luath 's a thilleadh e air ais. Ach 's e sin ni nach do thachair ! An long air an robh e 'tilleadh chaidh i fodha, agus gach neach a bha innte a bhàthadh ! 'N uair a fhuair ise an naigheachd so chaidh i ceàrr 'n a h-inntinn, agus cha d' thàinig a ciall riamh air ais ! Bhàsaich i beagan ùine an déigh sin ; agus gach aon fheasgar fhad 's a bha i beò chuireadh i oirre an t-éideadh 'bu rionhaiche 'bha aice ; agus ruigeadh i 'n clad-ach, 's shuidheadh i air an tràigh, a' feitheamh ri Seumas. An oidheh' a bhàsaich i b' éiginn d' a càirdean a h-aodach a chur oirre mar a b' àbhaist agus theireadh i 'an ceann gach tiota, “ thig e 'nochd ! bidh Seumas leam an nochd ! ”

Thoir dhomh mo chùr, thoir dhomh mo ghùn,
 Thoir dhomh mo thrusgan bòidheach ùr—
 'S mi 'faicinn long air bhàrr nan tonn
 'S i 'stiùireadh dìreach air an fhonn.
 Bidh mis' a' feitheamh air an tràigh
 Gu 'n tig mo ghaol air tìr le càch ;
 Cha ghabh mi biadh, 's cha dùin mo shùil
 Gu 'm faigh mi sealladh air mo rùn :
 'S bidh Seumas leam an nochd !

C' arson, a thonnan beucach borb,
 'Tha sibh a' leum cho àrd le colg
 Ag cumail bacaidh air mo ghràdh?
 'S mi fuar 'g a fheitheamh air an tràigh!
 Tha fuaim bhur guth cho tianhaidh tróm,
 A' dùsgadh mulaid na mo chóm—
 Eagal gu 'n caill an long a h-iùl,
 Lasaidh mi solus air an Dùn,
 'S bidh Seumas leam an nochd!

Thig, thus', a ghaoth an iar, gu tlàth—
 Do chaileig bho chd nach nochd thu bàigh?
 C' arson a shéideas tu cho cruaidh,
 'S tu 'cumail Sheumais fada uam?
 Tha eòin nan speur air dol gu tàmh—
 Cha 'n fhaic mi long 's cha chluinn mi ràmh,
 'Us chaill mi sealladh air na siùil;
 Ach ged a chaill, cha toir mi dùil:
 'S bidh Seumas leam an nochd!

Eirich, a ghealach, 's tog do cheann,
 Na laidh cho fad' air chùl nam beann;
 'Us sibhs', a reultan glan gun smùr,
 'Bu tric a rinn do 'n mharaich iùl,
 Na tigeadh ceò no neul 'n 'ur còir
 A chuireas falach air bhur glòir
 Gu 'n tig an long 's am bheil mo rùn,
 'S am faigh iad sealladh air an tùr:
 'S bidh Seumas leam an nochd!

Thus', 'fhaoileag bhàn, a shnàmh an cuan,
 Am fac' thu sealladh air mo luaidh?
 Dh' aithnichinn fhéin e 'measg nan ceud,
 An t-òigfhear treun 'bu ghlaine beus;
 Tha 'chruth 's a bhlàth cho beò na m' uchd,
 Dh' fhàg sin mo chridhe tróm fodh luchd—
 Ar leam gu 'n cluinn mi 'ghuth cho ciùin,
 'Toirt cuiridh dhomh dol leis an null,
 'S bidh Seumas leam an nochd!

Thoir dhomh mo chùr, thoir dhomh mo ghùn,
 Thoir dhomh mo thrusgan bòidheach ùr,
 Feumaidh mi falbh an nochd car tràth,
 'S e thall ga m' fheitheamh air an tràigh,
 'S mi 'faicinn lùchairt mhaiseach ghrinn,
 Air 'ullachadh dha fhéin 's dhomh fhìn—
 Tha ceò a' tuiteam air mo shùil,
 Ach tha mi 'cluinntinn fuaim a' chiùil—
 'S bidh Seumas leam an nochd!



DUGHALL NA SROINE.

THA balach anns an dùthaich
 Ris an can iad Dùghall,
 'S fhada bho bha ùigh aige pòsadh.
 Ged a tha e lùgach,
 Agus car 'n a shùilean,
 Gur e 'mhill a chùis nach 'eil sròn air.

Anna bheag a' chùbair,
 Caileag laghach shunntach,
 Ged 'tha i gun iùntas gun stòras,
 Ghabhadh ise Dùghall
 Ged a tha e crùbach,
 Na 'm biodh fad na lùdaig de shròin air.

Bha mi oidhche Shamhna
 Ann an taigh an dannsa,
 'S chluinneadh tu mar chainnt aig na h-òighean :
 “ Fear le crodh 'us gamhna,
 'Chumadh bean 'us clann dha,
 'S bochd an rud a th' ann nach eil sròn air ! ”

Thuir Mairi N'ic Phàdruig :
 “ 'S sibh a chaill bhur nàire—
 Buidheachas do 'n Adh nach robh 'n còrr dheth !
 Tha e laghach càirdeil,
 'S rachainn leis am màireach,
 'S cha mhaoidhinn gu bràth nach robh sròn air.

Ni e cur 'us àiteach,
 'S tha e math 'n a nàdur,
 Ged nach dean e gàire ro bhòidheach,
 'S fheàrr e mar a tha e
 Na fear falamh stràiceil,
 Ged 'bhiodh urad màlaid de shròin air."

Thuir nighean an tàilleir :
 "'S ann agad 'tha 'chàil dha,
 'S ole an rud nach sàsaich do sheòrsa—
 Rachainn ga mo bhàthadh
 'Mach air rugha 'n t-sàile,
 Mu 'n gabhainn le gàrlaoch gun sròin air!"

Coma leat-s', a Dhùghaill,
 Na gabh thusa cùram
 Ciod a their na sgliùraichean gòrach ;
 Gheibh thu caileag chliùteach,
 Agus té 'bheir rùn dhut,
 'S cha 'n aithnich i 'an cùil nach 'eil sròn ort.



DURACHD BLIADHN' UIRE.

Rinneadh an rann so mar fhreagairt do litir bho Mhr.
Ros á Baile-Bhòid, a' toirt cuiridh dhomh dol a chur seachad
na bliadhn' ùire leis.

FHUAIR mi do litir moch Di-luain,
Le cuireadh cho suaire' agus còir,
Ga m' iarraidh car seachduin air chuairt,
'S gu 'm faicinn na h-uaislean 'tha 'm Bòid.
Tha fios a'm nach bithinn fodh ghruaim
Na d' thalla gun bhruaillein gun sgleò,
Far am mìnichear dàin agus duain,
'S far an cuimhnichear truaghain fodh leòn.

Mo shoiridh gu caraid' nam bàrd,
A sheasadh a Ghàidhlig 's an ceòl,
A chumadh ar cànan an àird,
'Us eachdraidh nan àrmunn nach beò;
An Gàidheal cho dìleas 's cho blàth
'S a shiùbhlas air sràid ann am bròig,
'Us cridhe cho fialaidh le bàigh
Ri neach 'tha fodh àmhghair no bròn.

Mo dhùrachd le bliadhna mhath ùir,
'Us àireamhan dhiubh air do cheann;
Do thoradh 'bhi sgaoileadh le blàth,
'Us gràs a' toirt fàis air do chrann;

Do bhriathran 'bhi 'tuiteam mar dhriùchd
Air meanganan brùit' agus fann,
'S do chliù ann am fion-lios an Rìgh
'Bhi 'n cuimhn' aig an linn nach 'eil ann.



RAINN DO NEOINEAN.

THA thus' an sin, a neoinein bhig, 'an cùil leat
fhéin,

'Us fiamh a' ghàir' air d' aghaidh mhìn ri blàths
na gréin'

'Tha 'g àrach suas do fhreumhan maoth gu
bàigheil sèimh,

'S tu 'deanamh gàirdeachais gun fhoill fodh sgàil
nan geug.

Ach c' àit' an robh thu 'n uair 'bha gruaim air
uchd nan speur,

'S an geamhradh fuar le 'fhrasan garbh a' searg
do ghnè,

'S a' lomadh sìos gach duileig' ghuirm 'bha 'fàs
air crann,

'S gach luidhe maoth le doinionn shearbh a'
falbh 'n an deann?

Thug reòdhtachd fhuar air falbh do ghruag, do
shnuadh, 's do dhreach,

'Us shùigh an talamh sìos 'n a bhalg do dhealbh
a steach;

'Us cheil a' ghrian a sgiathan blàth, a bàigh, 's
feart,

'Bha 'g ùrachadh do chruth gach làth' gu càirdeil,
ait.

Ach bha do bheath' 'an dion bho 'n fhuachd 'an
cuaich gun bheud ;

'S do chuislean faoin 'g an altrum suas gnn fhios
dhut fhéin,

Le diomhaireachd nach fhaca sùil, 's nach aithris
beul ;

'S 'tha 'toirt a nàduir do gach ni a réir am feum.

Ach tha thu nis air teachd as ùr bho 'n ghrunnd
air ais,

Le d' churrachd bileach, pleatach, dlùth, gu h-ùrar
glas ;

'S cha 'n aithnichear ort gu 'n robh thu dùint' 'an
cùil fodh ghlais,

Na d' leabaidh thosdaich anns an fhonn ri àm na
h-aire.

Tha nis an driùchd le ceuman ciùin re àm na
h-oidhch'

Ag uisgeachadh do bhilean maoth le braonan
soills',

Mar shradan boillsgeach feadh do ghruaig' a 's
uaisle dreach ;

'S do cheann a' lùbadh sios gu làr aig làin' do
bhrat.

Ach togaidh 'ghrian gu moch a ceann air guala
'n t-sléibh' ;

'Us sìnidh i a sgiathan blàth' a nuas bho neamh ;

'Us tiormaichidh i suas do ghnùis 's do dheòir
ma seach ;

'Us sgaoilidh tu do chuailean fann gu greannmhor
ait.

Thig eòin nan geug gu moch a sheinn dhut
iomadh fonn,
Ag itealaich a null 's a nall mu 'n cuairt do 'n
tóm
Ag criomadh bhàrr gach feòirnein gorm 's ag òl
dheth 'n ceann,
Gu sòlasach air bhàrr nan slat a' seinn dhut
rann.

Bha mise uair a bhithinn fhéin gu tric a' d' chòir
A' dol mu 'n cuairt am measg nam preas gun
dragh gun ghò,
A null 's a nall air feadh nam bruach a' buain
nan ròs—
Bhiodh tus' an sin 's an t-sóbhrach bhàn 'an sàs
na m' dhòrn.

Ach thriall na làithean sin air falbh mar shruth
le gleann;
'S tha grian ar n-òige 'cromadh sìos air chùl nam
beann;
Tha aois 'us leòn, 'us dragh 'us bròn, a' ruith 'n
an deann;
'S gach lath' 'us uair 'toirt glaoth 'n ar cluais
gu 'n tig an t-àm.

Tha geamhradh gnùth gun bhlàths gun sunnt a'
teannadh oirnn,

'S ag cur gu taobh gach sòlas faoin 'bha againn
òg—

Ach ged 'théid thusa sios do 'n uaigh cha chrion
do bheo ;

Ged 'shearg do ghruaidh bheir earrach nuadh air
ais do ghlòir.

Ach aon uair 's gu'n téid mise sios gu crìch mo lò,
Cha 'n ùraich driùchd, 's cha bhlàthaich grian, 's
cha mhaothaich deòir ;

Cha chluinn mi ceòl air feadh na coill, no guth an
eòin,

Ach dùinte 'n glasan teann a' bhàis an talla 'n
fhòid.

'N uair 'théid mo chré-se 'leagadh sios 's a' chadal
thróm,

'N sin éirich thus' 'us sgaoil do bhrat mu'n cuairt
do m' thóm ;

Biodh driùchd 'us grian le sgiathan blàth an taic
do chóm ;

'S biodh eòin 'us clann le 'n ceilear binn a' seinn
dhut fhonn.



MO CHRUINNEAG ILEACH.

AIR FOKN—"Ochóin a rìgh".

OCHOIN, a rìgh, gur
 E mi 'tha muladach !
 Nach robh mi 'n Ile
 'S mo rìbhinn lurach ann ;
 'S i 'thogadh m' inntinn
 Le 'brìodal cuireadach,
 'S a bheir fodh chis mi
 Mur 'till i tuilleadh rium.

'An eilean uaine
 Nan cluainibh glacagach,
 A dh' fhàg mi 'ghruagach
 A 's uaisle cleachdaidhean ;
 Gur tric mi 'bruadar
 Mo luaidh 'bhi 'n taice rium,
 'S 'n uair 'ni mi dùsgadh
 Mo rùn cha 'n fhaicear leam.

Cha 'n e 'cuid stòrais
 'Thug dhomhs' an acaid so,
 Ach meud a bòidhchead,
 'S a còmhradh faiciallach—
 Tha 'cruth gun fhòtus
 'S gach seòrsa mais' oirre,

'S a guth cho ceòlmhor
Ri eòin na maidne leam.

Ged 'tha Dunéideann
Cho éibhinn caithreamach,
'S na mìltean té ann
Mar reultan lainnireach—
Le'n òr a' deàrsadh
Air sràid cho farumach—
Ach cha bhi 'n àilleachd
No 'm blàth ro mhaireannach.

Thoir dhomhs' a' mhaighdeann
'Tha bainndidh cumadail,
Gun cheilg gun fhoill,
Ach gu caoinhneil furanach ;
Ged nach biodh 'saibhreas
No 'h-oighreachd bunaiteach,
Gu 'm bithinn aoibhneach
Le loinn na cruinneig sin.

Ged 'chaidh a h-àrach
Aig tràigh nam marannan,
Tha 'buadhan làidir
'S tha 'nàdur carthonnach.
Thug gaoth nan àrd-bheann
Dhi slàint' 'us falainneachd,
Mar ròs 'an gàradh
Fodh bhlàth gun fhannachadh.

Gu 'm b' e mo dhùrachd
'Bhi dluth do 'n chala sin—

'S 'n uair 'théid an dùldachd
 Air chùl cha 'n aithreach leam—
 Cha d' thug mi dùil dheth
 Nach stiùirinn thairis ann,
 A dheanamh cùmhnant'
 Ri rùn nan caileagan.



CUMHA EILEAN A' CHEO.

AIR FÖNN—" *Cha tig Mór mo bhean dachaidh* ".

GU ma slàn leis na glacan
 Anns 'n do chleachd mi 'bhi òg,
 Air feadh fraoich agus luachrach,
 'S mi ri uallach nam bó ;
 Gu ma slàn leis na beannaibh,
 'S leis gach gleannan 'us còs,
 Chì mi 'n sealladh mu dheireadh
 'Nochd air Eilean a' Cheò !

Slàn le duslach mo shìnnair,
 'Tha 'n an sìneadh fodh 'n fhòd,
 A bha seasmhach 'us dìleas
 Ann am fìrinn 's an còir ;
 Tha mo chridhe fodh thùrsa
 'S tha mo shùilean fodh dheòir
 A bhi 'tionndadh mo chùlthaobh
 Ris an ùir sin ri m' bheò !

Na 'm b' e ceannairc no meàirle
 'Bhiodh ga m' fhàgail fodh 'n tòir,
 Ach ga m' fhuadach thar sàile
 Mar an tràill air son òir ;

Ga mo sgaradh bho m' chàirdean,
 Le mo phàisdean gun treòir,
 'Dheanamh àite do 'n eilid
 Ann an Eilean a' Cheò!

Ged is corrach a stùcan,
 'S ged is lùbach a thràigh,
 'Chaidh cha 'n fhaic mise dùthaich
 'Bheir mi rùn dhi cho blàth;
 Ged 'bhiodh dearcan 'us ùbhlán
 Air gach fiùran a' fàs,
 Bidh mo thogradh 's mo dhùrachd
 Anns an ùir so gu bràth.

Slàn le comunn mo shòlais,
 Agus òigridh mo ghaoil;
 'S tric a thachair sinn còmhla
 Mu na còsagan caoin;
 Tha mi 'faireachadh brònach
 'Bhi air m' fhògradh bho 'n taobh,
 Gun chul-taic gun luchd-eòlais
 'Dol a sheòladh Diar-daoin!

'Dh' ionnsaidh dùthcha nach eòl dhomh,
 'S gun an còmhradh na m' cheann,
 Agus àite gu leòr dhomh
 'Ghabhail còmhnaidh 's a' ghleann,
 Far an cluinninn an smeòrach
 Agus crònan nan allt,
 Agus maighdeannan bòidheach
 Le 'n cuid òran 'us rann.

Ach tha 'n comunn air sgaoileadh
 'S iad air faondradh 's gach àit',
 'Us cha tachair sinn còmhla
 Air Di-dòmhnach mar 'bha.
 Aitean-còmhnaidh ar n-òige
 Air an còmhdach fodh 'n làr,
 Far 'n do shaothraich ar sinnsir
 Iomadh linn agus àl.

Thigeadh bochdainn no beartas,
 Thigeadh acaid no leòn,
 'Chaoidh cha sgar iad mo chuimhne
 Bho na glinn so ri m' bheò.
 Ged a shiùbhlainn gach rìoghachd
 Agus tìr fodh na neòil,
 Bidh mo chridhe gu deireadh
 Ann an Eilean a' Cheò !



FREAGRADH DO LITIR CARAIDE.

FHUAIR mi do litir moch Di-màirt,
 Ag innse dhomh gu'n robh thu slàn ;
 Ach ma tha firinn na do ghlòir,
 'S tu duin' a 's truaigh' 'tha fodh na neòil.
 Gach nì no neach ri 'n cuir thu làmh,
 Tha mi-shealbh dhaibh sin 'an dàn :
 'S tu 'm barail nach 'eil neach fodh 'n ghréin
 Aig am bheil trioblaid ach thu fhéin.

Ach c' àit' an seall thu taobh seach taobh
 Nach fhaic thu cùram air gach aon,
 Gach bochd 'us beairteach, lag 'us treun,
 Ag gearan air an uallach fhéin ?
 Cha 'n 'eil a h-aon am measg an t-sluaigh
 'Tha 'còmhnuidh air an taobh so 'n uaigh
 Aig nach 'eil cùisean ri 'n cur ceart,
 'S air nach 'eil sac a réir an neart.

Cha 'n fhaic thu neach nach 'eil an tòir
 Air saibhreas, sonas, agus glòir,
 Gun fhois gun tàmh bho 'm breith gu'm bàs,
 Ag iarraidh riarachaidh do 'n càil.
 Iad mar 'tha 'n seilean feadh nam bruach,
 Bho lus gu lus, 's bho chuaich gu cuaich,
 Ag iarraidh meal' air feadh gach blàth,
 'S a chaidh cha 'n fhaigh am miann a shàth.

Na dòchasan 'bha againn òg,
 Gach aon dhiubh sin, air falbh mar cheò,
 'S gach gealladh mór 'thug sinn dhuinn fhéin
 Chaidh iad 'am mearachd oirnn gu léir;
 Ach 'n uair a 's isle 'tha ar ceann
 Tha fuasgladh dlùth dhuinn aig an àm,
 'S ma bhàsaich dòchas, thig fear ùr,
 Nach leig ar misneach uil' air chùl.

Na earb á airgiod no á òr
 Gu'n toir iad sonas dhut le còir;
 Tha iad gu math 'n an àite fhéin
 Gu freasdal oirnn 'n ar n-iomadh feum;
 Ach 's lionmhor beath' a dh' fhàg iad geàrr,
 'Us 's iomadh beath' a chuir iad ceàrr.
 Tha mìltean ann le pailteas sòigh,
 'S cha toir sin saorsa dhaibh bho 'm bròn.

Ma mheall do chàirdean thu cho tric,
 Bu chòir do sin do dheanamh glic—
 Gu bràth na leig cho tróm do thaic
 Air neach a thréigeadh thu na d-airc.
 Cha ghann dhut càirdean caoimhneil blàth
 Cho fad' 's a tha do shaibhlean làn;
 Ach thig g' an dearbhadh falamh bochd
 'S cha 'n fhaic thu orr' ach gruaim 'us sprochd.

Ma chuir an òigh do 'n d' thug thu rùn,
 Le foill, gun aobhar, riut a cùl,
 C' arson a tha thu 'gul 's ag caoidh
 Té 'dh' fhàgadh tu mar sin 's an dìg?

Tha cuid dheth 'n gaol mar ròs fodh 'n driùchd,
 Cho bòidheach min 's a' mhaduinn chiùin ;
 Bheir oidhche reòdht' air falbh a bhlàth,
 'S cha till a mhaise ris gu bràth.

Ach na bi 'm beachd gu'n dean e feum
 'Bhi beò 's an t-saoghal so leinn fhéin,
 Cha 'n fhaigh sinn càirdeas, truas, no gràdh
 Ma tha sinn fhéin gun iochd gun bhàigh.
 Bheir caoimhneas buaidh air sean 'us òg,
 'Us coisnidh e dhuinn gaol nan òigh ;
 Ach le 'bhi greannach, gruamach, fuar,
 Cha 'n fhaigh sinn gaol no toil an t-sluaigh.

A nis, a charaide, bi glic,
 'S na 'gluais 'an slighean baoth an uile ;
 Oir tha ar n-ùine 'ruith gu dian
 Mar shruth nach till air ais ri sliabh ;
 Ar beath' a' snàmh air falbh mar cheò,
 Mar sgàile faoin no blàth an fheòir,
 Cha 'n 'eil a h-aon a théid 's an tòir
 An uair a gheibh an uaigh a còir.

Bi saothreach anns gach nì 'tha ceart,
 Ag iarraidh còmhnaidh Rìgh nam feart,
 Bho 'n tig gach solus agus iùl,
 'S nach cuir ar n-achanaich air chùl.
 Cha d' fhuair sinn bith gu 'bhi 'n ar tàmh,
 'S gu 'bhi 'n ar n-uallach tróm air càch ;
 Ach gu 'bhi 'cath ar cuibhrinn fhéin
 De 'n t-saothair ghoirt a tha fodh 'n ghréin.

'Us mar 'tha aimsirean nan speur
 Ag caochladh tric an déigh a chéil',
 Thig laithean frasach, dorch, tróm,
 A chuireas gruaim air muir 'us fonn;
 'S thig laithean soilleir, grianach, ciùin,
 A chuireas aiteas air gach dùil;
 Bidh sinn mar sin bho àm gu àm
 Gu'n tig an réis againn gu 'ceann.

Ach ged 'tha 'n t-astar duilich, cruaidh,
 Bidh cadal fad' againn 's an uaigh,
 Far nach 'eil saothair, cath, no strì,
 Far am bheil sàmhchair, fois, 'us sìth;
 'S ma bhios na lòchrain againn deas
 'N uair 'thig an t-oighre g' ar toirt leis,
 An àite tuireidh agus broin,
 Bidh sonas siorruith dhuinn 'an glòir.



GU IAIN CAIMBEAL AM BARD.

Rinneadh na rainn so mar fhreagairt do Iain Caimbeal,
 á Leideag, air dha badan fraoich, neòinean, agus sóbhrach a
 chur thugam do Dhunéideann.

CIAD fàilt' ort fhéin, a bhadain fhraoich
 Bho thìr nan aonach àrd—
 An tìr a dh' àraich iomadh laoch,
 Ge sgaoilt' an diugh an àl—
 Tha snuadh mo dhùthcha air do ghruaig,
 Seasaidh tu fuachd 'us blàths,
 'S e 'mheudaich dhomh cho mór do luach
 Gu'n d' fhuair mi thu bho 'n bhàrd.

'Us thus', a neòinein bhig gun ghò,
 Cho bòidheach, bileach, tlàth,
 Ge duilich leam thu 'bhi cho òg
 Air d' fhògradh fad' bho chàch;
 Tha eagal orm gu'n searg do ghruaidh,
 'S nach bi thu buan no slàn;
 Ach gheibh thu càirdeas, bàigh, 'us truas,
 Bho-n fhuair mi thu bho 'n bhàrd.

'S a shóbhrach fhìnealta nam bruach—
 'Bu tric a bhuain mo làmh
 'N uair 'bha mi aotrom òg gun ghruaim
 Ag cluaineis mu na blàir—

'S ann leam is ait do theachd air chuairt
 Cho luath bho thìr mo ghràidh,
 'S nì mise d' altrum suas le uaill,
 Bho-n fhuair mi thu bho 'n bhàrd.

'Us mar a thachair dhuibh 'n 'ur trì
 Bhur tìr a chall cho tràth,
 'S bhur sgaradh bho 'n chaomh chomunn ghrinn
 'Bha leibh bho là gu là,
 Sin mar a thachair dhomhsa fhéin—
 Ach 's éiginn géilleadh dha.
 'Bhi 'caoidh na dh' fhàg sinn as ar déigh
 Cha dean e feum no stàth.

Gu 'n robh gach lus a 's àirde cliù
 'S an Leideig chiùin a' fàs ;
 Fodh dhealt an driùchd biodh dreach an gnùis
 'N a lòn do shùil a' bhàird ;
 Biodh gaoth nam beann 'us gàir nan allt,
 Le 'n crònan fann gun tàmh,
 Mar cheòl 'n a chluais g' a dhùsgadh suas
 A dheanamh dhan 'us dhàn !



NA CROITEARAN SGIATHANACH.

GUR bochd leam an cunntas
 'Tha 'nochd as mo dhùthaich,
 Mo chàirdean 'g an sgiùrsadh
 Aig ùmbaidhean Ghall ;
 Le bataichean rùisgte
 'G an slachdadh mar bhrùidean,
 Mar thràillea gun diù dhiubh
 'G an dùnadh 'am fang.

An sluagh 'bha cho càirdeil,
 Cho suaire' agus bàigheil,
 Rinn uachdarain shràiceil
 Am fàsgadh cho teann ;
 Tha saors' air am fàgail,
 Tha 'n raontan 'n am fàsaich,
 'S na caoirich an àite
 Nan àrmunn 's a' ghleann.

Gun chuimhn' air na fiùrain
 A dhion dhuinn ar dùthaich
 Le'n airm-chogaidh rùisgte
 'Thug cùis dheth gach nàmh ;
 Fodh dhaorsa nach lùbadh,
 Ach ceartas nach diùltadh—
 'Us dh' fhàg iad an cliù sin
 Gun smùr aig an àl.

Na suinn a bha calma,
 Bu shunntach a dh' fhàlbh iad
 Fodh bhrataich na h-Alba,
 'S a dhearbhadh iad an làmh.
 Cha 'n ioghnadh ge searbh leinn
 'S ged 'dhùisgeadh e fearg dhuinn
 An sliochd 'bhi 'g an dearmad
 'S 'g an tearbadh bho 'n àit'.

Bha 'n uair sin ar sìnn sir
 Fodh uachdarain rìoghail;
 Bha uaisle 'n an inntinn
 Le firinn 'us gràdh;
 Bha 'n cànan cho binn dhaibh,
 'S an càirdeas gun dìth dhaibh,
 'An cogadh no 'n sìth dhaibh,
 Bha dìlseachd 'n an gnàths.

Bha 'n dachaidh 's an còmhnuidh
 Le 'n sluagh mar 'bu chòir dhaibh,
 'S iad fiosrach 'us eòlach
 Mu'n dòigh anns gach càs;
 'N uair 'thachradh iad còmhla
 'S a' chlachan Di-dòmhnuidh,
 Cho caoimhneil 'g am feòrach
 Gu còmhraiteach blàth.

Iad fhéin 's an cuid dhaoine
 Cho seasmhach 's cho aontach,
 Mar theaghlach cho gaolach
 Nach sgaoileadh ach bàs.

Cha 'n airgiod no caoirich
 'Bha 'dhìth air na laoiach sin,
 Ach gaisgeich gun chlaonadh
 Nach aomadh 's a' bhlàr.

Cha robh uisge no mòinteach
 Fodh dhion no fodh chòmhdach;
 'S bha saors' agus sòlas
 Aig òigridh na tìr;
 Cha robh bàilidhean spòrsail
 'G am feannadh le fòirneart,
 'S ag gearradh an lòn dhiubh
 Gun tròcair gun suim.

Ach, dùisgibh, mo chàirdean,
 'S bhur dùthaich na fàgaibh,
 Ach seasaibh gu làidir
 'G a teàrnadh le buaidh,
 Bhur sinnsirean dh' fhàg i
 Mar dhileab gu bràth dhuibh—
 'Us dionaibh-s' an tràths' i
 Do 'n àl a thig uaibh.

Cha 'n ann le mi-riaghailt,
 Ach tuigseach 'us ciallach,
 Gun lùbadh gun fhiaradh
 'Am briathran no 'n gnàths—
 Tha mìltean 'us ciadan
 A sheasas mar dhion dhuibh
 Gu 'm faigh sibh na 's miann leibh
 De shliabh nam beann àrd.

Théid crìoch air gach fòirneart,
 'S bidh biadh agus stòras,
 Bidh sìth agus sòlas,
 Ag còmhdach na tìr ;
 Bidh fuinn agus òrain
 Gu binn aig an òigridh,
 'S na rìbhinnean bòidheach
 Mu 'n chrò le 'n crodh-laoidh.

Gach oighr' agus bàilidh,
 Gun fhoill 'us gun àrdan,
 Rì 'n daoine cho càirdeil,
 Mar 'bha iad bho thùs ;
 'S bidh Gàidheil gun àireamh
 'An dùthaich nan àrd-bheann
 'Cur mais' air an àite,
 'S a' fàs ann an cliù.



AIG UAIGH UILLEIM ROIS, AM BARD.

'N a laidhe 'n so gu tosdach, fuar,
 Tha 'chré 'bha blàth le gràdh 'us truas,
 'S am bial a sheinneadh dàin 'us duain

A nis air clos ;

Am boillsgean 'òige dhùin an uaigh
 Air Uilleam Ros !

Am measg nam bàrd a thog ar tìr
 Cha robh a h-aon dhiubh 'sheinn r'a linn
 A dhùisgeadh suas ar bàigh 'g a chaidh

Cho sèimh ri Ros

An ùine gheàrr 'bha 'chlàrsach bhinn
 A' seirm a bhos.

A ròsan òg' 'tha glan gun smùr,
 'S a shóbhrach bhàn 'tha 'fàs fodh 'n driùchd,
 Sgaoilibh bhur brat le fàileadh cùrr'

An so mu'n cuairt ;

'S bi thus', a ghrian, le blàths do ghnùis'
 'G an àrach suas.

A chuthag ghorm, 'n uair 'thig an t-àm
 'Bhios tus' a' seinn air feadh nan gleann,
 Dean suidhe greiseag aig a cheann

Le do ghug-gùg—

Bu tric a bheireadh fuaime do rann
Na deòir bho 'shùil.

Tha cuimhn' agad 'n uair 'bha e beò,
'S tu 'seinn air bhàrr nan geug 's a' cheò,
Mar 'chuir e 'n céill dhut fàth a dheoir,
Fodh sgàil nan craobh,
'S a chridhe tùrsach tróm fodh leòn
Ag cnàmh le gaol.

A rìbhinn òg 'tha 'n so air chuairt,
Thoir ceum gu taobh, 'us dearc mu'n uaigh
Aig fear a leòn do ghaol cho cruaidh
Ri faobhar lann,
A dhùin a shùil 's a' chadal bhuan,
'S a shearg a ghreann.

Ge lionmhor bàrd a sheinn do chliù,
Ag àrdachadh do chruth 's do mhùirn,
Cha d' thug a h-aon dhiubh riamh dhut rùn
Cho saor bho fhoill,
'S a thug am fear 'tha 'n so fodh 'n ùir
Gun ghaidh dhut loinn.

Ach mar 'tha diomhanas gun chéill
'Us mealladh anns gach nì fodh 'n ghréin,
Tha gaol nan òighean bòidheach fhéin
Ag caochladh tric—
Chuir sin am bàrd 'bu ghlaine beus
Ro thràth fodh 'n lic!

Ach gheibh a ghaol a nis a shàth
Far nach téid mealladh air gu bràth,
Bho linn gu linn a' seinn a dhàin
Air cliù an Uain
A rinn a shaoradh bho gach plàigh
Gu sonas buan.



RI TAOBH NA TRAIGH.

O ! nach robh agam bothan beag
 'An so ri taobh na tràigh,
 Aig bonn nam beann fodh sgàil nan creag
 'S gu 'm faighinn fois 'us tàmh ;
 Cha 'n iarrainn ceòl ach eòin nam preas
 A' beadradh shuas le 'n àl ;
 'Us guth nan tonn 'us fuaim nan eas
 'Toirt freagraidh dhaibh le 'n gàir.

'N sin laidhinn sìos 'us dh' éirinn suas
 Gu suaimhneach mar a b' àill,
 Air m' ùrachadh le caochan cruaidh
 An fhuarain fhallain làin—
 Cha 'n fhaicinn fòirneartan an t-sluaigh
 'S gach buaireas agus plàigh,
 'S na miltean deòiridh breòite truagh
 Fodh uallaich thróm 'an sàs.

Tha sàmhchair, neochiont, agus sìth
 'Còmhnuidh an so a ghnàth,
 Gun fhoill, gun fharmad, 'us gun strìth
 Aig dùil a th' ann a' tàmh.
 Tha 'n còmhdach glan, 's an lòn gun dìth,
 Na ni bho thràth gu tràth,
 Iad beò gun lochd, 's an òran binn
 'An so ri taobh na tràigh.

Gach feòirnean maoth 'tha 'n còs no 'n glaic,
 Gheibh iad an cuid de 'n driùchd,
 Tha 'ghrian 'g an àrach suas gun aire
 Air àithne Rìgh nan dùl;
 Gach lus no cré a 's isle staid
 Tha iad 'am beachd a shùl,
 'S an Tì 'tha 'freasdal dhaibh air fad
 Cha chuir e mis' air chùl.

Tha gàir na mara 's gaoth nam beann
 Le 'm fuaim cho tiamhaidh tróm,
 Cho freagarrach dhomh aig an àn
 'S do 'n ionndrainn 'tha na m' chóm;
 Cha 'n iarrainn lùchairt mu mo cheann,
 Cha 'n iarrainn òr no fonn,
 Na 'm faodainn fuireach shios an gleann
 'G éisdeachd ri guth nan tonn.

Tha cuid 'an tòir air stòr 's air maoin,
 'G an ruith bho 'm breith gu 'm bàs;
 Cha 'n fhaigh iad fois 's cha bhi iad saor
 Ma chi iad sin aig càch;
 Thoir dhomhse sìth, 'us gràdh, 'us gaol,
 Aig taobh nan sruthan tlàth,
 Mo bhothan beag fodh sgàil nan craobh,
 'S mo lios ri taobh na tràigh.

DEOCH-SLAINTE NAN CUIRIDHEAN.

AIR Fonn—" *An Dòmhnullach urramach* ".

DEOCH-SLAINTE nan cuiridhean
 'Tha 'n tràth so 'cur urram oirnn,
 Ag cumail suas na Gàidhlig,
 'S cha bhàsaich i tuilleadh oirnn.

Lion a mach na cuachan,
 'S gu'n òl sinn air na h-uailsean,
 'S Mac 'Ille Dhuibh 'thug buaidh dhuinn,
 Bidh luaidh againn tuilleadh air.

Deoch-slàinte, &c.

Tha nise cainnt ar dùthcha
 A' tòiseachadh air dùsgadh
 'Thoirt soluis do gach umpaidh
 'Bha 'n dùil nach robh buil innte.

Deoch-slàinte, &c.

'Us théid a nis a gleusadh
 'An àrd Oil-thigh Dhunéideann
 Am measg gach Eabhra 's Greugais--
 'Us géillidh iad uile dhi.

Deoch-slàinte, &c.

An leig sinn cainnt nan àrmunn,
 A choisinn buaidh 's na blàraibh,
 A chur air chùl le gàrlaoich,
 Gun nàire gun duinealas?

Deoch-slàinte, &c.

A' chainnt a bh' aig ar sinnsir,
 'S a labhradh leis na rìghrean
 Mu 'n d' thainig Beurl' 'an tìr so,
 Cha dìobair sinn buileach i.

Deoch-slàinte, &c.

An leig sinn cainnt nam fiùran
 A dhion ar tìr 's ar dùthaich,
 Gu'm bi i 'chaoidh 'g a mùchadh
 'S fodh mhùiseag aig burraidhean?

Deoch-slàinte, &c.

Their cuid gu'm bheil i 'cnàmh oirn,
 Their cuid gu'm faigh i bàs oirn,
 'S nach fhiach i 'bhi 'g a h-àrach
 'S a slàinte cho cunnartach.

Deoch-slàinte, &c.

Ach 's iomadh linn a thàinig
 Bho fhuair i tìr nan àrd-bheann;
 'S bidh tuilleadh ris an àireamh
 Mu 'm bàsaich a' chruinneag so.

Deoch-slàinte, &c.

LEABHAR NA CUIMHNE.

AM measg gach leabhar sean 'us ùr
 A thachras ruinn 's a chi ar sùil—
 Cha ghabh an àireamh cur an céill,
 'S cha leubh sinn móran dhiubh gu léir—
 Tha aon fhear ann 'tha daonnan dlùth,
 Nach laimhsich làmh 's nach fhaic ar sùil,
 A dh' innseas dhuinn gu tosdach bàlbh
 Mu chruth nan càirdean caomh a dh' fhalbh.

Leabhar na cùimhne 'tha 'n ar còm,
 A leanas ruinn air muir 'us fonn,
 'S a leubhas sinn air enoc no 'n cùil,
 Gun fhòghlum, solus, no fear-iùil;
 Leubhaidh am bodhar e, 's au dall,
 'S am balbh aig nach 'eil guth 'n a cheann;
 Tha cuid dheth taitneach, binn, gu leòr,
 'S cuid eile searbh 's a dhùisgeas bròn.

Chi mi ann làithean sona ciùin,
 'N uair nach robh cùram ag cur rium;
 'S ged 'tha iad fada na mo dhéigh
 Iad ùr dhomh mar an latha 'n dé;
 Chì mi gach coire, creag, 'us bruaich,
 Mu'm b' àbhaist dhomh 'bhi 'dol mu'n cuairt
 'S an òigridh chaoimhneil, laghach, bhlàth,
 'Bhiodh leam ag cluich' air feadh nam blàr.

Tha 'n lagan beag fodh sgàil nan craobh,
 'S an d' aidich Màiri dhomh a gaol,
 A' fuireach gorm bho àm gu àm,
 Gun chaochladh air bho bha mi ann.
 'S cho fad' 's a bhios mo chuimhne beò
 Bidh cruth an lagain sin na m' chòir;
 'S na briathran blàth', 's an gàire ciùin,
 'S an t-seirc gun fhoill a bha 'n a gnùis.

Bidh rìghrean ann an geall air glòir,
 'S ag iarraidh urram bho na slòigh;
 Bidh gaisgeich ann an geall air cliù,
 'S nach téid an treubhantas fodh 'n ùir:
 Ach cha robh rìgh 'bha riamh 's an fheòil,
 No gaisgeach ann am feachd na Ròimh',
 Nach robh mo shonas ris cho làn
 An oidheh' 'thug Màiri dhomh a làmh.

Mar shneachda geal air bhàrr nan geug,
 Cho boillsgeach glan ri gnùis na gréin;
 No mar an ròs air maduinn chiùin,
 A' deanamh gàirdeachais fodh 'n driùchd:
 Mar sin bha maduinn ait ar lò,
 Cho gealltanach, gun dragh gun ghò;
 Ach leagh an sneachda 's shearg an ròs,
 'S tha Màiri chaomh gu fuar fodh 'n fhòd!

Na cuspairean de'n d' rinn sinn uail,
 Gach aon dhiubh sin air an toirt uaim!
 'S na dòchasan 'bhiodh againn òg,
 Cha toir iad sòlas dhuinn ni's mò,

Tha nise saothair ghoint 'us strìth
 'Cumail ar n-inntinnean fodh chis ;
 Tha 'n t-slighe doirbh 's na cathan cruaidh
 A thachras ruinn air feadh ar cuairt.

Gach neach le'm miann 'bhi fada beò,
 'S bho 'n cuimhn' a chaoidh nach fhaigh iad leòn,
 Gluaiseadh iad sin gu dìreach, ceart,
 'Toirt géill do reachdan Rìgh nam feart ;
 'S an uair a sheallas iad 'n an déigh
 Air gnìomh an làmh 's air cainnt am béil,
 Ma bha iad sin a réir na còir
 Bidh cuimhn' a' mealtainn sin mar lòn.

Ach 's iomadh neach 'tha tùrsach tróm,
 'Us inntinn air nach éirich fonn,
 An uair a sheallas iad 'n an déigh
 Air aimideachd an giùlain fhéin,
 'S an cuimhn' ag cumail sin cho ùr
 Fa chomhair cogais 'tha 'n a dùisg,
 Ag càrnadh chlachan tróm' 'n an luchd
 'S ag cumail teine beò 'n an uchd.

'S còir dhuinn, mar sin, bho là gu là
 'Bhi dìleas ceart dhuinn fhéin 's do 'chàch ;
 'S ag còmhnaidh leis gach deòiridh truagh
 A thachras ruinn am measg an t-sluaigh ;
 Oir olc no math ge 'm bi gach beus
 'Bhios againn ann an so fodh 'n ghréin,
 'S an t-siorruitheachd air nach tig ceann
 Cha leig ar cuimhn' iad sin air chall.

AN SEANN FHLEASGACH.

AIR FOKN—"Oran na feannaig".

'FHIR a leubhas an duan so,
 Ma tha buaidh ort air thalamh,
 Mar do chòrd thu ri gruagaich
 Tha thu 'n uair a bhì 'n tarruing;
 'N uair a dh' fhalbhas a' ghruag dhiot,
 Bidh tu suarrach 'n an sealladh,
 'S 'n uair a liathas do chiabhan,
 Agus faclan do bhanaid
 A' tuiteam as.

Mar 'tha mis' aig an tràth so—
 Cha 'n 'eil stàth dhomh 'n a aithris—
 Tha mo chuailean air cnàmh dhiom,
 'S tha na dh' fhàgadh air gealadh;
 Cha 'n 'eil cruinneag 's an àite
 Nach dean gàire le fanaid
 'N uair a chi iad am blàras
 'Tha gu h-àrd air mo mhalaidh
 Cho geal ri caile.

Mo sheachd gràin air an aois so!
 Thug i 'thaobh mi dhe m' aindeoin;
 Thug i 'n ruthadh as m' aodann
 'Bha mar chaoran air mheangan;

Bha mi uair nach do shaoil mi
 Gu 'n biodh m' aogaisg cho tana,
 'N uair 'bhiodh òighean na tìre
 'S iad a' strì ga mo tharruing
 Gu bhi 'n an taic.

'N uair 'bhios balaich na dùthcha
 'Muigh a' sùgradh le'n leannain
 'S ann 'bhios mise gun diù dhiom,
 Na mo chrùban aig baile,
 Ma ni 'm Freasdal mo chùmhnadh
 Beagan ùin' air an talamh,
 Gu'm faic cuid dhiubh le'n sùilean,
 'N uair 'théid Dùghall an tarruing,
 Gu'n dean e sgath.

Ged 'tha m' fhasag air bànadh
 Tha mi slàn agus fallain,
 Dheanainn cur agus àiteach,
 'S bheirinn bàta gu cala;
 Ged nach 'eil mi cho lùthmhor
 'Dhireadh stùcan 'us bhealach,
 Dheanainn dannsa gu sunntach
 Air an ùrlar le cailaig,
 Ged 'tha mi rag.

'N uair a thig an Fhéill-màrtainn,
 Mur 'tig ànrath na m' charaibh,
 Théid mi 'bhruidhean ri Màiri,
 Caileag bhlàth agus bhanail;

Tha i math air an t-snàthaid,
 'S tha i làidir 'us fallain ;
 Ach ma dhiùltas i 'làn dhomh
 Cha 'n 'eil gràisg anns a' bhaile
 Nach bi na m' bhad.

Tha nighean eil' aig Iain Camshron,
 Agus 's dealbhach air blàr i,
 'N uair a thuiteas an t-anmoch
 Bidh i 'falbh leis an tàilleir ;
 Gheibhinn ise ri m' ghualainn
 Mur b' e 'n cuaigean gun nàire—
 Bidh e 'cluaineis mu'n cuairt dhi,
 'S a' deanamh dhuan agus dhàn dhi,
 'G a cumail ceart.

Gheibhinn nighean a' chùbair,
 Ach cha dùirichdinn gràdh dhi ;
 Tha i càmh agus crùbach,
 'S bheir i sùrdagan grànda ;
 'N uair a sheinneas i òran
 Bidh a sgòrnan 'us màin air ;
 'S bu cho taitneach an ceòl leam
 Guth na ròcais air gàradh
 'S a bhi 'n a taic.

Ach nach bochd dhomh 'bhi 'còmhnuidh
 Ann an seòmar gun mhànran,
 'S na tha 'mhaighdeannan òga
 'Dheanadh pòsadh am màireach ?

Mi gun aighear gun sòlas,
 Ach ag gròbadh 's ag càradh ;
 Agus tuill air mo mheòirean
 Ag cumail dòigh air an fhàrdaich,
 'S 'g a deanamh glan !

Nach bu mhath dhomh 's an dùbhlachd,
 'N uair 'tha smùid aig a' ghaillinn,
 Gu'm biodh bean agam dlùth dhomh
 'Bheireadh rùn dhomh mar leannan ?
 Na mheal mise mo chòta
 Mur a pòs mi fodh Challuinn !
 Bheir mi sgrìob air mo bhrògan
 'S théid mi 'chòmhradh ri Anna
 Mu'n can mi dad.



GU MA SLAN DO 'N OIGFHEAR.

AIR FOKN—" *Bha mi 'n dé 'm Beinn-dorain* ".

GU ma slàn do 'n òigfhear

A sheòl an raoir bho 'n chala so ;

Gu 'n robh gach dùil 'g a threòrach'

'S 'g a chòmhnadh mar 'bu mhath leam e ;

Cha chreidinn riamh bho chàch e

Gu 'm faca mi 's a' bhàt' e,

Gu 'm fàgadh e gu bràth mi,

'S nach robh ach bàs a sgaradh sinn.

'N uair 'dh' fhàg e air an tràigh mi

Bha m' inntinn làn 's cha 'n annasach ;

An aon fhear 'thug mi gràdh dha,

'S a thug a làmh 's a ghealladh dhomh,

Air seòladh do na h-Innsean,

'S gun fhios gu bràth an till e ;

'S bidh mise 'n so fodh mhi-ghean,

Ag cuimhneachadh a charthannais.

Marbh-phaisg air an t-saoghal,

Gur caochlaideach an sealladh e !

Cho làn a dh' fhoill 's a dh' fhaoineis

A bheir a thaobh a dh' aindeoin sinn ;

Ma leagas sinn ar n-inntinn

Air cuspair gaoil no dìleas,

Faodaidh sinn 'bhi cinnteach

Nach bi iad leinn ro mhaireannach.

Sin mar 'dh' éirich dhòmhse,
 'S cha leigheis deòir mo ghalair dhomh,
 'S mi 'n diugh ag caoidh an òigfhir
 'Bu bhòidheche 'bh' anns an fhearann so ;
 Na 'm faighinn fhéin mo dhùrachd
 Ged 'bhiodh mo chàirdean diùmbach
 Gu 'm b' e mo mhiann 'bhi dlùth dha,
 Ge b' ann fodh smùid nam marannan.

Gu ma h-olc do 'n bhàilidh
 A rinn mo ghràdh a sgaradh uam,
 'S a dh' fhuadaich thar an t-sàil e
 Gu ànrath agus allaban !
 'N uair 'chi mi thall an fhàrdach
 'S an deachaidh Ruaraidh àrach,
 'S i 'n diugh gun cheòl gun mhànrán,
 Do 'm b' àbhaist a bhi caithreamach.

'N uair 'chruinnicheas an còmhlan
 Di-dòmhnuich 's ann 'bhios smalan orm,
 'S a chi mi 'chathair bhrònach
 A bhios an còmhnuidh falamh dhomh,
 Cha 'n fhaic mi 'measg mo chàirdean
 A ghnùis 'bu chiùine deàrsadh,
 'S an t-sùil a bha cho blàth dhomh,
 'S cha toireadh càch an aire dhuinn.

N uair 'theid mi 'mach do 'n fhàsach
 A dh' fhaicinn blàth nan gleannanan,
 'S a chi mi far am b' àbhaist
 Dhomh mànrán le mo leannan ann,

Cha 'n fhaic mi ròs no neòinean
 'S cha chluinn mi cuach no smeòrach
 Nach cuir na m' chuimhn' an còmhradh
 'Bhiodh againn òg 'us aimideach.

Ach gheall e dhomh 'bhi dìleas,
 'S nach dìobradh e r' a mhaireann mi,
 'S ma théid a chliù r' a shinnsir
 Cha chuir e lin a mheallas mi,
 Ach ma 's e 's nach till e
 Bidh mise truagh a chaoidh dheth,
 'S bidh 'ìomhaigh beò na m' inntinn
 Gu 'n sìnear anns an anart mi.



A N T-U A N.

THA thus' an sin ag cluich' mu 'n tóm
 Cho aoibhneach ait gun ghò,
 Gun fhoill, gun cheilg, a' tàmh na d' chóm,
 Cho glan gun ghaid gun leòn ;
 Gun fhios agad gu 'n tig an t-àm
 'S an téid an sgian na d-fheòil,
 'S ged 'tha do chrìoch a' tarruing teann,
 Tha thu gun dragh gun bhròn.

Ged nach 'eil naimhdeas agad fhéin
 Do dhùil 'tha fodh na neòil,
 Tha mìltean ann a bheir ort beum,
 'S iad air do bheatha 'n tòir ;
 Ged 'tha thu beò gun lochd gun bheud,
 Cho ionraic air gach dòigh,
 Thig binn a' bhàis ort aig an fhéill,
 'S do reic air son an òir.

Bi 'cluich', ma ta, gu 'm bi thu sgith,
 Bi son' fhad 's 'tha thu òg,
 Cho fad' 's a dh' fhàgar thu 'an sìth
 'S do mhàthair na do chòir ;
 Bha mise uair 'us bhithinn fhìn
 A' ruith leat aig a' chrò,
 Gun smaointin air gach cath 'us strìth
 'Bha romham anns an ròd.

'S thug thusa gu mo chuimhn' an diugh
 Na làithean sona ciùin
 'N uair 'bhiodh tu 'falbh agam na m' uchd,
 'S ga d-altrum air mo ghlùin ;
 'Us bheirinn cuairt a bhuain nan lus
 A bhiodh a' fàs fodh 'n driùchd,
 'Us eòin nan geug a' seinn am puirt
 Fodh sgàil a' bharraich ùir.

Dean thusa gàirdeachas an diugh
 Air maduinn d-òige fhéin,
 Fhad 's 'tha thu slàn 'an corp 's 'an cruth
 'S gun chùram ort fodh 'n ghréin ;
 'N uair 'chluinneas mise fuaim do ghuth
 'S do chluaineis fhaoin gun chéill,
 Bidh m' inntinn thall ri taobh nan sruth
 Mu 'm bithinn leat a' leum.

Ma théid do chùmhnaidh fada beò
 Tuigidh tu 'n sin mar chàch,
 Nach 'eil 's an t-saoghal so ach sgleò—
 'S cha bhi sinn ann ach geàrr ;
 Ma gheibh sinn aodach agus lòn
 Cha bhi sinn fada ceàrr,
 'S ma bheir iad dhut-sa criomadh feòir
 Tha d-aodach ort mar tha.

DOMHNUL CRUAIDH AGUS AN CEARD.

BHA gille còir 's a' bhail' ud shuas
 Air am bheil sgeula bochd r' a luaidh,
 'N uair 'thachradh dha 'bhi thall air chuairt
 Mu thigh an òil—
 Mhilleadh e 'n sin gach sgillinn ruadh
 Dhe 'chuid a' pòit.

Is iomadh oidhche, fliuch 'us sgìth,
 A chluinnt e suas e troimh na glinn,
 'Us luinneag aig' air òran binn,
 Mur 'biodh e làn ;
 Ach mar 'bu tric' b' e taobh an tuim
 A leabaidh tàimh.

Chaidh 'innse 'Dhòmhnull mìltean uair
 Nach biodh e 'chaoidh 'n a dhuine buan,
 'S gu 'n tigeadh crìoch air a bhiodh truagh—
 'Us sin gun dàil ;
 Ach cha do thuig e fhéin no 'n sluagh
 Gu 'm b' ann le ceàrd.

Air oidhche ghruamach, ghreannach, fhuar,
 Mu eadar dà-uair-dhiag 'us uair,
 Bha smùdan math air Dòmhnul cruaidh,
 Ach ged a bha,
 Chaidh aig' air dìreadh ris a' bhruaich
 Gun mhóran spàirn.

Ach cha robh fios aig air gach buaidh
A thug a dhùirn do Dhòmhnull cruaidh,
'S a liuthad cath 's 'n do chuir e 'n ruaig
Air laoch a b' fheàrr
Na luidean bochd, gun fhuil gun uailh,
A dh' ablach ceàird.

Thug Dòmhnall ceum no dhà gu taobh,
'S sheas e gu daingeann air an fhraoch,
Sheall e mu 'n cuairt dheth air an laoisg
' Bu mhiosa greann ;
'S thuig e gu 'm b' fheàrr dha cumail saor
Na 'dhol 'n an ceann.

Ach dhruid na naimhdean air mu 'n cuairt,
'Us cha robh aig' ach bàs no buaidh—
“Obraich a nis, a Dhòmhnuill chruaidh,”
Thuirt e ris fhéin.

“ 'S ged 'chailleadh tu do cheann 's do ghruag,
Gu bràth na géill ”.

Thòisich an slachdadh thall 's a bhos,
'Us sguir a' phìob 'us gàir nan dos ;
Ach cha d' thug sin am blàr gu cìos,
No coltas sìth—
Bha Dòmhnall cruaidh 's an ceàrd Iain Ros
Cho garg a' strìth.

Ach chaidh an ceàrd a chur ri làr,
'S bha 'n cuiridh, Dòmhnall cruaidh, gu h-àrd—
Chuir sin an euthach glan air càch,
An rìgh 's an triath
'Bhi air a cheannsachadh le tràill
Nach fhac' iad riamh.

Chruinnich gach duine, bean, 'us clann ;
Rug iad air chasan air 's air cheann—
Gach poit no cuach, gach spàin 'us bann,
'N an sad mu 'dhruim—
Dhùisgeadh mactalla Chreag-nam-meann
Le fuaim a chuim.

Sgapadh an teine 'n ear 's an iar,
'S an ceàrd ag eubhach “ sleagh no sgian ”
A chuireadh air a nàmhaid crìoch
‘An ùine gheàrr ;
Ach rinn an dorchadas a dhion
Bho ghniomh cho nàr.

Cha chluinnte nis ach “ Och ” ’us ràn,
 ‘Us tarruing ghruag ’us bualadh làmh ;
 Ach fhuair mo Dhòmhnull cruaidh á sàs,
 Gu fuilteach fann,
 ‘S e ’toirt a mhallachd air a’ cheàrd
 A mhill a cheann.

Tha nis an gaisgeach, Dòmhnall cruaidh,
Gu tosdach balbh ag cnàmh 's an uaigh ;
Eadar a' mhisg agus droch fhuachd
 'Us cath a' cheàird,
Chaidh Dòmhnall còir a sgaradh uainn
 Gu tìr a' s fheàrr.



CLANN NAN GAIDHEAL.

Chaidh na rainn so a leubhadh aig coinneamh bhliadhnail
Comunn Gàidhealach Oil-thigh Dhunéideann.

A CHLANN nan Gàidheal 'us nan gleann,
'Chaidh 'àrach ann an tìr nam beann,
'S math leam bhur faicinn slàn gun sprochd
'S an t-seòmar bhoillsgeach so an nochd ;
Cruinn gu 'bhi 'g éisdeachd cainnt nan sonn,
A labhair Oisean, Fionn, 'us Goll ;
Cruinn gu 'bhi 'g éisdeachd cliù nan laoch
'Chaidh 'àrach ann an tìr an fhraoich.

Ged 'tha ar dùthaich corrach cruaidh,
Le creagan àrd ri gàir a' chuain,
'S na beanntan gruamach os an cinn,
'S na h-uillt le 'n caithream troimh na glinn,
Gur iomadh gaisgeach, treubhach, tróm,
A dhearbh a làmh air muir 's air fonn,
'Chaidh àrach suas mu 'stùcan cas,
'S a dh' òl á sruth nam fuaran bras.

Ge lionmhor feachd a dh' fhiach ri 'n claidh,
Cha d' thug an nàmh iad riamh fodh chis ;
B' fheàrr leis a' Ghàidheal mìltean bàs
Na uair dhe 'bheatha 'bhi 'n a thràill ;

Sheas iad mar charraig dhaingeann theann,
 A dhion an còir air tìr nam beann ;
 'S dh' fhàg iad an cliù gun smal do 'n àl,
 Cho fad' 's a bhuaileas tonn ri tràigh.

'S tha sinne, 'n sliochd, an so 'n an déigh,
 A' deanamh luaidh air cuid de 'm beus,
 'S a' deanamh uail á cainnt 's á gnìomh
 Nam fiùran a bha fearail fial ;
 'S feumaidh sinn seasamh mar 'bu dual
 A dhion ar tìr 's a dhion ar sluaigh,
 'S ag cumail suas ar cuibhrinn fhéin
 De chliù ar dùthcha, 's cainnt nan treun.

Seasaibh gu duineil suas le colg,
 'N aghaidh gach coigreach coimheach borb
 'Tha 'g iarraidh fàsachadh nan gleann,
 'S nach còir a' Ghàidhlig a bhi ann ;
 An tìr a bh' aig ar sinnsir riamh
 A dhòirt am fuil gu tric 'g a dìon ;
 An tìr a cheannaich iad cho daor,
 Air son gu 'm biodh an gineal saor.

'S ar cànan aosda, blasda, binn,
 A labhradh leo air feadh gach linn—
 Bhiodh fuaim a ciùil 'an cùirt nam fleadh,
 'S bhiodh fuaim a guth an cath nan sleagh,
 A' dùsgadh spiorad treun an t-sluaigh
 A thoirt an còir a mach le buaidh ;
 'Us mheasadh iad mar urram àrd
 Gu 'n cluinneadh iad an ainm 's an dàn.

Ach c' àit' a nis am bheil na suinn
 A dhion ar srathan 'us ar glinn?
 'Us c' àit' am bheil gach dachaidh bhlàth
 'S am faigheadh coigreach bochd a shàth?
 Far an robh ceòl, 'us neart, 'us sluagh,
 Cha chluinnear pìob, 's cha chluinnear duan,
 'S cha 'n fhaicear òighean maiseach òg'
 'S a' mhaduinn Chéitein aig a' chrò!

Tha 'n sliochd air sgaoileadh thall 's a bhos;
 'N an dùthaich fhéin cha 'n fhaigh iad clos,
 'Cosnadh an lòn feadh iomadh tìr,
 'S 'n an dùthaich fhéin nach fhaigh iad sìth;
 Ach ge b' e àit' anns am bi 'n cuairt,
 'S a' bhaile-mhór no thall thar chuan,
 Cha chaill iad cuimhn' air tìr nam beann,
 'S air cliù nan gaisgeach treun a bh' ann.

Théid ac' ar sgaradh bho na glinn,
 'S ar fuadach as gun lagh gun bhinn;
 Ach cha téid ac' ar cliù mar shluagh,
 No cainnt ar màthar a thoirt uainn;
 Ged 'théid bhur dealachadh bho 'n fhonn,
 Biodh cridh' a Ghàidheil ann bhur cóm;
 'S dearbhadh bhur giùlan aig gach àm
 Gur ' h-airidh sibh air tìr nam beann.

Leanaibh bhur sinnsir anns gach ceum,
 'Bha dìleas deas 'an àm an fheum:
 Mar leómhainn gharg' air raoin a' chath,
 'S cho suairce sèimh 'an cùirt nam flath.

Seasaibh bhur dùthaich 'us bhur cainnt,
'S air beachd nan Gall na tugaibh taing;
'Us théid bhur n-eachdraidh glan gun bheud,
Air feadh gach linn a thig 'n 'ur déigh.



SEALLADH AIR OISEAN.

AIR feasgar ciùin, sàmhach, 's an earrach,
 'S mi 'teàrnadh bho bhearradh nam mór-
 bheann,
 An smeòrach a' seinn air gach bealach,
 'S na h-uillt a' dol thairis le 'n crònan,
 Gu 'n d' fhuair mi 's an àite sin sealladh
 'Rinn m' inntinn 'us m' anam ro bhrònach;
 'S ma dh' fhaodas mi cuibhrionn dheth 'aithris,
 Na measaibh an ealain so gòrach.

'N a shineadh fodh spògan na daraig
 Bha laoch a bha fearail 'n a chòmhradh,
 Bha 'fhiasag 's a ghruag mar an canach
 Mu 'ghuaillean 's mu 'bhrailleach 'g an còmh-
 dach;
 Bha 'chlàrsach ri 'thaobh air a' charraig
 'S a teudan 'g an tarruing fodh 'mheòirean;
 'Us sheinn e na rainn so a leanas :—
 Na'm b' eòl dhomh an aithris air dòigh dhuibh—

“ Thig làmh rium, a chlàrsach mo sheanar,
 Bu bhinn leam thu 'n earrach na h-òige,
 'N uair 'bhuailinn do theudan le deannal
 'An àm a bhi 'tional nan cònhlan;

'An talla na h-uail 'us na caithreim,
 'S an cluinnte mar aingil na h-òighean,
 'Toirt ciùil dhuinn air cliù an cuid leannan,
 'S air euchd an cuid lannan 's a' chòmhstri.

Thig lànfh rium, a chlàrsach, car tamuill,
 'S gu 'n seinn sinn, mu 'n dealaich sinn, òran,
 Mu 'n càirear gu bràth sinn 's an talamh,
 'S gun aon ann a mhealas ar còmhradh;
 Na glinn a bha làn tha iad falamh,
 Gun daoine, gun tighean, gun cheòl annt',
 Tha 'm bàrd 'dheanadh dàn agus ealain,
 'S an clàrsair nan cadal fodh 'n fhòd ann.

Ach c' àit 'eil na h-àrmuinn 'bha duineil,
 'Chaidh 'àrach mu mhullaich a' cheò ud?
 'N do bhàsaich an t-àlach ac' uile
 'S na glinn so gun duine gun chòmhnuidh?
 Cha chluinn mi ann Gàidhlig no luinneag,
 Ach nuallan na tuinne cho brònach.
 Tha caoirich 'us féidh air gach tulach,
 'An àite nan cuiridh a b' eòl dhaibh.

'N do chaochail na laoich a bha gaisgeil,
 A cheannsaicheadh feachdan 's a' chòmhrag,
 Gu buadharra, cruadalach, smachdail,
 Nach lùbadh fodh chasan luchd-fòirneirt;
 Fodh shuaicheantas luaineach am brataich,
 'S na pìoban le 'n caismeachd ri ceòl dhaibh,
 'Cur fuinn air na suinn 'bha gun ghaiseadh,
 Nach tionntadh le taise 's an tòrachd?

Ach sgaoileadh an iar 'us an ear iad
 Bho dhùthaich an seanar 's an eòlais,
 An dùthaich a dhion iad cho fearail,
 'S a dhòirt an cuid fala 'g a còmhnaidh,
 Na fàrdaichean blàth' agus geanaill,
 An diugh cha 'n fhaigh ainneis a lòn annt',
 'N an làraichean fàsail fodh smalan,
 Ag caoidh mar a sgaradh an glòir dhiubh.

Ge tric 'thainig naimhdean le caithream
 'Thoirt cìs dheth ar fearann le dò-bheairt,
 Le 'n airm-chogaidh rùisgt' air an tarruing,
 'Teachd dlùth do ar cala le mór-chuis;
 'S ann 'phill iad gun inntinn gun anam,
 Le àireamh 'bu ghainne na 'thòisich,
 Mar 'philleas na garbh-thuinn bho 'n charraig
 'Ni gàire le fanaid ri 'm bòileich.

Nach caochlaideach, faoin, agus carach,
 An saoghal so 'mhealladh gach seòrsa?
 Tha linn agus linn a' dol thairis
 'S cha till iad a dh' aithris an sgeòil dhuinn;
 'Us càirdean mo ghràidh-se nach maireann,
 A sheasadh mar charraig 's a' chòmhraig,
 Ge b' àrdanach, laidir an ceannas,
 Tha 'n àlach gun fhearann gun chòmhnuidh.

Ach slàn le mo chàirdean nach maireann,
 'S le glinn agus beannaibh mo shòlais;
 'Us slàn leis na fiùranan fallain,
 'S le ciùil agus caithream na h-òige;

'Us leibh-se, mo rìbhinnean geala,
 Mar reultan gun smal ag cur sgleò orr' ;
 Cha chluinn mi 'n guth biun aig an ainnir
 A' seinn aig a' mhainnir gu ceòlmhor !

Tha 'n ceò ag cur smùid mu na meallan,
 'S tha mise fodh 'n daraig na m' ònar,
 Tha bròn agus tùrsa air m' anam
 'S an nochd cha tig caraid ga m' fheòrach ;
 Ach slàn leat, a chlàrsach mo sheanar,
 Chaidh crìoch air gach ealain 'us òran,
 'Us càirear gu bràth sinn 's an talamh,
 'S gun aon ann a mhealas ar còmhradh ! ”



M' ANNSACHD.

AIR FOKX—" *Moladh na Lannulaidh* ".

THOIR an t-soiridh so gu m' rùn,
An té dhonn a 's guirme sùil,
Cóm a' mhànrain, 's bial a' chiùil—
'S tha iomadh cliù air m' annsachd.

Na mo chadal 's na mo dhùisg
Bidh a cruth 'am beachd mo shùl,
'S bidh mo chridhe tróm gun sunnt
Gu 'm faigh mi dlùth do m' annsachd.

Cha 'n 'eil ròs a' fàs fodh 'n driùchd,
Cha 'n 'eil sneachd' air bhàrr nan stùc,
'S cha 'n 'eil nighean rìgh no diùc,
A 's glaine gnùis na m' annsachd.

Ged a mhill i orm mo chiall
'S i mo roghainn i 's mo mhiann—
Cha 'n 'eil ceum a ni mi 'thriall
Nach fhaic mi iomhaigh m' annsachd.

'S truagh nach robh mi le mo ghràdh
Far nach fhaicte sinn le càch,
Gus an innsinn dhi mo chàs,
'S mar 'tha mi 'n sàs aig m' annsachd.

'N uair a théid an tigh gu tàmh
 Bidh mi 'sgrìobhadh aig mo chlàr
 Gus am bheil mo ghruag air cnàmh
 A' deanamh dàin do m' annsachd.

'S ged a leanainn air gu bràth,
 Cha chuir sin mo ghaol ni 's fheàrr,
 'S ni mi 'chrìochnachadh 'n a thràth,
 'S a chur thar sàl gu m' annsachd.

'S mar a faigh mi oirre còir
 Bidh mi truagh dheth ri mo bheò;
 Cha 'n 'eil ni 'tha fodh na neòil
 A bheir dhomh treòir ach m' annsachd !



AN UAIGH.

Do 'n t-seòmar bheag so thig gach aon,
 Ged 'tha e dorchà, cumhann, caol,
 'S caidlidh iad uile taobh ri taobh,
 Gu sìochail réidh ;
 An so gheibh luchd na trioblaid saor
 Bho 'n dragh gu léir.

Tha 'n òigh an so 'bu bhinne guth,
 'Bu ghile làmh 's bu ghrinne cruth,
 'S a còm a bha mar eal' an t-sruth,
 Gun dreach gun bhlàth ;
 'S a cuailean dualach, clannach, dubh,
 Gun chìr air cnàmh.

Gach bochd 'us beairteach, lag 'us treun,
 An duine baoth 'us fear na céill,
 Cha 'n aithnichear aon dhiubh seach a chéil',
 An so fodh 'n fhòd ;
 'S có dhiubh a b' ole no math am béus
 An tìr nam beò !

Bho linn gu linn tha thusa, 'uaigh,
 Gun diobradh ag cur as do 'n t-sluagh,

Gun iochd, gun fhaireachadh, gun truas,
 Ri glaodh nam bochd,
 'Tha tric 'n an seasamh air do bhruaich
 Ag caoidh fodh sprochd !

Is iomadh dlleachdan gun treòir,
 'Us bantrach bho chd a rinn thu 'leòn,
 Le 'm maotharanan lag gun ghò,
 Gu falamh, fuar ;
 'S am fear a choisneadh dhaibh an lòn
 Gu balbh fodh d' bhruaich !

Ach 's coma leat-sa rìgh no tràill,
 Nì thu 'n t-aon chàirdeas ris na dhà,
 'S feumaidh sinn uile teachd na d' dhàil,
 'N uair 'thig an t-àm ;
 'S e sin a thachair do gach àl
 'Us linn a bh' ann !

Cha 'n 'eil 's an uaigh ach duslach fuar,
 'Us gheibh an ùir na thug i uaith',
 Ach c' àit' am bheil an t-anam buan
 'Bhios siorruith beò ?
 Cha tig a h-aon air ais de 'n t-sluagh
 A dh' innse 'n sgeòil !

Gach linn a thig no 'thàinig riamh,
 Tha 'n uaigh gun sgr 'g an slugadh sios,
 Tha aois 'us òige 'ruith gu dian,
 'S a' tuiteam leis,

Ach c' àit' am-bheil iad uil' a' triall?
'S i sin a' cheist!

Tha sin 'am falach air gach sùil
Ach gliocas siorruith Rìgh nan dùl,
'S 'n a lainh-san fàgaidh sinn ar cùis,
Do 'n aithn' ar neart—
Ughdar gach sonais, beath', 'us iùil—
Ni Esan ceart.



TRANSLATIONS.

TRANSLATIONS.

THE MAID OF BALLYCHRO.*

(Translated by Mr. D. Mackay.)

ONE day I roam'd among the heights
Where crag on crag is piled,
Where antler'd herds delight to dwell
'Mong gorges lone and wild :
A hoary mist fell on my path,
Night's shades were falling low,
When like a star shone on my way
The Maid of Ballychro.

In accents sweet she calmed my fears,
And kindly bade me stay
Until the sun with kindly beam
Should chase the clouds away ;
A couch of heather, soft and dry,
She would for me prepare,
And to my wants and comforts all
Attend with willing care.

There's many a dewy rosebud red
Ne'er praised by human tongue,

* For the Original see page 21.

There's many a beauteous maiden bright
 That minstrel ne'er has sung ;
 But never did the dewdrop rest
 On rose so sweet and rare,
 Nor Beauty grace a court or hall
 Like Mary young and fair.

Though I might wed a lady fair
 With coffers filled with gold—
 That riches bring but cross and care
 'S a tale that oft was told—
 I'd rather list the cuckoo's voice
 As through the glen I'd go
 Among the kine, alone with thee,
 Fair Maid of Ballychro.

And when so light at dewy morn
 She treads the heather bell,
 And tunes her joyous matin lay
 Down in the hazel dell ;
 The birds that carol to their brood
 Upon each leafy bough
 In silence listen to thy lay,
 Fair Maid of Ballychro.

Her eye, so beaming soft and mild,
 Bespeaks a mind that 's pure,
 Her graceful form and bounding step
 A healthy frame ensure ;
 Sweet beauty, modesty, and love,
 Enrobe her white as snow—

A lily by the fountain thou,
Fair Maid of Ballychro.

May richest blessings crown her life
In gladness as of yore—
Her lovely face and image bright
Shall haunt me evermore ;
My mem'ry shall with fondness dwell,
Till death shall lay me low,
On her who first inspired my lay,
The Maid of Ballychro.



THE DRUNKARD'S HOME.*

(Translated by Mr. P. Macnaughton.)

UPON a cold dark winter night,
 As I came up the street,
 With hail-stones, driven by northern wind,
 Fast falling round my feet,
 A puny boy, with eyes in tears,
 And features thin and wan,
 Came, wringing both his little hands,
 And wailing as he ran.

His home-made garb was scant and thin,
 His bones the shreds came through ;
 While through each rent the frosty wind
 With chilling keenness blew.
 " My little boy," I kindly said,
 " Why hast thou hither come,
 When every creature in the land
 Finds shelter in its home ?"

" Och ! " in calm words to me, he said ;
 His eyes suffused with tears ;
 " My father, up in yonder inn
 Is drunk among his peers ;

* For the Original see page 57.

My wretched mother dying lies,
 With baby at her breast—
 In death, I fear, ere morning comes,
 That she will be at rest."

I with him then retraced my steps,
 To find if it were so ;
 For the wise Preacher has advised
 So seek the house of woe ;—
 If done in earnest, and for peace,
 The smallest gracious thing
 Shall never unrewarded go
 By Heaven's glorious King.

When we came to the naked home
 There was no song of joy,
 But from each pining feeble breast,
 The plaint and heavy sigh ;
 The wife was lying on the floor,
 Stretch'd on a thin cold board ;
 While eight or nine young children by
 For sustenance implored.

What mother but would sickly pine
 To hear their famish'd cry,
 And see the infant of her breast
 Unwarm'd, unnourish'd lie,
 While he who should be their support,
 O'er-ruling them in love,
 But scared them with his angry voice,
 Whose ways their death would prove ?

Though every wild beast of the fields
 Provides its young with food,
 And every bird that cleaves the air
 Sustains its callow brood ;
 The drunkard, destitute of sense,
 Indulging a vile crave,
 Cares not for children, nor for kin :
 To appetite a slave.

But there are many in our land,
 Who bring their race to need,
 Instead of rearing them with care,
 Despoiling them through greed ;
 Depriving them of food and clothes,
 Wherein they pride should take,
 Thus leaving them inert and weak
 The drouth for drink to slake.


And many a modest gentle maid,
 Famed for her virtues rare,
 Brought up in comfort and in love
 Beneath her parents' care,
 Has taken to a wasteful sot,
 Coarse, cruel, and unwise ;
 Who always wretched made her life,
 And closed in death her eyes.

As I stood pondering on the ills
 Which drunkenness records,
 The wretched father blustering came,
 And wrathful were his words ;

Staggering, falling on each side,
 A thrall by drink o'erpower'd,
 Fierce-swearing at his little ones,
 Who at his presence cower'd ;

And fiercely swearing at his wife,
 Demanding light and fare,
 And threat'ning vengeance on her head
 For things that were not there ;
 But though her frame was very weak,
 And though her end was near,
 Her eye in pity on him dwelt,
 While moved her lips in pray'r.

Hoping his courses would be changed
 By the all-Good and Wise
 Ere comes the Judge with angry frown,
 Ere close in death his eyes,
 She left him and her children calm
 With Him the orphan's stay,
 And closed her eyes in lasting sleep
 Till the Eternal Day.



THE DESERTED GAEL.*

(Translated by "Fionn".)

THE darkness descends
 From the wings of the night,
 And the mist is encircling
 The steep mountain height ;
 The friends of my childhood
 Have from me been torn ;
 Alone in this valley
 They've left me to mourn.

The birds 'mong the branches
 Are singing their lay,
 And leaping with joy
 'Mong the sweet-budding spray ;
 Their offspring around them
 Are happy and gay,
 But mine have, by death,
 All been taken away !

My brow now is furrow'd
 And shaded with gloom,
 For my help-mate once cheerful
 Is laid in the tomb ;

* For the Original see page 69.

And three little children—
 Our joy and reward—
 Now sleep in the churchyard
 Beneath the green sward.

When Winter, stern tyrant,
 Makes all things look bare,
 To a kindlier climate
 The songsters repair ;
 Returning when Summer
 Decks valley and lea—
 No seasons can e'er bring
 My friends back to me !

The homes of our fathers
 Are bleak and decayed,
 And cold is the hearth
 Where in childhood we played ;
 Where the hungry was fed
 And the weary found rest,
 The fox has his lair,
 And the owl has her nest.

No herd-boy's shrill whistle
 Is heard in the vale,
 No milk-maid at gloaming
 Hies out with her pail,
 Where oft I have heard
 Her sweet song to the fold—
 Her rich golden ringlets
 How fair to behold !

The chanter is silent—
No harper is found,
To waken the echoes
From slumbers profound ;
The lads once so buoyant
In innocent mirth,
Oppression has reft
From the land of their birth.

Success to the living
And peace to the dead—
The gloaming of life
Now encircles my head ;
In the grave I'll soon rest
With the friends gone before,
Where sorrow and pain
Shall oppress me no more.



WHERE I WAS YESTREEN.*

(Translated by Mrs. Mary Mackellar.)

NANE can tell in a' the warl'
 Where I was yestreen ;
 Nane was near but Mary Allan,
 Where I was yestreen ;
 Dear the vows gat frae my lassie
 'Neath the birken screen,
 In the glen sae fresh an' grassy,
 Where I was yestreen.

Sweet the wild birds sang their carols
 Where I was yestreen ;
 Dancin' on the boughs sae happy,
 Where I was yestreen ;
 Honey dew like incense drappin'
 Frae each leaf sae green ;
 An' nae city dust tae darken
 Where I was yestreen.

What cared we for moonbeams gowden
 Where I was yestreen ?
 Wavin' boughs were bendin' owre us
 Where I was yestreen ;

* For the Original see page 79.

'Mang the daisies white an' bonnie
 Wi' my fairy queen,
 Swift the hours flew licht an' happy
 Where I was yestreen.

What cared we for warly treasure
 Where I was yestreen?
 Gowd nor lan' could e'er gie pleasure,
 Where I was yestreen;
 Ne'er for ony royal palace
 Deck'd in silken sheen,
 Wad I leave the grove sae rashy
 Where I was yestreen.

Whilst I live my heart will linger
 Where I was yestreen;
 Wi' the maid sae kind and tender,
 Where I was yestreen;
 Till I'm laid in death's cold fetters,
 Nought can change, I ween,
 All I vow'd to Mary Allan
 Where I was yestreen.



April 1883.

LIST OF GAELIC BOOKS

And Works on the Highlands

PUBLISHED AND SOLD BY

MACLACHLAN & STEWART,

BOOKSELLERS TO THE UNIVERSITY,

63 & 64 SOUTH BRIDGE, EDINBURGH.

A liberal discount allowed on orders for exportation
or for private circulation.

DICTIONARIES AND GRAMMARS.

M'Alpine's Gaelic and English Pronouncing Dic-	s.	d.
tionary, with Grammar, 12mo, <i>cloth</i> ,	9	0
... Ditto ditto, <i>hf.-bound calf</i> ,	11	0
... English and Gaelic, separately, <i>cloth</i> ,	5	0
... Gaelic Grammar, 12mo, <i>sewed</i> ,	1	0
M'Leod and Dewar's Gaelic Dictionary, <i>cloth</i> ,	10	6
Macbean's Lessons in Gaelic, ...	1	0
Mackay's Gaelic Etymology of the English		
Language, royal 8vo, ...	42	0
MacPherson's Practical Lessons in Gaelic for the		
use of English-speaking students, ...	1	0
Munro's Gaelic Primer and Vocabulary, 12mo,	1	0
Stewart's Elements of Gaelic Grammar, <i>cloth</i> ,	3	6
Gaelic First Book, 18mo, 2d.; Second do., ...	0	4

Alleine's Alarm to the Unconverted, ...	1	6
... Saint's Pocket Book, <i>cloth</i> , 1s. <i>sewed</i> ,	0	6
An T-Oranaiche, by Sinclair, 8vo, <i>cloth</i> ,...	10	6
Assurance of Salvation, 18mo, <i>sewed</i> ,	0	6
Baxter's Call to the Unconverted, 18mo, <i>cloth</i> ,	1	6
... Saint's Rest, translated by Rev. J. Forbes,	2	6
Beith's Catechism on Baptism, 18mo, <i>sewed</i> ,	0	1
Beuton, S. Dioghlumean, 'S Na H-Achaibh, ...	1	6
Bible in Gaelic, 8vo, <i>strongly bound in leather</i> ,	7	6
Bonar's (Rev. Dr H.) Christ is All, 18mo, <i>sewed</i> ,	0	3
... God's Way of Peace, <i>cloth</i> ,...	1	0
Buchannan (Dugald) of Rannoch's Life and Con-		
version, with his Hymns, 18mo, <i>cloth</i> ,	2	0
... The Hymns, separately, 18mo, <i>sewed</i> ,	0	3
Bunyan's Come and Welcome, 18mo, <i>cloth</i> ,	2	0
... World to Come, or Visions from Hell, <i>cloth</i> ,	1	6
... Grace Abounding, 18mo, <i>cloth</i> ,	2	0

64 South Bridge, Edinburgh.

Gaelic Books Sold by MacLachlan and Stewart.

	<i>s.</i>	<i>d.</i>
Bunyan's Pilgrim's Progress (<i>three parts</i>), <i>cloth</i> , ...	2	6
... Water of Life, <i>cloth</i> , ...	1	0
... Sighs from Hell, 18mo, <i>cloth</i> , ...	2	0
... Heavenly Footman, 18mo, <i>cloth</i> , ...	1	0
Burder's Village Sermons, 18mo, <i>cloth</i> , ...	1	6
Catechism, Shorter, 1d. Gaelic and English,	0	2
Celtic Lyre, a collection of Gaelic Songs, with		
English translations, music in both notations,		
Part I., ...	0	6
Celtic Magazine, Monthly, ...	0	6
Clark's (Mrs) Three Gaelic Poems, with English		
translation by Kennedy, ...	0	6
Clarsach Na Coille; a Collection of Gaelic Poetry,		
by Rev. A. M'Lean Sinclair, ...	3	6
Confession of Faith, fcap. 8vo, <i>cloth</i> , ...	2	6
Dewar's (Rev. Dr) Gaelic Sermons, 8vo, ...	0	4
Doctrine and Manner of the Church of Rome, ...	0	3
Doddridge's Rise and Progress, 12mo, <i>cloth</i> , ...	3	0
Dyer's Christ's Famous Titles, 18mo, <i>cloth</i> , ...	2	6
Earle's Sacramental Exercises, 18mo, <i>cloth</i> , ...	1	6
Edwards' (Rev. Jonathan) Sermon, <i>sewed</i> , ...	0	2
Gael (The), a Gaelic Magazine, bound in cloth,		
for 1876 and 1877, in English and Gaelic, ...	7	6
Gaelic Song Book, the Highland Minstrel, ...	1	0
Grant's (Rev. Peter) Hymns, 18mo, <i>cloth</i> , ...	1	6
Guthrie's Christian's Great Interest, 18mo, <i>cloth</i> , ...	2	0
Hall's (Newman) Come to Jesus, ...	0	6
Harp of Caledonia, Gaelic Songs, 32mo, <i>sewed</i> , ...	0	4
Haughton's "A Saviour for You," ...	0	2
History of Prince Charles, and Jacobite Songs, ...	3	0
Job to Ecclesiastes, 12mo, <i>bound</i> , ...	0	6
Joseph, Life of, by Macfarlane, 18mo, <i>cloth</i> , ...	1	6
Joseph, History of, 18mo, <i>sewed</i> , ...	0	4
Laoidhean Eadar-Theangaichte o'n Bheurla, <i>cloth</i> ,	0	6
Lessons on the Shorter Catechism and the Holy		
Scriptures, by Forbes, 18mo, ...	0	4
Livingston's Gaelic Poems, <i>cloth</i> , ...	2	6
M'Callum's History of the Church of Christ, 8vo,	4	0
Macdonald's (Mac Mhaistir Alistir) Gaelic Songs,	2	0
Macdonald's (Rev. Dr) Waters of Jordan, 18mo,	0	2
M'Innes (Rev. D.) Conversations in Gaelic and		
English, with preface by Professor Blackie,	1	0
M'Intyre's (Duncan Ban) Poems and Songs, with		
an English Translation of "Coire Cheathaich"		
and "Ben Dorain," 18mo, ...	2	0
Mackay's (Rob Donn) Songs and Poems, 18mo,	2	6

Gaelic Books Sold by MacIachlan and Stewart.

	s.	d.
Mackenzie's (A.) History of Scotland, Eachdraidh na H-Alba, 12mo, <i>cloth</i> ,	3	6
Mackenzie's (J.) Beauties of Gaelic Poetry, <i>large paper edition</i> , royal 8vo,	21	0
Mackellar's (Mrs) Gaelic and English Poems, ...	3	6
... Tourists' Hand-Book of Gaelic and English Phrases, with Pronunciation,	0	6
Macleod, Rev. Dr, Sermon on the Life of the late, by Rev. John Darroch, 8vo, <i>sewed</i> ,	0	6
Macleod, Rev. Norman, Caraid nan Gaidheal, 8vo, <i>half-bound calf</i> ,	18	0
... The Same, 15 parts, each	1	0
MacLean and Macgregor's Gaelic Hymns, 18mo,	2	0
Macneill's Neniae, and other Poems, <i>cloth</i> ,	2	0
Macpherson's "An Duanaire," a New Collection of Songs, &c., <i>never before published, cloth</i> ,	2	0
Menzies' Collection of Gaelic Songs,	3	6
Mountain Songster, Collection of Original and Selected Gaelic Songs,	0	6
Muir's Sermon "Cumail Gu Daingean samhladh Bhriathar Fallain, translation by Rev. A. Macintyre,	0	2
Munro's Selection of Gaelic Songs, 32mo,	0	4
... Am Filidh, Gaelic Songs, with Music,	1	0
Nicolson's (Sheriff) Collection of Gaelic Proverbs, with English Translation, cr. 8vo, <i>2nd edition</i> ,	6	0
... The same, large paper, 4to,	21	0
Ossian's Poems, revised by Dr M'Lauchlan, <i>cloth</i> ,	3	0
Ossian's Lyre (Clarsach Oisein), <i>old and new notations</i> , Nos. 2 and 3, per doz.	1	6
Philipps' Seven Common Faults, translated by Rev. H. Maccoll, 12mo,	1	0
Proverbs of Solomon, 8vo, <i>sewed</i> ,	0	2
Psalm Book, Smith's or Ross's, large type, 18mo,	2	0
Psalm Book, Gaelic and English, on one page,	1	6
Queen (H. M.) Our Journal in the Highlands, Illustrated, translated into Gaelic by Rev. I. P. St Clair,	5	0
Ross's (William) Gaelic Songs, 18mo, <i>cloth</i> ,	1	6
Sankey's Hymns for Times of Blessing, translated by Rev. A. MacRae,	0	1
Sinner's (The) Friend, 12mo, <i>sewed</i> ,	0	3
Smith's (Rev. Dr J.) Sean Dana, with English Translation and Notes, by C. S. Jerram,	2	6
... Gaelic Prayers for Families, 12mo, <i>sewed</i> ,	1	0
... The same, <i>cloth</i> ,	1	6

Gaelic Books Sold by MacLachlan and Stewart.

	<i>s.</i>	<i>d.</i>
Sum of Saving Knowledge, 12mo, <i>sewed</i> , ...	0	4
Thomson's (Dr) Sacramental Catechism, <i>sewed</i> , ...	0	2

ENGLISH WORKS RELATING TO THE
HIGHLANDS.

Antient Erse Poems Collected among the Scottish Highlands, in order to Illustrate the OSSIAN of Mr Macpherson, 8vo, <i>sewed</i> , ...	1	0
Blackie's (Prof.) Language and Literature of the Scottish Highlands, 8vo, <i>cloth</i> , ...	6	0
... Altavona : Fact and Fiction : from my Life in the Highlands, ...	7	6
Brown's History of the Scottish Highlands, Highland Clans, and Regiments, with Portraits and Tartans, by Keltie, 2 vols., 56s. for	40	0
Gregory's History of the Western Highlands and Isles of Scotland, 8vo, <i>cloth</i> , ...	12	0
Lauder (Sir J. Dick) Highland Legends, <i>cloth</i> , ...	6	0
... Tales of the Highlands, <i>cloth</i> , ...	6	0
Logan's The Scottish Gael, or Celtic Manners of the Highlanders, 2 vols., <i>plates</i> , 28s. for	15	0
Macgregor's Life of Flora Macdonald and her adventures with Prince Charles, <i>cloth</i> , ...	3	6
M'Intyre (Rev. D.) on the Antiquity of the Gaelic Language, 8vo, <i>sewed</i> , ...	1	6
Mackenzie's Tales and Legends of the Highlands, ...	2	6
... History of the Mackenzies, ...	25	0
... History of the Macdonalds, 8vo, <i>cloth</i> , ...	25	0
... History of the Mathesons, 8vo, <i>cloth</i> , ...	10	6
... Prophecies of the Brahan Seer, ...	2	6
... History of the Highland Clearances, ...	7	6
Maclagan's Scottish Myths, Notes on Scottish History and Tradition, 8vo, <i>cloth</i> , ...	7	6
M'Lauchlan's (Rev. Dr) Celtic Gleanings, or Notices of the History and Literature of the Scottish Gael, fcap. 8vo, <i>cloth</i> , ...	2	6
M'Naughton (Peter) on the Authenticity of the Poems of Ossian, 8vo, <i>sewed</i> , ...	0	6
Masson's Nestigia Celtica : Celtic Footprints in Philology, Ethics, and Religion, cr. 8vo, <i>sewed</i> , ...	2	0

BIBLES, TESTAMENTS, AND PSALM BOOKS,

AT VARIOUS PRICES AND BINDINGS.

64 South Bridge, Edinburgh.





